

Cjuandajyihí Xí Catsihindu San Lucas Tsëhë Jesucristu

1 Jemu cjin xuta xi ha catsihindu me cjuá xi chja tsëhë yëjë xcusun xi sehe casahmi Nina ngajñi naja ngayaan xuta ngasunhndë. ²Meje tsihindu me cjuá vëhë sacuatjin camahani casua camachaya naja me xi cavëëndaja cojo tuxcun hisca ntsacu cavetsihin sehe cafahaxa me xi tsinguitsojo me cjuá jan. ³Hisca hatsëë ne, ngahan ne, hacuaha ha jemu ndaja cavinenguësë yëjë ni hacutjin camá. Vëhë xi xi má ná ne, hacuaha ndatjin xi tsihindu chichihin nuju cjuá tsëhë yëjë hacutjin camá, ngayun tatá Teófilo, ⁴cojo sa xi sacúndaja nuju cjuaquixi tsëhë cjuá xi ha camachaya nuju jan.

Cafehe cjuá xi tsin Juan Vitenda rë Xuta

⁵Nixtin hya xi Herodes cavitexa me yëjë ni xuta tjë rë Israel ne, cavéjña xu ngu nahmi xi hmí rë Zacarías, me xi má ladu rë Abías. Hane chjuun rë Zacarías ne, Elisabet hmí rë me, hacuaha tjë rë Aarón xu má me. ⁶Hane Zacarías cojo Elisabet ne, tyjahi cjuatacun rë me xcun Nina ta, tsëhë xi tsajin xu jyé rë me xi tisahmichihin me yëjë

ni sacuatjin cavitexa Nina. ⁷Hane tsajin rë me quihndi ta, tsëhë xi Elisabet ne, hatuxa maji xu sacú rë me quihndi, hacuaha catsijo ni me ne, ha jemu changá xu me.

⁸Hya xi camá ne, cavechú nixtin xi casatë rë Zacarías cojo yëjë sa nahmi xi má ladu rë Abías xi sahmi xu me xá xcun Nina xi má me nahmi. ⁹Hane sacuaha xcusun rë nahmi ne, catsintsavë xu me ngu suerte cojo sa xi cuma tsejen ne, jarë xu me xi satë rë xi cuisehen ndava Nina, cuaca tyjungunsa. Hya xi camá ne, casatë xu rë Zacarías. ¹⁰Hane yëjë xutacjin jan ne, caviyuju xu me candatsen sahmi me oración rë me, hora xi tivaca xu Zacarías tyjungunsa cahntsua ndava Nina. ¹¹Hane hora xi tivaca me tyjungunsa jan ne, camatsejen xu ngu ángel secun taha ladu quixi tsëhë ngasuncun hiscan xi tí tyjungunsa. ¹²Hane xi cavëë Zacarías ángel jan ne, jemu quijircun rë me hacuaha jemu catsacjun xu me camá. ¹³Ngajan xi ángel jan ne, cuitjin xu cachja cojo rë me:

—Xicarcuini ngaye Zacarías ta, cjuá xi cachjahye ne, cahndë Nina.

Vêhê xi na Elisabet chjuun riji ne, sacú rê na ngu quihndi, hane quihndi vêhê ne, Juan tehe ñihi rê. ¹⁴Hane jemu cjue ri cjuasua hacuaha jemu ndaja cuma ri, hacuaha jemu cjín xuta xi jercu tjin rê me cjuasua xi catsin quihndi vêhê ta, ¹⁵tsêhê xi jemu jyê hnga cuma cojo cjuatacun rê ngajan xcun Nina. Hacuaha cuiin camahani xan hacuaha cuiin camahani nandá machihi. Hacuaha hisca hya xi caseya quihndi vê cahntsua naa rê ne, Hasen rê Nina quitsê rê xahasen rê. ¹⁶Hacuaha quihndi vêhê sahmi xi jemu cjín xuta tjê rê Israel cuya nga me ndiya rê Nina rê me. ¹⁷Quihndi vê ne, vêhê cuinduva titjun, sehe cuinduva Nina. Hane sacuatjin jyê hnga profeta Elías cojo cjuatacun rê me hatsêê nixtin ne, hacuanitjin ni jyê hnga cuma quihndi vêhê cojo cjuatacun rê, cojo sa xi quihndi vêhê ne, sahmi xi cuya cuma ndaja cacun nga yêjê ni nahmi rê nixti cojo nixti rê me, hacuaha sahmi xi yêjê xuta xi vihndiin me tsêhê Nina ne, cuma tangun cjuatacun rê me cojo cjuatacun rê xuta xi tyjahi cjuatacun rê me. Hane cuatjin chuva vêhê ne, cuêhêchjine quihndi vêhê xuta xi cuihndê me tsêhê Nina. —Cuahaxutjin cachja ángel.

¹⁸Sehe ngajan xi Zacarías ne, cuitjin xu cavinenguise me ángel: —¿Hacutjin sacú ná cjuaquixi xi cuatjin jain cuma ni? ta ngahan ne, ha jemu changá ngahan, hacuanitjin ni chjuun naha ta jemu changá na. —Cuahaxutjin cachja me.

¹⁹Sehe ngajan xi ángel jan ne, cuihixutjin cafayangui nga:

—Ngahan xi Gabriel ngahan; ngahan xi tejña ngajan xcun Nina. Hacuaha ngahan xi catsingatju ná Nina xi cuisiajme cojo ri hacuaha suá cumachaya ri cjuandajyihî vêhê. ²⁰Chutsijin ni, quihndê ta camacjaain ri tsêhê cjua xi cachjá cojo ri ne, cumaji cuinoje, tsêhê xi cuma lihmi ngaye hisca hya xi cuetjucaa cjua xi cachjá cojo ri. Cjua vêhê ne, hatuxa cuetjucaa hya xi cuechú nixtin rê. —Cuahaxutjin cafayangui ángel.

²¹Jinguyêjê rê ne, xutacjín jan ne, jercu siuya xu me Zacarías, hisca fircun rê me tsêhê xi cuatjin jercu vindeya rê Zacarías xi cavisehen xu me ndava Nina. ²²Hane hya xi cavetju me ne, maji xu chja me cojo xuta. Hane xuta jan ne, cavacun rê me ta Zacarías ne, tjin mé xi cavêê me. Hacuaha tu tisahmitsja ni me ta, tsêhê xi lihmi cuaha xu me. ²³Hya xi cavatju nixtin xi satê rê me xi sahmi me xá xi má me nahmi ne, cavuya cafe xu me ndava me.

²⁴Hya xi camá ne, xi cavatju sa nixtin ne, casacu xu rê chjuun rê me quihndi, hane cahntsua hñú sá xi jiya quihndi rê Elisabet jan ne, cuatjin caseyama xu me ndava me. Hane cuitjin xu cachja suvá me: ²⁵“Cuitjin casahmi Nina cojo ná ngu cjuandaja, quihndê xi camayuma rê me ngahan hane cafaxin me cjuasava xi má ná ngajñi rê xuta tsêhê xi sacuiin ná quihndi.” Cuahaxutjin cachja me.

Cafehe cjua xi tsin Jesucristu

²⁶Xi ma jyun sá xi jiya xu quihndi rê Elisabet ne, catsingatju Nina ángel xi hmí rê Gabriel ngu nandya xi hmí rê Nasaret, tsêhê

distritu Galilea, ²⁷ndava ngu chjuun xungun xi hmí xu rë María. Hane María jan ne, tacunvasen cjuavixan rë me cojo ngu xihin xi hmí rë José, ngu me xi tjë rë David, ngu xutachanga xi camatitjun xu tsëhë xuta tjë rë Israel. ²⁸Hane xi cavisehen ángel ndava María jan ne, sehe cachja xu cuitjin:

—Cuhndari, tsan. Nina ne, catsinchacun me ngaye, hacuaha tacun me cojo ri. Ngajñi rë yëjë ni yachjin ne, ngaye xi jercu catsinchacun ri Nina. —Cuatjin xu cachja ángel.

²⁹Xi cahndë xu María cjuu xi cachja ángel jan ne, catsacjun me camá, sehe catsingataha cacun xu me mé xcusun nina xi casua ángel me. ³⁰Sehe ngajan xi ángel ne, cuitjin xu cachja cojo rë me:

—Xicarcuini María ta Nina ne, jemu tjin rë me cjuandaja cojo ri.

³¹Quihndë ne, sacú ri ngu quihndi, hane hacuaha cuechú nixtin xi tsin ri quihndi vëhë. Quihndi vëhë ne, tehe ñihi rë Jesús. ³²Hacuaha jemu jyë hnga cuma cojo cjuatacun rë, hacuaha Quihndi rë Nina xi Matitjun cjuahañihi. Hacuaha Nina sahmi me xi cuitexa quihndi vëhë sacuatjin cavitexa xutachanga rë, me xi hmí rë David. ³³Hane vëhë cuitexa rë xuta tjë rë Israel, hane gobiernu rë ne, tsajin nu tsajin nixtin cuijnetaha. —Cuatjin xu cachja ángel.

³⁴Sehe ngajan xi María ne, cavinenguise xu me ángel cuitjin:

—¿Hacutjin cuma xcusun vi? ta ngahan ne, cjëë sacú xihin naha.

—Cuatjin xu cachja me.

³⁵Hane xi cafayangui ángel ne, cuitjin xu cachja:

—Hasen rë Nina xi Matitjun ne, cuinduva cuaxtë ri sacuaha ngu tjahnguen. Vëhë xi quihndi xi tsin ri ne, hatuxa tyjahi cojo cjuatacun rë, hacuaha Quihndi rë Nina Jain.

³⁶Hacuaha na Elisabet xinguin ne, handasa ha jemu changá na ne, hacuaha casacu rë na ngu quihndi. Ha quihndë jyun sá yaha na quihndi, na xi chja cjuu xi hatuxa maji sacú rë quihndi. ³⁷Cuatjin camá ta, xi cuma rë Nina ne, tsajin camahani mé xi cumaji cuma.

—Cuatjin xu cachja ángel.

³⁸Ngajan xi María ne, cuitjin xu cafayangui me:

—Ngahan ne, sacuaha ngu hndixahan rë Nina ngahan. Catisahmi Nina cojo ná sacuatjin cjuu xi canújun. —Cuatjin xu cachja me.

Ngaxtun vëhë ne, sehe café ángel.

Cavusehenya María Elisabet

³⁹Nixtin hya ne, cavetju xu María, ngu quixi ni quiji me ngu nandya ngajan nangui ndetjún tsëhë distritu Judea. ⁴⁰Hane xi caféhe me ngajan ne, cavisehen xu me ndava Zacarías, sehe cachja me nina cojo Elisabet. ⁴¹Hane xi cahndë xu Elisabet xi cachja María nina ne, cafiniya xu quihndi xi jiya cahntsua Elisabet. Ngajan xi Elisabet ne, catsë rë xahasen rë me cojo Hasen rë Nina. ⁴²Hane sehe jercu hñu xu cachja me cjuu vihi cojo María:

—Ngajñi rë yëjë ni yachjin ne, ngaye xi jercu catsinchacun ri Nina, hacuaha catsinchacun me quihndi xi tsin ri. ⁴³¡Mé má ngahan xi tu ngaye xi naa rë nai naha ngaye, ndove tichusihinye ná! ⁴⁴Xi

tu cahndë xi canoje nina cojo ná ne, hora vëhë cafiniya quihndi xi jiya cahntsuá xi ndama rë. ⁴⁵Jemu ndaja tsiji xi macjain ri xi yëjë ni cjua xi cachja Nina cojo ri ne, cuetjucaa jain. —Cuatjin xu cachja Elisabet.

⁴⁶Sehe ngajan xi María ne, cuitjin xu cachja me:

Ngahan ne, jercu sahme jyë sahme hnga Nina;

⁴⁷hacuaha jercu ndama ná tsëhë Nina, me xi vaxëtje ná.

⁴⁸Casahmicuenda Nina ngahan, ngahan xi sacuaha ngu hndixahan rë me ngahan ta, quihndë cojo nixtin xi cjui sa ne, cuichja yëjë xuta xi siu cojo xuta xi sehe tsin sa xi jemu ndaja tsahan;

⁴⁹tsëhë xi Nina xi jemu jyë hnga me cojo ngahñu rë me ne, jemu vengui chji rë xcusun xi casahmi me cojo ná.

iJemu tyjahi me cojo cjuatacun rë me!

⁵⁰Nina ne, hatuxa jemu tjin rë me cjuayumatacun cojo yëjë xuta xi faharcun rë me

ha tucutjin cjín xuta tisetsein me jima ngundiya jima ngundiya.

⁵¹Nina ne, sahmi me hacutjin xi meje sahmi me cojo ngahñu jyë xi tjin rë me:

tsinguitsojo me yëjë xuta xi jemu tjin rë cjuaxta cahntsuahaxasen rë;

⁵²tsinguijne me xuta xi matitjun tsëhë xcun xá rë, hacuaha sahmi yehe sahmi hnga me xuta yuma.

⁵³Xuta xi machaja rë me ne, jemu yehe cjuandaja sua Nina me,

peru xuta nchina ne, suvá tsja tiya me tsicuya Nina me cjue me.

⁵⁴Nina ne, cuisecoo naja me ngayeyen ni xuta tjë rë Israel, ngayaan xi tsëhë me ngayaan, hacuaha tsinguitsjen me xi cumayuma rë me ngayaan.

⁵⁵Xi cuatjin ne, cuetjucaa jain sacuatjin xi ha cachja me cojo xutachanga naja Abraham, cojo yëjë sa tjë rë me.

Cuatjin xu cachja María.

⁵⁶Hya xi camá ne, María jan ne, cavéjña xu me jyan sá ndava Elisabet, sehe cavuya cafe me nangui rë me hiscan tjin ndava me.

Hacutjin camá hya xi catsin Juan Vitenda rë Xuta

⁵⁷Quihndë ne, cavechú nixtin xi tsin rë Elisabet quihndi, hane catsin rë me ngu quihndi xihin.

⁵⁸Xi camachaya rë yëjë xuta xi siu tahndee ndava me cojo yëjë xicjin Elisabet xi jercu camayuma rë Nina Elisabet ne, jercu ndaja camá rë me xingu xingu me cojo Elisabet. ⁵⁹Hya xi camá xu ne, xi cavetjucaa quihndi jan jyin nixtin ne, cafehe nga me xi siu tahndee ndava me jan cojo xicjin Elisabet xi cuma suhi tsëhë xi xtí chuxin rë quihndi. Hane meje suañihi me quihndi jan Zacarías, tsëhë xi cuatjin hmí rë nahmi rë. ⁶⁰Ngajan xi cachja xu naa rë quihndi jan cuitjin: —Hajín ta quihndi vi ne, Juan cjuahañihi. —Cuatjin xu cachja me.

⁶¹Hane xuta jan ne, cuitjin xu cachja me:

—Peru ngayun ne, tsajin hisca ngu xingun xi cuatjin hmí rë. —Cuatjin xu cachja xuta jan.

⁶²Ngajan xi xuta xi cuacun jan ne, tu casahmi tsjá xu ni me cojo nahmi rë quihndi xi cavinenguise me hacutjin meje rë nahmi rë quihndi xi cjuahañihi quihndi jan.

⁶³Ngajan xi Zacarías ne, cafehya xu me ngu pizarra, sehe ngajan catsihindu me cjua vihi: “Juan cjuahañihi.” Cuatjin xu catsihindu me. Hya xi camá ne, yëjë ni me ne, jemu quijircun xu rë me.

⁶⁴Hane hora vëhë ni ne, camá xu cachja Zacarías, hane jemu ndaja cavaxëndaja me Nina. ⁶⁵Ngajan xi xuta xi siu tahndee ndava me jan ne, jemu catsacjun xu me camá, hane jingujyë ni ladu nangui ndetjún tsëhë distritu Judea hiscan xi siu xuta ne, jercu cavisiajmi xu me tsëhë cjuacjintacun vëhë.

⁶⁶Hane yëjë xuta xi camachaya rë cjuacjintacun vëhë ne, jercu cjin catsingataha cacun me, hisca cachja xu me cuitjin:

—iCuechú nixtin xi quihndi vi ne, cuma ngu xihin xi jyë hnga cojo cjuatacun rë!

Cuatjin xu cachja xuta xi cuacun jan ta, tsëhë xi quihndi vëhë ne, Nina yahangui jain me.

Cjua rë Nina xi cachja Zacarías

⁶⁷Zacarías, nahmi rë quihndi jan ne, ña catsë rë me cojo Hasen rë Nina, hane cachja xu me cuitjin cjua xi cafachatsja me tsëhë Nina:

⁶⁸iTjemu ndaja Nina naja ngayaan xuta tjë rë Israel! tsëhë xi cuinduva me cjuaha naja me xi cuma yaan xuta rë me.

⁶⁹Nina sahmi me xi ngajñi rë tjë rë David, ngu xuta rë Nina

ne, cuetjújñi ngu xihin xi cuaxëtje naja,

⁷⁰sacuatjin xi ha cachja profeta xi cavejña me tsëhë Nina, hya xi cachja me cojo xutachanga naja cjua rë Nina hatsëë nixtin.

⁷¹Hacuaha cachja Nina xi cuaxëtje naja me tsëhë condra naja, hacuaha cuaxëtje naja me tsëhë yëjë xuta xi choho vëë naja,

⁷²hacuaha cumayuma rë me tsëhë xutachanga naja hacuaha tsinguitsjen me compromisu ximinchacun xi casahmi me cojo xutachanga naja.

⁷³Nina ne, cachja me: “Ngahan suva hvë”, hya xi casahmi me compromisu jan cojo xutachanga naja Abraham.

⁷⁴Hya xi casahmi me compromisu vëhë ne, cachja me xi cuëhëndaya naja me tsëhë condra naja, cojo sa xi ngayaan ne, hacuiin cojo chircun chjahanrcun me ta

⁷⁵chjahanrcun me cojo ngu cjuatacun tyjahi, xi tsajin jyë naja xcun me hacutjin nixtin xi nechancun cjuahñu naja.

⁷⁶Ngaye tsan ne, hacuaha cuma ngaye ngu profeta tsëhë Nina xi Matitjun ta, tsëhë xi ngaye cuihintitjin, choxehe ndiya tsëhë Nina,

⁷⁷hacuaha tehe cumachaya rë xuta rë Nina xi cuaxëtje Nina me, cuma cuinújan ne, tsinchataha me tsëhë jyë rë

⁷⁸ngatsë rë ta tsëhë xi Nina ne, jemu tjin rë me cjuayumatacun cojo naja. Hacuaha ngatsë rë cjuayumatacun vëhë ne, Nina tsingatju me tsëhë ngahnga ngu xi sacuaha tsuhi,

⁷⁹cojo sa xi sua hasen rë ngajñi naja xi nechan cojo ngu cjuacjintacun jyë xi hisca sacuinyiin naja hacutjin naxentjeen yojo naja, ngayaan xi tjemu tsavi nechantahan tsëhë cjuaveya, hacuaha cojo sa xi cjuecojo naja ndiya tsëhë cjuajeya.

Cuatjin cachja xu Zacarías.

⁸⁰Hya xi camá ne, quihndi jan ne, camajyë, hacuaha cavejñahñu xu cjuatacun rë. Hane xi camá ngu xihin jyë ne, quiji cavëjña xu ngajan ngu xín camahani tsëhë nandya, hisca hya xi cavechú nixtin xi cavetsihin cachja cjuarë Nina cojo xuta tjë rë Israel.

Hacutjin camá hya xi catsin Jesucristu

2 Cuitjin xu camá nga ngunixtin hya xi Herodes vitexa me xuta tjë rë Israel. Me xi matitjun camahani xi hmí rë César Augusto ne, cavitexa xu me xi yëjë ni xuta xi siu ngahma gobiernu rë me ne, cjue me cuiyujutahaxujun me xi cuechjitje me. ²Hacuaha hya xi cuatjin tjuntjun caviyujutaha xujun xuta ne, hya vitexa xuta Cirene ngajan distritu Siria. ³Ngajan xi yëjë ni xuta ne, quiji xu me caviyujutaha xujun me, jima ngu me hiscan nangui rë xutachanga rë me.

⁴Cuatjin camá xi José ne, cavetju xu me tsëhë nandya Nasaret, distritu Galilea, quiji me distritu Judea, nangui rë xutachanga rë me David, hiscan xi hmí rë Belén, tsëhë xi José ne, tjë rë David xu má me. ⁵Quiji casetahaxujun tangun me cojo María, me xi tacunvasen cjuavixan rë me cojo. Hane María ne, jiya xu quihndi rë me hya xi quiji me. ⁶Hya xi camá ne, jinguyëjë rë xi siutahá xu me ngajan ne, cavechú nixtin xi tsin xu quihndi rë me, ⁷hane catsin rë me ngu quihndi xihin, xi quihndi tjun rë me. Hane xi cavatju catsin quihndi jan ne, sehe cafaha me cavaxtë me ngu tsjian, sehe cafaña xu me quihndi jan cahntsua hiscan jineyá chu ta, tsëhë xi casacuiin xu cahndé cahntsua ndihya xi cuiyuju me, tsëhë xi jemu quitsë camahani xuta.

Cachja ángel cojo cha xi sahmi cuidadu rë chu

⁸Ha taha ladu vëhë ni ne, siutahá ngujo cha nguixun ngajan ngujiña, xi sahmi cuidadu xu cha chu tsánga rë cha. ⁹Hya xi camá ne, ha tu ñahñu camatsejen xu ngu ángel tsëhë Nina hiscan xi siutahá cha, hane hora vëhë ni ne, hasen ndajyihi rë Nina ne, jercu casahmi hasen xu rë jinguyyë ni hiscan xi siutahá cha, hane jemu catsacjun camahani cha camá. ¹⁰Ngajan xi cachja xu ángel cojo cha cuitjin: —Xicarcuun ta, nguehe nduva tisuá cumachaya nuju ngu cjuandajyihi xi hisca yëjë xuta tjë rë Israel jercu ndaja cuma rë me ¹¹ta nguehe Belén, nangui rë

xutachanga nuju David ne, quihndë catsin ngu quihndi xi cuaxëtje nuju, quihndi xi Nina catsingatju rë xi cumatitjun tsujun. ¹²Hane cuitjin sacú nuju cjuaquixi tsëhë cjuá xi cachjá cojo nuju vë: xi cjuhun jan ne, cuechun hiscan xi chun ngu quihndi tixtë rë tsjian, jiña cahntsua hiscan jineyá chu. —Cuatjin xu cachja ángel.

¹³Hane ha tu ñahñu camatsejen sa jercu cjín camahani ángel xi nduva xu ngahnga, cafehe hiscan xi secun ángel xi cafehe titjún, tivaxëndaja rë Nina cojo cjuá vihi:

¹⁴iJemu jyë hnga Nina cojo Hasen rë me ngajan ngahnga!
iHane nguehe nangui ne,
cuisehen cjuajeya rë Nina
cahntsua xahasen rë xuta xi
chuya rë Nina tsëhë!

Cuatjin xu cachja ángel cjín jan.

¹⁵Hya xi camá ne, hya xi cavuya quiqi nga ángel jan ngahnga ne, cha xi sahmi cuidadu chu tsánga rë jan ne, cuitjin cachja cha cojo xicjin cha:

—iCjuanguen ni! Cjuanguen hisca nandya, cuanguen chutsejen xcusun xi camá vi, sacuatjin casua Nina camachaya naja. —Cuatjin xu cachja cha cojo xicjin cha.

¹⁶Hya xi camá ne, ngusun xu ni cafe cha, hane xi cafehe cha nandya ne, casacuse rë cha hiscan tacun María cojo José, cojo quihndi jan, jiña cahntsua hiscan jineyá chu. ¹⁷Hya xi cavëë xu cha quihndi jan ne, sehe cavetsihin casuacuenda cha yëjë cjuá xi cachja ángel cojo rë cha tsëhë quihndi vëhë. ¹⁸Hane xi cahndë xuta cjuá xi cachja cha xi cuacun jan cojo rë me ne, jemu

quijircun xu rë me. ¹⁹Peru María ne, cavetjo cavetjo ni me yëjë ni cjuá vëhë cahntsua xahasen rë me, hacuaha jercu cjín xu catsingataha cacun me. ²⁰Hane xi cavuya quiqi nga cha xi sahmi cuidadu chu rë jan ngajan nguijña ne, taha tisahmi jyë tisahmi hnga xu cha Nina hacuaha taha tivaxëndaja cha me tsëhë yëjë cjuá xi cahndë cha cojo xcusun xi cavëë cha, sacuatjin cachja ángel cojo rë cha.

Quiqi caningacun rë Jesucristu cojo Nina ngajan Jerusalén

²¹Xi cavechú xu jyin nixtin quihndi ne, hacuaha hatuxa hya cavechú nixtin xi xtí chuxin rë, hane cuatjin camá cojo quihndi. Hacuaha Jesús cafahañihi xu quihndi, ñihi xi ha cachja ángel hisca chaja sa xi seyahma quihndi cahntsua naa rë.

²²⁻²⁴Hya xi camá ne, xi cavechú xu nixtin xi cjue naa rë quihndi yungun xi matitjun cojo quihndi xi cuma tyjahi me xcun Nina tutjin chja ley rë Moisés ne, quiqi José cojo María Jerusalén, quiqi cani me ngu cjuatjo ta, tsëhë xi chja ley rë Nina ta meje rë xi cjue jo chu tucjin, o sá xi jo chu paloma chihndë. Hacuaha quijicojo xu me quihndi jan Jerusalén xi tsingacun me quihndi jan cojo Nina. Quitahá xujun xcun ley rë Nina xi yëjë ni quihndi tjun xi xihin ne, hatuxa tsëhë Nina cuma.

²⁵Cavëjña xu ngu xihin xi hmí rë Simeón ngajan Jerusalén. Xihin vëhë ne, tyjahi xu me cojo cjuatacun rë me ngajan xcun Nina, hacuaha jemu faharcun me Nina.

Hacuaha jemu meje xu rë me xi cjuehe xuta xi yaha cjuetacun jan xi cuma rë xuta tjë rë Israel. Hacuaha Hasen rë Nina ne, jiya cahntsua xahasen rë Simeón. ²⁶Hane Hasen rë Nina jan ne, casua xu camachaya rë me xi jinguyëjë rë xi cjëë scuëë me xuta xi tsingatju Nina jan ne, hatuxa cueyaain xu me. ²⁷Hane quiji me yungun xi matitjun, tsëhë xi cuatjin cachja Hasen rë Nina cojo rë me. Hacuaha xutacha rë quihndi xi hmí rë Jesús jan ne, quijicojo xu me quihndi jan yungun vëhë, xi sahmichihin me sacuaaha xcusun xi vitexa ley rë Moisés hacutjin cuatju quihndi cuma. ²⁸Hya xi camá ne, cafaha xu Simeón quihndi jan cavataha me, sehe hacuaha cavaxëndaja me Nina cojo cju vihi:

²⁹Ngayun Nina naha, ngayun ne, ha cuma tuhun cahndé xi ngahan hndixahan nuju ne, cueya cojo cjuandaja cojo cjuajeya

sacuatjin xi ha canújun.

³⁰Cuma cueya ta, tsëhë xi quihndë ne, cahvë suva xuta xi caningatjun xi cuaxëtje niji,

³¹me xi caningatjun xcun cojo xcun yëjë ni xuta,

³²me xi cuinduva sacuaaha ngu ndihi xi sua me cjuahasen xi cuma rë xutaxín, hacuaha cuinduva me xi sahmi yehe sahmi hnga niji me, ngayin xuta nuju, xuta tjë rë Israel.

Cuatjin xu cachja Simeón.

³³Hane xutacha rë quihndi jan ne, jemu quijircun xu rë me tsëhë xi cuatjin cachja Simeón tsëhë quihndi jan. ³⁴Hane Simeón ne,

catsinchacun me me xi cuacun jan, sehe cachja xu me cojo María naa rë quihndi jan cuitjin:

—Quihndi vihi ne, hacuaha sahmi xi jemu cjín xuta tjë rë Israel chajá me, hacuaha sahmi xi jemu cjín xuta tjë rë Israel cuetjutje me. Hacuaha quihndi vihi ne, sua cumachaya rë xuta mé xi meje rë Nina, hacuaha jemu choho cuichja xuta tsëhë quihndi. ³⁵Cuatjin cuma cojo sa xi ngajan sesunhngatsejen yëjë hacutjin xi tsingataha cacun jemu cjín xuta cojo cjuatacun rë me. Hacuaha ngayun ne, jercu cuma rë xahasen nuju, sacuaaha xi quicha casehen rë xahasen nuju. —Cuatjin xu cachja Simeón.

³⁶Hacuaha tacun xu ngu chjuun xi hmí rë Ana ngajan yungun, quihndi rë Fanuel, tjë rë xutachanga xi hmí rë Aser. Chjuun jan ne, profeta xu má me. Hacuaha jercu changá xu me. Xi cavixan me ne, cavéjña me cojo xihin rë me yatu nu. ³⁷Ngaxtun vëhë ne, cavéjña cahan me. Hane xi casacu xicjin xu me cojo xutacha rë Jesús ne, ñujuchan ñuju nu xu tjin rë me. Hacuaha jemu quiji camaha xu ni me yungun xi matitjun. Jemu cjín ndiya ne, cajinii xu me niñu xi faharcun me Nina. Hacuaha jercu sahmi xu me oración rë me. Nixtin nixten faharcun me Nina. ³⁸Hacuaha ha hora xi siu xu ni xutacha rë Jesús ngajan yungun jan ne, cafehe Ana. Hane xi cavëë me quihndi Jesús jan ne, casua xu me nacuechji rë Nina. Ngaxtun vëhë ne, sehe cavetsihin cachja xu me tsëhë Jesús cojo yëjë xuta xi jemu meje rë xi cuechú nixtin xi cuaxëtje Nina nandya Jerusalén.

**Cavuya me cojo Jesucristu
nandya Nasaret**

³⁹Xutacha rë Jesús ne, hya xi ha café casahmichihin xu me yëjë xcusun xi vitexa ley rë Nina ne, cavuya cafe me nangui rë me, hiscan xi hmí Nasaret, distritu Galilea. ⁴⁰Quihndí jan ne, camajyë hacuaha casacuhñu rë, hacuaha jercu cavechútáha cjuatacun rë, hacuaha jercu cavisehen xu cjuandaja rë Nina cahntsua xahasen rë.

**Casetaha suvá Jesucristu
ngajan yungun xi matitjun**

⁴¹Chuva nu chuva nu ne, xutacha rë Jesús ne, fi xu me suhi tsëhë Pascua ngajan Jerusalén. ⁴²Hane hya xi Jesús cavechú me tejó nu ne, sacuaha xcusun rë xuta cojo suhi vëhë ne, quiji xu Jesús cojo xutacha rë me ngajan Jerusalén. ⁴³Xi cavatju suhi jan ne, xutacha rë Jesús ne, cavetju xu me tsëhë Jerusalén xi cuya cjue me nangui rë me. Peru Jesús ne, hisca camachayiin rë xutacha rë me ne, casetaha suvá xu me Jerusalén. ⁴⁴Xi má rë xutacha rë me ne, jiyajñi me ngajñi rë xutacjín tife me. Hane xi café ngu nixtin tife xutacha rë me ndiya ne, cavetsihin cavanguise xu me Jesús jan ngajñi rë xuta rë me cojo ngajñi rë yëjë xuta xi vinga rë me. ⁴⁵Hane xi casacuiin rë me Jesús jan ngajñi rë xutacjín jan ne, cavuya quiji xu me hisca Jerusalén, xi tivanguise me me. ⁴⁶Hya xi camá ne, xi majjan nixtin jan ne, sehe casacu xu rë me Jesús ngajan yungun xi matitjun,

tacun me ngajñi rë maestru xi vicuya cjuachacun, tivisiñuju me cjua rë maestru hacuaha tivinenguise xu rë me jingu sa cjuachacun. ⁴⁷Hane yëjë ni xuta xi tivisiñuju cjua rë Jesús jan ne, jercu fircun xu rë me, tsëhë xi cuarcu quicun cacun me hacuaha tsëhë xi jercu ndaja titsicuya me cjua tsëhë maestru jan. ⁴⁸Hane hya xi cavëë xu xutacha rë Jesús xi ngajan tacun me ne, tu quiji tsëhë me, sehe cachja naa rë me cuitjin:

—¿Mé má cuatjin canihñi cojo niji, tsan? Chutsijin ta cuajyihí ngahan cojo nahmi riji ne, cojo cjín cjuacjintacun niji ne, catujyihinyin cavinchinsin ri. —Cuatjin xu cachja me.

⁴⁹Ngajan xi Jesús ne, cuitjin xu cachja me cojo xutacha rë me: —¿Mé má cuatjin tu nguehe tu ngajan cavinchunsun ná ni? ¿Há hyúun ta hatuxa meje rë xi cuitejña ndava nahmi naha? —Cuatjin xu cachja Jesús.

⁵⁰Peru xutacha rë Jesús ne, cajñii xu rcu me cjua xi cachja Jesús cojo rë me.

⁵¹Hya xi camá ne, cavuya cafe xu Jesús cojo xutacha rë me nangui rë me ngajan Nasaret. Hacuaha cahndë me tsëhë xutacha rë me hacutjin xi quiji sa nixtin rë me. Hane naa rë Jesús ne, cavetjo cavetjo xu ni me yëjë ni cjua vëhë cahntsua xahasen rë me. ⁵²Sacuaha Jesús ne, jima jyë xu me cojo yojo rë me, hacuaha jima jyë jima hnga me cojo cjuatacun rë me. Hacuaha tichuya sa xu rë Nina tsëhë me, hacuaha tichuya sa rë xuta tsëhë me.

**Cachja Juan Vitenda rë Xuta
cjuandajyihí rë Nina**

3 Cuitjin xu camá hya xi café tyjuhun nu jiya me xi matitjun camaha ni xi hmí rë Tiberio César xcun xá rë me xi vitexa me jingu ni ladu. Poncio Pilatu ne, me vëhë vitexa xu me distritu Judea, hane Herodes ne, me vëhë xu vitexa me distritu Galilea, hane hntsëjñu me xi hmí rë Felipe ne, me vëhë xu vitexa me distritu Iturea cojo distritu Traconite, hacuaha Lisania ne, me vëhë xu vitexa me distritu Abilinia. ²Hane sacuaha nahmi xi matitjun xu ne, Anás cojo Caifás má me. Hane sacuaha nixtin vëhë ne, Juan quihndi rë Zacarías ne, hya xi quitahá me ngajan ngu xín tsëhë nandya ne, cafahatsja me cjua xi catsingatju xu Nina. ³Hane quiji catsujyihiya me yëjë ni ladu tiña tsëhë ndajyë Jordán, tichja me xi meje rë xi tsindeya xu xuta cjuatacun rë me hacuaha xtenda me, cojo sa xi tsinchataha Nina xuta tsëhë jyé rë me. ⁴Xi cuatjin xu casahmi Juan ne, casahmichihin me sacuatjin camahindu hatsëë nixtin xcun xujun xi chja cjua rë profeta Isaías xi chja cuitjin:

Cuitjin jercu hñu cuichja ngu xuta ngajan hiscan jemu xín tsëhë nandya:

“Tuhunchjinu ndiya tsëhë Nai naja; ninguijuxun ndiya tsëhë me.

⁵Yëjë ni hiscan nangui cahntsua ne, tséya rë, yëjë ni ndetjún cojo yëjë ni naxi ne, cuijnenanguí, yëjë ni ndiya lahñi ne, cuma quixi,

yëjë ni ndiya xi hacuiin chihin ne, cuma chihin.

⁶Hane yëjë ni xuta ne, scuëë me hacutjin vaxëtje Nina xuta rë me.”

Cuatjin xu catsihindu Isaías cjua xi jercu hñu cuichja xuta jan.

⁷Ngajan xi hya xi quiji xutacjín xi xtenda me ne, cuitjin xu cachja Juan cojo xuta:

—iNgayujun ni ngayun quihndi rë chu tsehen matsejen ne!, ¿yo cavinchangui nuju xi nihñu ngahñu xi cuetjuntjun tsëhë castigu xi hatuxa tsingatju Nina? ⁸Sá xi meje jain cuetjuntjun matsejen ne, nihñu suvá cjuandaja sacuatjin sahmi xuta xi catsindeya jain me cjuatacun rë me. Xicanujuun cahntsua xahasen nuju cjua vihi: “Ngayaan ne, tsajin mé cuma naja ta, tsëhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca ndyojo xi cuicun vi ne, cuma sahmi me tjë rë Abraham. ⁹Chutsujun ta ngayun matsejen ne, tangun ngayun cojo yatjë xi ha quitaháchjine quicharcu tyjama rë xi cuetsihin xtí. Yëjë ni yatjë xi suaain tu xi ndaja matsejen ne, xtí rë, sehe cjue cueti. —Cuatjin xu cachja Juan.

¹⁰Ngajan xi xutacjín jan ne, cuitjin xu cavinenguise rë me Juan: —¿Hacutjin ndatjín nihñi xi cuma nihñi cjuandaja xi nújun vë ni? —Cuatjin xu cavinenguise me.

¹¹Hane xi cafayangui Juan ne, cuitjin xu cachja me:

—Jarë ngayun xi tjín nuju jo tsjian nuju ne, tuhun rë ngu yo xi tsajin rë. Jarë ngayun xi tjín xi chinu ne, ha chuva vëhë ni tuhun

hitsë catjinë me xi tsajin xi sinë.

—Cuatjin xu cachja me.

¹²Hacuaha canduva sa xu ngujo cha xi faha tujúnsa xi meje rë cha xi xtenda cha, hane cuitjin xu cavinenguise cha:

—Tatá, ¿mé xi ndatjin nihñi ngayin? —Cuatjin xu cavinenguise cha.

¹³Sehe ngajan xi Juan ne, cuitjin xu cachja me cojo cha:

—Hacuiin cjin sa tujún chjahyun rë xuta. Chjahyun rë me hacutjin xi casatëxa ni nuju. —Cuatjin xu cachja me.

¹⁴Hacuaha cavinenguise nga ngujo sindadu me cuitjin:

—Hane ngayin ne, ¿mé xi ndatjin nihñi? —Cuatjin xu cavinenguise cha.

Sehe cachja xu me cojo cha cuitjin:

—Xicanaxuun rë xuta tujún cojo cjuachan, o sá xi cojo ngu cjuandacha. Catamangutacún ni cojo tujún xi ha ma chji nuju.

—Cuatjin xu cachja me.

¹⁵Xuta ne, jercu siuya camahani me mé xi cuma, hacuaha vinenguise xu me cahntsua xahasen rë me cuitjin: “Hyaan sa xi Juan rë vi Xihin xi Tsingatju Nina xi cuaxëtje naja me.” Cuatjin xu cavinenguise me. ¹⁶Sehe ngajan xi Juan ne, cuitjin xu cachja me cojo yëjë xuta jan:

—Ngahan matsejen ne, cojo nandá ni tivitënda nuju, peru sehe cuinduva me xi cueyá me Hasen rë Nina cahntsua xahasen nuju, hacuaha cuaha me sacuaha ngu ndihi xi tsityjahi rë cjuatacun nuju. Me vëhë ne, hitsë sa jyë

hnga me cojo cjuatacun rë xi cumá ná ngahan, hisca cumaji tsinguissehercu sahme tyjahi chuxinxhtë rë me. ¹⁷Me xi tsingatju Nina jan matsejen ne, sacuaha xi ha yahatsja me quicha xi tsinguitjen rë xtë rë trigu cojo sa xi cuma tyjahi ndaja trigu xi casechun rë tsëhë me, hacuaha cjuaya me trigu tyjahi xi cuinchandaja me, hane xtë rë jan matsejen ne, cuaca me xcun ngu ndihi xi tsajin nixtin hvo. —Cuatjin xu cachja Juan.

¹⁸Hacuaha hacuiin suvá xu ni cjua vëhë cachja Juan cojo xuta hya xi cachja me cjuandajyihî rë Nina ta cachja sa xu me jemu cjin cjua. ¹⁹Herodes, me xi cavitëxa ngajan distritu Galilea ne, hacuaha cachjataha xu Juan me ngatsë rë xi cafaha Herodes na Herodía, chjuun rë hntsëjñu me, xi cumá chjuun rë me na. Hacuaha cachjataha sa xu Juan me tsëhë jingu sa xcusun tsehen xi casahmi me. ²⁰Peru xcun yëjë cjuatsehen vëhë ne, cavetahacoo sa Herodes xcusun vihi: caveya xu me Juan ndavaya.

Caxtenda Jesucristu

²¹Hane hya xi chaja sa xu cjue Juan ndavaya ne, ngu nixtin xi caxtenda yëjë ni xuta ne, hacuaha cojo xu Jesús caxtenda me. Hane xi cavatju caxtenda me ne, hora xi tisahmi xu me oración rë me ne, ngahnga ne, catuxaha, ²²hane Hasen rë Nina ne, canduvajnetsejen casesun rcu me. Sacuajyihî ngu paloma jyihî. Hacuaha hora vëhë ni ne, canuhya xu rë ngu cjua ngajan ngahnga xi cachja xu cuitjin: “Ngaye xi quihndi naha ngaye xi

jemu hmú cáacun ri. Jemu ndama ná ngatsé riji.” Cuatjin xu cachja.

Xutachanga rë Jesucristu

²³Quihndë ne, Jesús ne, tjin xu rë me sacuaha cantë nu hya xi cavetsihin me cojo xá rë me. Hacuaha xi má xu rë xuta ne, quihndi rë José má me. Hane José ne, quihndi rë Elí. ²⁴Elí ne, quihndi rë Matat. Matat ne, quihndi rë Leví. Leví ne, quihndi rë Melqui. Melqui ne, quihndi rë Jana. Jana ne, quihndi rë José. ²⁵José ne, quihndi rë Matatías. Matatías ne, quihndi rë Amós. Amós ne, quihndi rë Nahum. Nahum ne, quihndi rë Esli. Esli ne, quihndi rë Nagai. ²⁶Nagai ne, quihndi rë Maat. Maat ne, quihndi rë Matatías. Matatías ne, quihndi rë Semei. Semei ne, quihndi rë José. José ne, quihndi rë Judá. ²⁷Judá ne, quihndi rë Joana. Joana ne, quihndi rë Resa. Resa ne, quihndi rë Zorobabel. Zorobabel ne, quihndi rë Salatiel. Salatiel ne, quihndi rë Neri. ²⁸Neri ne, quihndi rë Melqui. Melqui ne, quihndi rë Adi. Adi ne, quihndi rë Cosam. Cosam ne, quihndi rë Elmodam. Elmodam ne, quihndi rë Er. ²⁹Er ne, quihndi rë Jesús. Jesús ne, quihndi rë Eliezer. Eliezer ne, quihndi rë Jorim. Jorim ne, quihndi rë Matat. ³⁰Matat ne, quihndi rë Leví. Leví ne, quihndi rë Simeón. Simeón ne, quihndi rë Judá. Judá ne, quihndi rë José. José ne, quihndi rë Jonán. Jonán ne, quihndi rë Eliaquim. ³¹Eliaquim ne, quihndi rë Melea. Melea ne, quihndi rë Mainán. Mainán ne, quihndi rë Matata. Matata ne, quihndi rë

Natán. ³²Natán ne, quihndi rë David. David ne, quihndi rë Isaí. Isaí ne, quihndi rë Obed. Obed ne, quihndi rë Booz. Booz ne, quihndi rë Salmón. Salmón ne, quihndi rë Naasón. ³³Naasón ne, quihndi rë Aminadab. Aminadab ne, quihndi rë Aram. Aram ne, quihndi rë Esrom. Esrom ne, quihndi rë Fares. Fares ne, quihndi rë Judá. ³⁴Judá ne, quihndi rë Jacob. Jacob ne, quihndi rë Isaac. Isaac ne, quihndi rë Abraham. Abraham ne, quihndi rë Taré. Taré ne, quihndi rë Nacor. ³⁵Nacor ne, quihndi rë Serug. Serug ne, quihndi rë Ragau. Ragau ne, quihndi rë Peleg. Peleg ne, quihndi rë Heber. Heber ne, quihndi rë Sala. ³⁶Sala ne, quihndi rë Cainán. Cainán ne, quihndi rë Arfaxad. Arfaxad ne, quihndi rë Sem. Sem ne, quihndi rë Noé. Noé ne, quihndi rë Lamec. ³⁷Lamec ne, quihndi rë Matusalén. Matusalén ne, quihndi rë Enoc. Enoc ne, quihndi rë Jared. Jared ne, quihndi rë Mahalaleel. Mahalaleel ne, quihndi rë Cainán. ³⁸Cainán ne, quihndi rë Enós. Enós ne, quihndi rë Set. Set ne, quihndi rë Adán. Adán ne, me vëhë xi Nina casahmi rë me.

Cafahachuva xitsehen Jesucristu

4 Hya xi camá ne, hya xi catsë rë Jesús cojo Hasen rë Nina hya xi caxtenda me ne, cavuya xu me tsëhë ndajyë Jordán xi cjue me ndava me, peru Hasen rë Nina ne, quiji nguehe quiji ngajan xu cojo rë me ngajan ngu xín tsëhë nandya ²cahntsua yachan nixtin. Hacuaha yasen ni tifahachuva xitsehen xi matitjun me. Hacuaha Jesús ne, tsajin camaha xu

ni mé xi cajiné me cahntsua nixtin xi cuacun vëhë. Hane xi cavatju nixtin xi cuacun vë ne, jercu camavojo xu rë me. ³Sehe ngajan xi xitsehan jan ne, cuitjin xu cachja cojo Jesús:

—Sá xi Quihndi jain rë Nina ngaye ne, tinoje cojo ndyojo vihi ne, catama niñu. —Cuatjin xu cachja xitsehan.

⁴Hane Jesús ne, cuitjin xu cafayangui me tsëhë xitsehan jan:

—Xcun xujun rë Nina ne, cuitjin camahindu: “Hacuiin suvá ngatsë rë niñu xi siu xuta cjuahñu.”

—Cuatjin xu cafayangui Jesús.

⁵Hane xi quijicojo xitsehan me ngu ndetjún hnga ne, sehe nguhñusasa xu catsingacun ni xitsehan jan me jingujyë ni nandya tsëhë ngasunhndë. ⁶Sehe cachja xu xitsehan cuitjin cojo rë me:

—Suá ri yëjë nandya xi cuacun vë cojo yëjë cjuanchina rë xi ngaye nihñi gobiernu. Cuma suá ri ta, tsëhë xi hatuxa ngahan cafahántsa, hane ha tu yo ni xi meje suá rë ne, suá rë. ⁷Quihndë ne, sá xi cuindove cuiticjexcuin nguehe xi chjehercuin ná ne, cumá tsiji yëjë ni nandya vë.

—Cuatjin xu cachja xitsehan.

⁸Sehe ngajan xi cafayangui xu Jesús cuitjin:

—Xcun xujun rë Nina ne, cuitjin camahindu: “Meje rë xi chjuhunrcun Nina naja, hacuaha suvá ni me vëhë meje rë xi nihñu hacutjin xi meje rë me.” —Cuatjin xu cachja Jesús cjua vëhë.

⁹Hya xi camá ne, xitsehan jan ne, quijicojo xu rë Jesús ngajan Jerusalén, hane quijicani rë me hisca rcu cjin yungun xi matitjun. Sehe cachja xu cojo rë me cuitjin:

—Sá xi Quihndi jain rë Nina ngaye ne, ningatjin yojo riji ndyá hisca nangui. ¹⁰Ha hye ta tsajin mé cuma ri ta xcun xujun rë Nina ne, cuitjin chja:

Nina cuitexa me ángel rë me xi sahmi ri cuidadu.

¹¹Cuahatsjá ri, cojo sa xi hisca ntsacui ne, sacuinhmaain rë cojo ngu ndyojo.

Cuatjin xu cachja xitsehan cjua vëhë.

¹²Hane Jesús ne, cuitjin xu cafayangui me tsëhë xitsehan: —Xujun rë Nina ne, cuitjin chja: “Mijí rë xi chjuhunchuvun Nina naja.”

¹³Hya xi camá ne, xi cajnetaha cafaachuva xitsehan jan Jesús ne, cavetjuxin xu tsëhë me hisca janihya cuya nga.

Cavetsihin cavicuya Jesucristu xuta Galilea

¹⁴Ngajan xi Jesús ne, cojo ngahñu rë Hasen rë Nina ne, quijinduju sa xu me xi cjue me ndava me ngajan distritu Galilea. Hane xi cafehe xu me jan ne, jercu cachja xuta tsëhë me ngajan Galilea cojo jingujyë ni nandya xi siu tahndee rë. ¹⁵Hane quiji me yungun rë jimangu nandya tsëhë Galilea, cavicuya me xuta. Hane yëjë ni xuta jan ne, casahmi jyë casahmi hnga xu me Jesús.

Tacun Jesucristu nandya Nasaret

¹⁶Cavechú ngu nixtin xi quiji xu Jesús ngajan nandya Nasaret hiscan xi camacha me. Hane sacuaha xcusun xi tjin rë me ne, nixtin xi chjahájenda rë ne, quiji xu me

yungun. Sehe quiji casecunvasen me xi cuichjasun xu me xujun rë Nina. ¹⁷Hya xi camá ne, casengui tsja me xujun xi hinchá cjuá rë Nina xi catsihindu profeta Isafás. Hane xi titsixinga xu me xujun jan ne, táha tivanguise me cahndé xi quitahá cjuá xi meje rë me. Hane xi casacu rë me cahndé vëhë ne, sehe cavetsihin cachjasun xu me cjuá vihi xcun xuta:

¹⁸Hasen rë Nina ne, jiya cahntsua xahasen naha,
vëhë xi casuaxa ná Nina xi suá cumachaya rë xuta yuma cjuandajyihi rë me:
catsingatju ná me xi suá cumachaya rë xuta xi hinchá ndavaya ta hatuxa cuma ndaya me,
suá cumachaya rë xuta xi rcá me ta hatuxa cuya cuma tsejen nga rë me;
cuëhëndaya xuta xi jemu choho sahmi jingu sa xuta cojo rë me.

¹⁹Hacuaha suá cumachaya rë xuta xi cavechú nu xi jercu sahmi Nina cjuandaja cojo xuta rë me.

Cuatjin chja cjuá rë xujun xi cachjasun Jesús.

²⁰Hane xi cavuya catsijeyu nga Jesús xujun jan ne, sehe cavuya casua nga me me xi sahmi xá cahntsua yungun jan. Sehe cavéjña Jesús xi cuicuya rë me xuta. Hane yëjë ni xuta xi siu cahntsua yungun jan ne, jercu cavëhërcun me Jesús.

²¹Sehe ngajan xi Jesús ne, cavetsihin cachja me cuitjin cojo xuta:

—Quihndë, jinguyëjë rë xi cavinuhyun cjuá xi camahindu

xcun xujun rë Nina xi cavutaya jan ne, ngajan cavetjucaa cjuá vëhë.
—Cuatjin xu cachja Jesús.

²²Yëjë ni xuta ne, jemu ndaja xu cachja me tsëhë Jesús, hacuaha hisca quijircun rë me tsëhë xi jemu ndaja camahani cjuá xi cachja Jesús. Sehe cachja xuta jan cuitjin:
—iPeru cha vihi xi quihndi rë cha José jan! —Cuatjin xu cachja me.

²³Hane Jesús ne, cuitjin xu cachja me cojo xuta jan:

—Ngahan matsejen ne, ha hvë ta ngayun ne, cuinújun cojo ná cjuá vihi: “Doctor, nircun suvun rë yojo nuju.” Hacuaha cuinújun nga cuitjin: “Xcusun xi camachaya niji xi canihñu ngajan Capernaum matsejen ne, hacuaha nihñu xcusun vëhë nguehe xi nangui nuju.”

²⁴Cuichjá cojo nuju cjuaquixi ta hisca xi ngu profeta matsejen ne, hatuxa macjaain rë xuta nangui rë me tsëhë me. ²⁵Hacuaha ha cjuaquixi ta jemu cjín chjuun cahan xi caviyuju na nguehe Israel hya xi cavéjña profeta Elías hatsëë nixtin. Hacuaha nixtin vëhë matsejen ne, cavaain camahani tsi sacuaha jyan nu vasen, hane jercu jyë camahani jindyá cavéjña jingujyë ni ladu.

²⁶Peru catsingatjiin Nina profeta Elías xi cjue cuisecoo me hisca ngu na cahan xi cuacun vë matsejen ta ngu ni na cahan xi hisca hacuiin na tjë rë Israel na catsingatju Nina profeta xi cuisecoo me na ngajan nandya Sarepta, ladu tsëhë nandya Sidón. ²⁷Hacuaha nguehe Israel matsejen ne, jemu cjín xuta xi yaha rë ngu chíhin vitaha xi setaha yojo naja caviyuju me hya xi cavéjña profeta Eliseo hatsëë nixtin. Peru

hisca xi ngu me xi cuacun vē camandajin me matsejen ta ngu ni Naamán xi hisca hacuiin xuta tjē rē Israel ta xuta Siria me matsejen ne, me vēhē ni xi camandaja me. —Cuatjín xu cachja Jesús.

²⁸Hane yějē ni xuta xi siu xu cahntsua yungun jan ne, hya xi cahndé me cjua xi cachja Jesús jan ne, jemu camacjan rē me. ²⁹Hya xi camá ne, xi caxinchacun xuta jan ne, cavaxēxin xu me Jesús, quijicojo me me hisca ngajan ngu xín tséhē nandya, ngu rcu ndetjún hnga hiscan xi cavéjña nandya rē me, xi meje tsingatjen me Jesús. ³⁰Peru Jesús ne, cavatju xu me ngajñi rē xuta jan quijixin me.

Cha xi jiya xitsehen xahasen rē

³¹Hya xi camá ne, quiji xu Jesús Capernaum, ngu nandya tséhē distritu Galilea. Hane nixtin xi chjahájenda rē ne, quiji xu me yungun cavicuya me xuta. ³²Hane yějē xuta xi siu jan ne, jercu quijircun xu rē me tséhē cjua xi vicuya Jesús ta, tséhē xi cjua xi vicuya me ne, sacuaaha cjua xi chja ngu xi matitjun jain.

³³Hacuaha cahntsua yungun jan ne, tacun xu ngu cha xi jiya xitsehen cahntsua xahasen rē cha. Hane xitsehen jan casahmi xi jercu cajindaya cha cachja cha cuitjín:

³⁴—iJa! ¿Mé má cuatjín ninguisuhunjñu cojo niji ngayun Jesús, xuta Nasaret? ¿Há canduvun xi nicjun niji? Ngahan ne, ha hvē yo ngayun. Ngayun xi hatuxa vinechun tséhē Nina ngayun. —Cuatjín xu casahmi xitsehen xi cachja cha.

³⁵Hya xi camá ne, cuitjín xu cachja Jesús xi cavatēcja me cjua rē xitsehen xi jiya cahntsua xahasen rē cha:

—iJyuu nechin, hacuaha tetjixin tséhē cha vē! —Cuatjín xu cachja Jesús.

Hya xi camá ne, catsiticia xu xitsehen jan cha ngajñi rē xuta, sehe cavetju quiji tséhē xahasen rē cha, peru tsajin camahani mé cavanguihmu rē cha. ³⁶Hya xi camá ne, yějē xuta jan ne, jercu quijircun rē me, hisca cachja xu me ngajñi rē me cojo xicjín me cuitjín:

—¿Mé nga xcusun cjua vihi xi cojo yějē ni ngahñu vitexa rē hisca xitsehen, hacuaha vetjuxin ni? —Cuatjín xu cachja xuta ngajñi rē me cojo xicjín me.

³⁷Hya xi camá ne, jingujyē ni ladu tahndee rē cahndé jan ne, cavitsojo xu cjua xi cachja xuta tséhē Jesús.

Camandaja nahya rē Simón Pedru xi casahmi Jesucristu

³⁸Xi cavetju Jesús tséhē yungun ne, quiji xu me ndava ngu me xi hmí rē Simón. Hane nahya rē Simón ne, jemu hmu xu rē me xi yaha rē me chíhinsuē. Hane yějē xuta rē me ne, cafehya me cojo Jesús xi cuisecoo Jesús nahya rē Simón. ³⁹Hane xi quiji cavutsejenya xu Jesús xcun nahya rē Simón ne, cavatēcja me chíhinsuē xi má rē xuta changá vēhē, hane cavetjuxin xu chíhin jan tséhē me. Hane hora vēhē ni ne, cavisatjenhnga nahya rē Simón cavetsihin cafachacuenda me cjuandaja xi sahmi me cojo yějē ni me xi cafehe jan.

Jemu cjin xutahmu rē camandaja me xi casahmi Jesús

⁴⁰Hane hora xi tivetje tsuhi xu ne, yějē ni xuta xi tjín rē me xutahmu

rë tsêhë tu mé ni xcusun chíhin ne, quijicojo me xutahmu rê jan nixtin hya hiscan tacun Jesús. Hane xi cavisanetsja xu Jesús jima ngu xutahmu rê jan ne, camandaja me. ⁴¹Hacuaha jemu cjín xu xuta xi siu jan cavetjuxin xitsehen xi hinchá rê me. Hane xi cavetju xitsehen jan quiji ne, jercu cachja camahani cuitjin: —iNgayun xi Quihndi jain rê Nina ngayun! —Cuatjin xu cachja xitsehen jan.

Peru cavatécja xu Jesús cjuá xi tichja xitsehen jan, casuaain me cahndé xi cuichja xitsehen ta, tsêhë xi ha vëë xu xitsehen xi me vëhë xi catsingatju Nina me.

Catsuyjihiya Jesucristu cojo cjuandajiyi rê Nina

⁴²Hane xi casahasen jan ne, cavetju xu Jesús quiji me ngajan ngu xín tsêhë nandya. Hane xutacjín jan ne, cuatjin quiji cavanguise xu me Jesús, hane xi cavechú me hiscan tacun Jesús ne, meje tsinguijnehai me Jesús cojo sa xi hacuiin cuetjuxin me tsêhë xuta jan. ⁴³Peru Jesús ne, cuitjin xu cachja me cojo xuta jan:

—Hacuaha sahmi ná ngujyë xi cjué jingu sa cahndé, suá cumachaya rê xuta cjuandajiyi tsêhë gobiernu xi sahmi Nina ta ngatsë rê vëhë xi catsingatju ná Nina. —Cuatjin xu cachja Jesús.

⁴⁴Hane cuatjin xu catsuyjihiya casua me camachaya rê xuta cjuandajiyi vëhë yëjë ni yungun tsêhë ladu vëhë.

Cjuarcun xi casahmi Jesucristu tsêhë chu ti

5 Cuitjin xu camá nga ngu nixtin jan. Jercu cjín

camahani xuta quijitjengui me Jesús xi cuihndë me cjuá rê Nina. Na cavehncun xu me Jesús xi secun me tjehe laguna Genesaret, xi hacuaha hmí rê laguna Galilea. ²Hya xi camá ne, cavëë Jesús jo barcu ngajan tjehe rê laguna jan, hane cha xi tsêhë barcu jan ne, ha cavitujne xu cha tsêhë barcu, hane hinchá vane cha nahya rê cha. ³Hane Jesús ne, quiji cavisehen xu me ngu barcu xi cavëë me jan. Barcu jan ne, tsêhë Simón. Sehe cachja me cojo Simón xi cjucojo me hitsë barcu ngajñi nandá. Hya xi camá ne, quiji cavéjña me sehe cavicuya xu me xutacjín jan tsêhë ngajan ni cahntsua barcu. ⁴Hane xi cajnetaha cavicuya me xuta jan ne, sehe ngajan xi cachja xu me cojo Simón cuitjin:

—Tángunvuhun sa cojo barcu vi hiscan nungun nandá, sehe ngajan ningatjunyun nahya xi chjuhun ti. —Cuatjin xu cachja me.

⁵Sehe ngajan xi cafayangui xu Simón tsêhë Jesús cuitjin:

—Tatá, cuaha nixten tinihñí xá vëhë ne, ndastu mé sacu niyi. Peru sá xi cuatjin nújun ne, cuichjá cojo compañeru naha ne, ningatjinyin nahya. —Cuatjin cafayangui xu Simón.

⁶Hane xi casahmi me cuatjin ne, jercu tu cjín camaha xu ni ti cafaha me, ña meje xtiya nahya rê me.

⁷Hya xi camá ne, casahmitsja xu me cojo xicjin me xi hinchá barcu xingu jan xi cjue cuisecoo xicjin me. Sehe quiji me xi cuacun jan. Hya xi camá ne, catsinguitsë me catsijo barcu cojo ti xi cafaha me jan. Hane xi jercu catsë barcu ne,

ña meje xtyusehen. ⁸Hane xi cavëë Simón Pedru xcusun xi camá jan ne, sehe quiji caticjaxcun me xcun Jesús, sehe cachja xu me cuitjin:

—Tatá. Tángunxun hitsë tsahan ta, ngahan ne, ngu xuta tsehen ngahan. —Cuatjin xu cachja Simón Pedru.

⁹Cuatjin cachja me ta, tsëhë xi jercu quijircun camahani rë me cojo compañeru rë me ngatsë rë ti xi jemu cjin camahani chu cafaha me. ¹⁰Hacuanitjin xu ni quijircun rë yahnga compañeru rë Simón, me xi hmí rë Jacobo cojo Juan, me xi quihndi rë Zebedeo. Sehe ngajan xi Jesús ne, cuitjin xu cachja me cojo Simón:

—Xicarcuun ta quihndë cojo nixtin xi cjuiniji sa vi ne, ngayun cuangun nuvun xuta xi cuisehen me ladu naha ngojo rë xi nuvun chu ti. —Cuatjin xu cachja me.

¹¹Hya xi camá ne, Simón cojo compañeru rë me ne, cavaxëxin xu me barcu jan tsëhë xcun nandá, caviyuju me nangui quixí. Sehe caviyuju me yëjë ni tsëhë me ne, sehe quiji me cojo Jesús.

**Casahmi Jesucristu xi
camandaja cha xi yaha rë
chíhin xi setaha yojo naja**

¹²Cuitjin camá nga xu hya xi casetaha Jesús ngu nandya jan. Cafehe xu ngu cha xi jinguyjë ni yojo rë yaha rë ngu xcusun chíhin vitaha. Hane xi cavëë xu cha Jesús ne, quiji cha caticjaxcun cha xcun Jesús cafehya cha cjuandaja xi sahmi me cojo rë cha, cuitjin xu cachja cha:

—Tatá. Sá xi meje nuju ne, cuma chjuhunxun chíhin xi yaha ná. —Cuatjin xu cachja cha.

¹³Hane xi catsixinga xu Jesús tsja me cavetahatsja me cha ne, cachja me cuitjin:

—Meje ná. Catamandaja ngayun. —Cuatjin xu cachja me.

Hane chíhin jan ne, ngutjen xu ni cavetjuxin. ¹⁴Sehe cavitexa me cha cuitjin:

—Tsajin camahani yo xi cuinújun cojo xcusun vihi. Nihñu sacuatjin cavitexa Moisés xutachanga naja hatsëë nixtin. Tángun ningacun yojo nuju cojo nahmi, sehe tángun chjuhun ngu cjuatjo xi tuhun rë Nina tsëhë xi camandaja ngayun. Cuatjin nihñu cojo sa xi cumatsejen xi camandaja jain ngayun.

—Cuatjin xu cachja me.

¹⁵Peru handasa cuatjin xu cachja Jesús cojo cha ne, hitsë sa jercu cavitsojo cjua tsëhë xcusun xi casahmi me. Hya xi camá ne, jercu tu cjin camahani xuta quijitjengui xu me Jesús xi cuihndë me cjua rë Jesús hacuaha cumandaja me tsëhë chíhin xi ma rë me. ¹⁶Peru Jesús ne, yasen xu ni cavaxëxin me yojo rë me fi me ngajan ngu xín camahani, sahmi me oración rë me cojo Nina.

**Casahmi Jesucristu xi camandaja
cha xi cahme yojo rë**

¹⁷Cuitjin camá nga xu ngu nixtin hya xi tivicuya Jesús xuta. Hacuaha siu xu ngujo cha fariseo cojo ngujo cha xi vicuya cjuachacun xi canduva cha yëjë ni nandya tsëhë distritu Galilea cojo distritu Judea, cojo nandya Jerusalén. Hacuaha jercu yaha Jesús ngahñu rë Nina xi sahmi me xi cumandaja xuta hmu rë. ¹⁸Hya xi camá xu ne, hora vëhë cafehe ngu cha xi cahme yojo

rë, quichahahnga rë cha cojo nijña rë cha. Hane cha xi yahahnga rë cha ne, casahmi cha cjuandya xi cuisehen cha cahntsua ndihya xi cuejña cha cha hmu rë jan hiscan tacun Jesús. ¹⁹Peru xi casacuiin xu rë cha chuva rë hacutjin cuisehen cha ngatsë rë xuta xi jercu quitsë camahani me jan ne, camiji xu cha rcu ndihya, hane cafaxin cha tyjavanitja, sehe catsitujne cha cha hmu rë jan taha rcu ndihya cojo ni nijña rë cha, xi camá cavejña cha cha ngajñi rë xuta hiscan tacun Jesús. ²⁰Hane xi cavëë Jesús xi cuatjin mangucacun cha xi cuacun jan cojo rë me ne, sehe cachja xu me cuitjin cojo cha hmu rë jan:

—Jyé nuju tsan ne, ha camanchataha. —Cuatjin xu cachja me.

²¹Hya xi camá xu ne, cha xi vicuya cjuachacun cojo cha fariseo xi cuacun jan ne, cavetsihin catsingataha cacun cha cachja xu cha cuitjin cojo xicjin cha:

—¿Yo cha xi cuijyih vi xi tsixcuehyu cha Nina? ¡Hatuxa tsajin yo xi cuma tsinchataha jyé rë xuta ta suvá ni Nina xi cuma tsinchataha me! —Cuatjin xu cachja cha cojo xicjin cha.

²²Peru tsëhë xi Jesús ne, ha vëë me mé xi titsingataha cacun cha xi cuacun jan ne, cachja xu me cojo cha cuitjin:

—¿Mé xi tiningatuhuntacún cojo cjuatacun nuju? ²³¿Jarë cjua xi hitsë sa tsaviin xi cuichjá? ¿Há xi: “Jyé nuju ne, ha camanchataha?”, o ¿há xi: “Tisatjunhngun ne, tujyuhunyun?” ²⁴Peru nguehe suá cumachaya nuju xi ngahan xi

Quihndi rë Xuta Jain ngahan ne, yahá xá xi tsinchátaha jyé rë xuta nguehe ngasunhndë.

Sehe ngajan xi cachja xu Jesús cojo cha hmu rë jan:

—Quihndë ne, ngayun tsan ne, tisatjunhngun, chjuhun nijña nuju vë ne, sehe tjangun ndya nuju. —Cuatjin xu cachja Jesús.

²⁵Hya xi camá ne, ngutjen ni cavisatjenhnga xu cha ngajñi rë yëjë ni xuta, sehe cafaha cha nijña rë cha, cafe cha, taha sahmi jyé sahmi hnga cha Nina. ²⁶Hane yëjë ni xuta jan ne, jercu quijircun xu rë me, hacuaha cojo me casahmi jyé casahmi hnga xu me Nina, hisca catsacjun me camá. Hacuaha cachja xu me cuitjin:

—Quihndë cahyan xcusun xi tsajin nixtin xi hyan. —Cuatjin xu cachja me.

Cavaxijin Jesucristu Leví xi hacuaha hmí rë me Mateo

²⁷Hya xi camá xu ne, xi cavetju Jesús jan ne, cavechú me ngu cahndé hiscan xi tacun ngu me xi faha tujúnsa, me xi hmí rë Leví. Sehe cachja xu me cojo me cuitjin: —Nduvun, cuanguen cona. —Cuatjin xu cachja me.

²⁸Hya xi camá ne, Leví jan ne, caviyuju yëjë mé xcusun xi sahmixa me cojo jan ne, sehe cavetju xu me quiji me cojo Jesús.

²⁹Hane xi cavatju vëhë ne, sehe casahmi xu me ngu suhi ngajan ndava me ngatsë rë Jesús. Hacuaha jercu cjín camaha xu ni cha xi faha tujúnsa cojo jingu sa xuta tijinë me niñu cojo Jesús cojo Leví. ³⁰Hane cha fariseo cojo cha xi vicuya

cjuachacun cavetsihin cachjataha xu cha xuta ladu rë Jesús cuitjin: —¿Mé má cuatjin chinu hyun tangun cojo cha xi faha tujúnsa cojo ngujo sa cha xi hacuaha cha tsehen cha? —Cuatjin xu cachjataha cha.

³¹Hane xi cafayangui Jesús tsëhë cha ne, cuitjin xu cachja me:

—Xuta xi hacuiin hmu rë me ne, mijí rë xi cjuahacuenda rë me doctor ta suvá ni xuta xi hmu rë me ne, me vëhë xi meje rë xi cjuahacuenda rë me doctor.

³²Hacuanitjin ná ngahan ta ngahan ne, hacuiin canduvá nguehe xi squindáyavaha rë xuta xi tsajin jyé rë me ta xi canduvá ne, xi squindáyavaha rë xuta tsehen. Cuichjá cojo rë me xi tsindeya me cjuatacun rë me. —Cuatjin xu cachja me.

Mé tsëhë xi casahmii Jesucristu cojo xuta rë me xun rë me

³³Ngajan xi cha fariseo cojo cha xi vicuya cjuachacun ne, cachja xu cha cuitjin cojo Jesús:

—Yëjë xuta ladu rë Juan ne, yasen ni sahmi me xun rë me hacuaha sahmi me oración rë me cojo Nina. Hacuanitjin ni yëjë xuta ladu rë cha fariseo. Peru xuta ladu nuju ne, jinë jihvi me. —Cuatjin xu cachja cha.

³⁴Ngajan xi Jesús ne, cuitjin xu cachja me cojo cha:

—Cumaji xi xuta rë cha xi tivixan ne, sahmi me xun rë me jinguyëjë rë xi cha xi tivixan ne, tacun cha cojo rë me. ³⁵Peru cuechú nixtin xi cha xi tivixan chjaháxin rë cha tsëhë xuta rë cha ne, hya sahmi me xun rë me. —Cuatjin xu cachja Jesús.

³⁶Hacuaha cachja nga xu me ngu ejemplu vihi cojo cha xi cuacun jan:

—Tsajin yo xi cuicheya ngu rquí tsjian xatsë sehe cueyaco cojo ngu tsjian changá ta sá xi cuatjin sahmi me ne, tsjian xatsë jan ne, tsinguetsun me. Hacuaha cumatanguaain ngu rquí tsjian xatsë cojo tsjian changá jan.

³⁷Hacuaha tsajin yo xi cuincha xan xatsë cahntsua chuxin changá ta sá xi cuatjin sahmi ne, xan xatsë jan ne, tsitsinga rë chuxin jan. Hane cjuë cuixu xan, hacuaha chuxin jan ne, cuetsun. ³⁸Xi meje rë ne, xan xatsë ne, xincha cahntsua chuxin xatsë. ³⁹Hacuaha ngu xuta xi ha cahvi me xan changá ne, ha quihndë mijí cuihi me xan xatsë, tsëhë xi chja me ta xan changá ne, vëhë xi ndaja hyun. —Cuatjin xu cachja Jesús.

Cavotoho xuta ladu rë Jesucristu trigu nixtin xi chjahájenda rë

6 Hacuaha cuitjin camá nga xu ngu nixtin xi chjahájenda rë. Hya xi tivatju xu Jesús cojo xuta ladu rë me hiscan tjin tjë trigu ne, cavotohosun xuta ladu rë me tsë tsë trigu jan, sehe catsufëtsja me, sehe cajinë me. ²Sehe ngajan xi ngujo cha fariseo xi cojo cjuí jan ne, cachjataha xu cha me cuitjin:

—¿Mé má cuatjin tisahmi xuta ladu nuju xá, handasa chja ley naja xi tsajin cahndé xi nihña xá nixtin xi chjahájenda rë? —Cuatjin xu cachja cha.

³Ngajan xi Jesús ne, cuitjin xu cafayangui me tsëhë cha:

—Ngayun ne, ha cachutayun xcusun xi casahmi xutachanga naja

David hatsëë nixtin. Hya xi jercu camavojo rë me cojo xuta xi siu cojo me ne, ⁴cavisehen me ndava Nina, hane cafaha me pan xi viyuju xcun Nina xi tsajin cahndé xi tu yo ni siné ta suvá ni nahmi xi cuma siné me. Peru me vëhë ne, cajinë me hacuaha casua me cajinë xuta xi siu cojo rë me.

⁵Hacuaha cachja sa Jesús cuitjin: —Ngahan xi Quihndi rë Xuta Jain ngahan ne, ngahan xi vitéxa mé xi cuma nixtin xi chjahájenda rë. —Cuatjin xu cachja Jesús.

Casahmi Jesucristu xi camandaja cha xi quixíhñu ngu tsja

⁶Cuitjin camá nga xu ngu nixtin xi chjahájenda rë. Quiji Jesús yungun ne, cavicuya me. Hane tacun xu ngu cha cahntsua yungun jan xi quixíhñu tsja quixi cha. ⁷Hane cha xi vicuya cjuachacun cojo cha fariseo xu ne, siu tifahachuva xu ni cha Jesús, źhá sahmi me xi cumandaja xuta nixtin xi chjahájenda rë?, cojo sa xi cuma cuinchajyë cha me tsëhë xi sahmi me xá nixtin xi chjahájenda rë. ⁸Peru Jesús ne, ha vëë me mé xi tsingataha cacun cha xi cuacun jan. Sehe cachja xu me cojo cha xi quixíhñu tsja jan cuitjin:

—Tisatjunhngun, hane tisechun nguehe cavasencja. —Cuatjin xu cachja Jesús.

Hane sehe cavisatjehnga xu cha caviseacun cha. ⁹Sehe ngajan xi cachja xu Jesús cojo cha xi cuacun jan cuitjin:

—Sahme nuju ngu cjuachjinenguise vihi: Nixtin xi chjahájenda rë ne, źmé xi sua

cahndé ley xi nihña?, źhá xi cjuandaja ne?, o źhá xi cjuatsehen? źHá xi naxentjeen cjuahñu rë xingueen ne?, o źhá xi nicjeen? —Cuatjin xu cachja Jesús.

¹⁰Xi cavutsejen Jesús xuta jingujyë ni tahndee rë me ne, sehe cachja xu me cojo cha xi hmu tsja jan cuitjin:

—Nixingun ntsun. —Cuatjin xu cachja me.

Hane cuatjin casahmi cha. Hane tsja cha ne, ha camandaja xu sacuatjin xi jyihi titjún. ¹¹Hya xi camá ne, cha xi cuacun jan ne, jemu camacjan camaha xu ni rë cha, hisca cachja cha ngajñi rë cha cojo xicjin cha mé xi ndatjin sahmi xu cha cojo Jesús.

Cavaxijin Jesucristu tejó me xi cuma apóstol

¹²Hacuaha cuitjin camá nga xu ngu nixtin nixtin xi cuacun vë. Cavetju Jesús quiji xu me ngu ndetjún xi sahmi me oración, hane ngajan cavéjña me cuaha nixten sahmi me oración rë me cojo Nina. ¹³Hane xi casahasen ne, cajindayavaha xu me xuta ladu rë me, hane ngajñi rë xuta xi cuacun vë ne, cavaxijinñi xu me tejó xihin. Hane me xi tejó vëhë ne, me vëhë xu xi cachja Jesús tsëhë me apóstol. ¹⁴Me xi cuicun vi xi tejó me xi cavaxijin Jesús: Simón, me xi hacuaha casuañihi me me Pedru, cojo Andrés hntsë Simón, Jacobo cojo Juan, Felipe cojo Bartolomé, ¹⁵Mateo cojo Tomás, Jacobo quihndi rë Alfeo cojo Simón, me xi tsëhë partidu zelota, ¹⁶Judas xuta rë Jacobo cojo Judas Iscariote, me xi sahmi entregadu rë Jesús.

**Cafahacuenda Jesucristu
jemu cjín xuta**

¹⁷Hane xi cavuya canduvajne xu Jesús tséhë naxi jan cojo xuta ladu rë me jan ne, xi cafehe xu me ngu ngasun ne, ngajan caxinchacunhñu xu me cojo xuta jan. Hacuaha jercu cjín sa xuta ladu rë me xi siuya jan, siuya tangun cojo jemu cjín camaha xu ni xuta tséhë nandya Jerusalén cojo tséhë yëjë sa nación Israel, hisca cojo xu xuta xi nduva tséhë nandya Tiro cojo Sidón, xi siu ladu tséhë tjehe ndachacun.

¹⁸Yahnga xu xuta xi cuacun vë ne, canduva me xi meje cuisñuju me cjua rë Jesús, hacuaha yahnga nga me ne, canduva me xi meje rë me xi cumandaja me tséhë chíhin xi yaha rë me. Hacuaha me xi jemu tivatju cjuañihi xi hincha xitsehe cahntsua xahasen rë me ne, hacuaha camandaja xu me. ¹⁹Yëjë ni xutacjín jan ne, cavanguise me chuva rë xi satëtsja me Jesús ta, tséhë xi Jesús ne, jemu tjin rë me ngahñu rë Nina, hane ngahñu vëhë tisahmi xi mandaja xu yëjë xuta hmu rë.

**Xuta xi ndaja tséhë cojo
xuta xi chojyihí tséhë**

²⁰Ngajan xi ngaxtun vëhë xu ne, cavutsejen Jesús xuta ladu rë me, sehe cachja xu me cojo cuitjin:
—Jemu ndaja tsujun ngayun xi yumu matsejen ta, tséhë xi ngayun matsejen ne, satë nuju gobiernu xi sahmi Nina.

²¹Jemu ndaja tsujun ngayun xi vojo nuju quihndë matsejen ta, tséhë xi cuechú nixtin xi jemu chuya rë xahasen nuju.

Jemu ndaja tsujun ngayun xi tichjihndun quihndë matsejen ta, tséhë xi cuechú nixtin xi cuéjnu.

²²Hacuaha jemu ndaja tsujun ngayun hya xi choho scuëë nuju xuta, o hya xi cuaxëxin nuju me tséhë ngajñi rë me, o hya xi choho cuichja me cojo nuju, o hya xi tsitjungui nuju me, ngatsë rë xi tjin tangun cjuatacun nuju cojo ná ngahan xi Quihndi rë Xuta Jain ngahan. ²³Hisca chijihngun xi ndama nuju xi cuatjin tivatjun tijima nixtin hya matsejen ta, tséhë xi jemu jyë ngu cjuandaja xi tacunya nuju ngajan ngahnga. Jemu ndaja tsujun matsejen ta, tséhë xi cuanitjin ni choho casahmi xutachanga naja cojo profeta hatsëë nixtin, hane jemu cachuya rë Nina tséhë profeta xi cuacun vë.

²⁴Peru jemu chojyihí tsujun ngayun xi nchina ngayun matsejen ta, tséhë xi ha casacu nuju cjuetacun xi cuma nuju.

²⁵Jemu chojyihí tsujun ngayun xi ha jemu chuya rë xahasen nuju quihndë matsejen ta, tséhë xi cuechú nixtin xi cuma vojo nuju.

Jemu chojyihí tsujun ngayun xi tivéjnu quihndë matsejen ta, tséhë xi cuechú nixtin xi jercu chjihndun xi cuma va rë xahasen nuju.

²⁶Hacuaha jemu chojyihí tsujun ngayun hya xi ndaja cuichja yëjë xuta tsujun matsejen ta, tséhë xi cuanitjin ni ndaja casahmi xutachanga naja cojo profeta ndacha hatsëë nixtin, hane profeta ndacha xi cuacun vë ne, cachuyiin rë Nina tséhë me.

Meje rë xi nihmu tacun condra naja

²⁷Peru ngayun xi tinuhyun xi chjá matsejen ne, cuichjá cojo nuju

cuitjin: Nihmutacún xuta xi má condra nuju, ndaja nihñu cojo xuta xi choho vëë nuju me, ²⁸chjahyun rë Nina cjuandaja xi cuma rë xuta xi fehya rë me Nina cjuahngatacun xi cuatjun cuma. Ngajñi rë oración nuju matsejen ne, chjahyun rë Nina cjuandaja xi cuma rë xuta xi vangui nuju me si. ²⁹Yo xi vajaya ngu ladu tsa nuju matsejen ne, nicuyun sa ngu ladu catajaya. Yo xi fahatahá chingá nuju matsejen ne, xicanichuun rë hisca chingá ngahma nuju. ³⁰Yëjë ni xuta xi fehya nuju me mé xi fehya nuju me matsejen ne, tuhun rë me. Yo xi fahatahá mé xi fahatahá tsuhun matsejen ne, xicanujuun xi tsicuya nga me. ³¹Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rë me.

³²Tsajin yo sua nacuechji nuju tsëhë xi hmutacún xuta xi hmucacun nuju me matsejen ta, tsëhë xi hacuaha hisca xuta tsehen matsejen ne, hmucacun me xuta xi hmucacun rë me. ³³Hacuaha tsajin yo sua nacuechji nuju tsëhë xi ndaja nihñu cojo xuta xi ndaja sahmi me cojo nuju matsejen ta, tsëhë xi hacuaha hisca xuta tsehen matsejen ne, hacuanitjin ni sahmi me. ³⁴Hacuaha tsajin yo sua nacuechji nuju tsëhë xi tuhun vuxetaha xuta xi vetuhun tacún xi ngascan matsejen ne, sua me nuxetuhun matsejen ta, tsëhë xi hacuaha hisca xuta tsehen matsejen ne, sua me vuxetaha xicjin me, cojo sa xi cuya cjuahatsja nga me chuva vëhë ni. ³⁵Cúya cuichjá nga cojo nuju, nihmutacún xuta xi má

condra nuju. Ndaja nihñu, hacuaha tuhun tuxetaha rë, peru xicavetuun tacún xi cuya chjuhunntsun nga. Sá xi cuatjin nihñu matsejen ne, jemu jyë cjuandaja xi sua nuju Nina ngascan, hane cjuandaja xi nihñu ngayun matsejen ne, tangun cojo cjuandaja xi sahmi Nina matsejen ta, tsëhë xi me vëhë matsejen ne, hatuxa jemu ndaja me cojo xuta tsehen xi hisca nacuechji rë Nina suaain me. ³⁶Meje rë xi tjin nuju cjuayumatacun sacuatjin tjin rë Nina Nahmi naja cjuayumatacun.

Mijí rë xi nichuvan jingu sa xuta cojo cjuatacun rë me

³⁷Hacuiin nichuvun jingu sa xuta cojo cjuatacun rë me, sehe hacuiin tsichuva Nina ngayun. Hacuiin ninguijün jyë rë jingu sa xuta, sehe hacuiin tsinguixi Nina jyë nuju. Ninchatuhun rë jingu sa xuta matsejen ne, sehe hacuaha tsinchataha nuju Nina. ³⁸Tuhun rë jingu sa xuta matsejen ne, sehe hacuaha sua nuju Nina. Sua nuju me chuva xi cjuaquixi, hisca tsuquihine me, hisca tsiniyaya me chuva rë, hacuaha hisca xotje rë chuva xi sua nuju me. Cuatjin nihñu matsejen ta, tsëhë xi chuva xi nichuvun matsejen ne, hacuaha chuva vëhë tsichuva Nina xi sua nuju me. —Cuatjin xu cachja Jesús cojo xuta ladu rë me.

³⁹Hya xi camá ne, cachja sa xu me ngu ejemplu cuitjin:

—Ngu cha rcá matsejen ne, cumaji cjuecani cha ngu nga cha rcá matsejen ta, sá xi cuatjin matsejen ne, catsijo ni cha cuixuya cha xanga. ⁴⁰Ngu cha xi sehe

tivutaya matsejen ne, hacuiin hitsé sa vengui chjí rē cha xi cuma rē maestru rē cha matsejen ta hya xi ha ndaja cavutaya cha yějē ni matsejen ne, sehe ngajan xi cuechútáha cjuatacun rē cha sacuaaha cjuatacun rē maestru rē cha.

⁴¹¿Hacutjin má xi matsejen nuju xtē xi jiya tuxcun xingun, hane machayiin nuju tsēhē yasin xi jiya túxcun suvun ni? ⁴²¿Hacutjin má xi cuma cuinújun cojo xingun xi meje naxun xtē xi jiya tuxcun me jinguyējē rē xi suvun matsejen ne, matsijin nuju yasin xi jiya túxcun vē ni? Ngayun xuta ndacha, naxun titjun yasin xi jiya túxcun vē, sehe cumatsejenndaja nuju xtē xi jiya tuxcun xingun cojo sa xi cuma naxun.

Tsejen mé xcusun xuta me ngatsé ni rē cjua xi chja me

⁴³Ha hyan matsejen ta tsajin hisca xi ngu yatjē xi ya ndaja xi sua tú xi ndajin, hacuaha tsajin hisca xi ngu ya xi ya machjiriin xi sua tú xi ndaja matsejen ta, ⁴⁴jima ngu ya ne, cuma tsejen sá xi ndaja o sá xi ndajin ngatsé rē tú xi sua. Hatuxa sacuiin naja tú xi hmí higo rcu ngu yanahyálatu, hacuaha sacuiin naja uva rcu ngu yanahyátindu. ⁴⁵Cuanitjin ni rē xuta matsejen ta sacuaaha xuta ndaja matsejen ne, tsēhē cjuandaja xi tetjo rē me cahntsua xahasen rē me cojo cahntsua cjuatacun rē me matsejen ne, tsēhē ngajan vetju cjuandaja. Peru xuta tsehen matsejen ne, tsēhē cjuatsehen xi tetjo rē me matsejen ne, tsēhē ngajan vetju cjuatsehen.

Cuatjin matsejen ta, tsēhē xi yějē ni xuta ne, cjua xi quitsé rē xahasen rē me cojo cjuatacun rē me matsejen ne, vēhē cjua xi vetju hntsua me.

Ejemplu tsēhē jo ndihya

⁴⁶Yasen ni nújun xi nai nuju ngahan, peru ¿mé má nihñuu sacuatjin xi chjá cojo nuju ni? ⁴⁷Yahnga ngayun xi nduvuntjengun ná hacuaha visiñuju cjua naha hacuaha nihñu sacuatjin chjá cojo nuju matsejen ne, nguehe cuichjá cojo nuju yo xi tangun ngayun cojo: ⁴⁸tangun ngayun cojo ngu cha xi hya xi casahmi cha ngu ndihya matsejen ne, ndaja nungun cafangui cha, sehe ngajan cavejña cha xihndēnaña rē hisca xcun ndyojohñu. Hane hya xi camajyē ndajyē hacuaha casesuntē nandá matsejen ne, jercu hñu catsivaha rē ndihya jan, peru hisca catsiniyaain rē, tsēhē xi jemu ndatjin casecun. ⁴⁹Peru yahnga nga ngayun xi visiñuju cjua naha peru nihñuu sacuatjin xi chjá matsejen ne, tangun ngayun cojo ngu cha xi casahmi ngu ndihya suvá xcun nangui ni, xi tsajin xihndēnaña rē. Hane hya xi camá ne, xi camajyē ndajyē matsejen ne, catsivaha rē ndihya jan, hane ngutjen ni caticja. Hane cavetsun camahani ndihya vēhē. Cuatjin xu cajnetaha cavicuya Jesús.

Casahmi Jesucristu xi camandaja hndixahan rē capitán xi vitexa me ngu cientu sindadu

7 Xi cajnetaha xu cachja Jesús yějē ni cjua xi meje cuichja me cojo xuta ne, sehe cavuya quiiji

nga me nandya Capernaum. ²Hane nandya jan ne, ngajan xu tacun ngu capitán xi tjin rë me ngu hndixahan xi cavatsë me xi jiñahmú, ha ña meje cueya camaha xu ni. Capitán jan ne, jemu hmucacun xu me hndixahan jan. ³Hane xi camachaya xu rë capitán jan xi tacun Jesús ne, catsingatju xu me ngujo xuta changá rë xuta tjë rë Israel xi quiji cachja me cojo Jesús xi cjue sahmi me xi cumandaja hndixahan rë capitán jan. ⁴Hane xi cafehe xuta changá jan hiscan tacun Jesús ne, nguñaja camahani cacun me cafehya me xi cjue xu Jesús. Cachja me cuitjin:

—Nihñu favor ne, tiseacun rë capitán hitsë ta, tsëhë xi jemu ndaja me. ⁵Handasa hisca hacuiin tjë rë xutachanga naja me ne, peru jemu hmucacun me ngayaan xuta tjë rë Israel, hacuaha casahmi me yungun niji cojo ngahñu rë suva me. —Cuatjin xu cachja xuta changá jan.

⁶Hya xi camá ne, quiji xu Jesús cojo rë me. Hane xi ha jima tiñataha me ne, sehe catsingatju xu capitán ngujo xuta ndaja rë me xi quijijtjengui me Jesús. Hane xi cavechútaha xu me Jesús ngajan ndiya ne, cuitjin cachja me sacuatjin cachja capitán cojo rë me xi cuichja me cojo Jesús:

—Tatá. Xicatumhundyuun yojo nuju. Ngahan ne, vechiin chuva rë xi ngayun cuinduvun ndya naha ta, tsëhë xi ngayun xi jemu jyë hnga ngayun cojo cjuatacun nuju. ⁷Vëhë xi hacuaha tsingátaha cacun xi jemu chúva ngahan cojo cjuatacun naha xi cjué cuichjá cojo nuju. Quihndë ne, ndastu nihñu

favor ne, tinújun xi cumandaja hndixahan naha. ⁸Ngahan ne, hvë xi cuma nihñu xcusun vëhë ta, ngahan ne, hacuaha tjin xuta xi matitjun tsahan, hane hacuaha tjin ná sindadu xi siu ngahma gobiernu naha xi sahmi hacutjin xi meje ná. Hya xi chjá cojo ngu xi cjue ne, fi. Hacuaha hya xi chjá cojo ngu nga xi cuinduva ne, nduva. Hane hndixahan naha ne, xi chjá cojo xi sahmi mé xi meje ná ne, sahmi. —Cuatjin xu cachja xuta ndaja rë capitán jan cjua rë capitán cojo Jesús.

⁹Hane xi cahndë xu Jesús cjua vëhë ne, jemu quijircun rë me tsëhë capitán jan. Hane xi cavuya me cavutsejen me xutacjín xi tjengui rë me jan ne, cachja xu me cuitjin:

—Cuichjá cojo nuju ta, ngajñi naja ngayejen ni ngayaan xuta tjë rë Israel ne, cjëë scuëë ngu xuta xi cuatjin ndaja mangucacun me cojo ná. —Cuatjin xu cachja Jesús.

¹⁰Hane xi cavuya xu me xi quiji tixa jan ne, cavëë me xi ha camandaja cha hndixahan jan.

Casahmi Jesucristu xi cavuya ngu nima cjuahñu

¹¹Xi cavatju vëhë ne, quiji nga xu Jesús ngu nandya xi hmí rë Naín. Cavisecoo xuta ladu rë me me quiji me, cojo jingu sa xutacjín xi cojo me quiji me. ¹²Hane xi tijima tiña xu me tsëhë tingotjo hnchua tsëhë nandya jan ne, cjuí seyaniji xu ngu nima, ngu nima xi quihndi ngu tsëhë naa rë. Hacuaha naa rë nima jan ne, cahan xu me. Jercu cjín camahani xuta nandya visecoo me chjuun jan cjuí me. ¹³Hane xi

cavëë xu Nai naja chjuun jan ne, camayuma rë me me. Sehe cachja me cojo chjuun jan cuitjin:

—Ha quihndë xicachjihnduun.

—Cuatjin xu cachja me.

¹⁴Hane xi quiji tiña xu Jesús hiscan xi cjuu me cojo nima jan ne, sehe quiji cavetahatsja xu me nachan xi quisun nima jan. Hane xuta xi yahahnga rë nima jan ne, caxinchacunhñu me. Sehe ngajan xi Jesús ne, cachja xu me cuitjin:

—Quihndë ne, ngayun tsan ne, tísatjunhngun. —Cuatjin xu cachja me.

¹⁵Hane nima jan ne, cavisatjenhnga xu cha cavéjña cha. Sehe cavetsihin cachja cha. Sehe cachja Jesús cojo naa rë cha jan xi cjuahatsja nga me quihndi rë me.

¹⁶Hya xi camá xu ne, yëjë ni xuta jan ne, jemu catsacjun me camá. Hacuaha casahmi jyë casahmi hnga me Nina, cuitjin xu cachja me:

—Cavetjújñi ngájñi naja ngu profeta xi jercu vengui chji rë me, hacuaha casahmi Nina cjuandaja rë me cojo naja ngayaan xuta rë me. —Cuatjin xu casahmi jyë casahmi hnga me Nina.

¹⁷Hya xi camá ne, cavitsojo xu cjuu vëhë tsëhë Jesús jingujyë ni ladu vëhë cojo jingujyë ni nación Israel.

Cavinenguise Juan Jesucristu, ¿há me vëhë xi catsingatju Nina me?

¹⁸Cuitjin xu camá nixtin xi cuacun vë. Xuta ladu rë Juan ne, casua me camachaya rë me yëjë xcusun xi casahmi Jesús. Sehe ngajan xi Juan ne, cajindaya xu me jo xuta ladu rë me jan ne,

¹⁹sehe catsingatju me me xi cjuu cjuinenguise xu me Nai naja sá xi me vëhë xi chja xujun rë Nina xi tsingatju Nina me, o sá xi meje rë xi cuiyujuya rë xi cuinduva nga ngu.

²⁰Hane xi cafehe xuta xi catsingatju Juan jan hiscan quitahá Jesús ne, cachja xu me cuitjin:

—Juan Vitenda rë Xuta ne, catsingatju niji me xi nduvin vinenguisin nuju ¿há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin xu cavinenguise xuta xi catsingatju Juan jan.

²¹Hane ha hora vëhë ni ne, Jesús ne, casahmi me xi jemu cjin xu xuta camandaja me tsëhë tu mé ni xcusun chíhin xi má rë me. Hacuaha jemu cjin sa xuta xi cavaxëxin Jesús xitsehen xi hinchu cahntsua xahasen rë. Hacuaha jemu cjin sa xu xuta rcá xi casahmi Jesús xi camá camatsejen rë me. ²²Hya xi camá ne, xi catsicuya me cjuu cojo xuta ladu rë Juan ne, cuitjin xu cachja me:

—Tjangun ne, sehe tinújun cojo Juan yëjë xcusun xi cahyun cojo yëjë cjuu xi canuhyun. Tinújun ta xuta rcá ne, camá camatsejen rë me; xuta rengun ne, camá quijindaja me; xuta xi yaha rë chíhin vitaha xi setaha yojo naja ne, camandaja me; xuta xi loho me ne, camá cahndë me; nima ne, cavuya nga cjuahñu; xuta yuma ne, casacu camachaya rë me cjuandajyihí rë Nina. ²³Hacuaha jemu ndaja tsëhë tu yo ni xuta xi hacuicun tsismicacun me xi mangu cacun me cojo ná. —Cuatjin xu cachja Jesús.

²⁴Hane hya xi cavuya cafe xu xuta ladu rë Juan jan ne, sehe

cachja Jesús cojo xutacjín jan cuitjin tséhë Juan:

—Hya xi cavetjun catsangun ngajan ngu xín tséhë nandya catsanguntjengun Juan matsejen ne, ¿há caningatuhuntacún xi cuechuntuhun ngu xihin xi hacuiin ngu ni cjuatacun rë me?, sacuatjin rë ngu ndeje xi fi nguehe fi ngajan rcu sacuatjin cjui tjo. ²⁵O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajyihí camahani? Hacuiin cuatjin. Ha hyan matsejen ta xuta xi jercu tu ndacun camahani tsjian vaja me hacuaha hatuxa jemu cjuasua siu me matsejen ne, sacuiin naja me ngajan ngu xín camaha ni tséhë nandya matsejen ta hiscan xi sacu naja me ne, ndava ngu xuta nchina. ²⁶Peru ngayun matsejen ne, catsangun cachutsujun ngu profeta. Hacuaha cjuaquixi xi vëhë cachutsujun. Peru profeta Juan vë matsejen ne, hitsë sa vengui chji rë me xi cuma rë yëjë sa profeta xi yahnga. ²⁷Hacuaha me vëhë xi cachja Nina tséhë me xcun xujun rë me cuitjin:

Ngahan ne, tsingátju titjun ngu cha
xi scuxaha cjuatacun rë xuta
tséhë xi cjuehé gaye.

Cuatjin cachja Nina cojo Quihndi rë me. ²⁸Cuichjá cojo nuju matsejen ta ngajñi rë yëjë xuta xi catsin me tséhë naa rë me matsejen ne, tsajin ngu xi hitsë sa vengui chji rë xi cuma rë Juan. Peru hya xi cuetsihin Nina sahmi me gobiernu nguehe ngasunhdë matsejen ne, xuta xi chuva cuengui chji rë me quihndë

matsejen ne, hitsë sa cuengui chji rë me nixtin hya, xi cuma rë xi ha vengui chji rë Juan quihndë.

²⁹Hane hya xi yëjë ni xuta hisca cojo cha xi faha tujúnsa cahndë me cjua xi cachja Juan matsejen ne, catsingatihin me xi cuitenda Juan me. Hane chuva vëhë matsejen ne, catsingacun me xi macjain rë me xi Nina matsejen ne, yëjë xcusun xi sahmi me matsejen ne, hatuxa cjuaquixindaja jain. ³⁰Peru jemu cjín cha fariseo cojo cha vicuya cjuachacun matsejen ne, catsingatiin cha xi cuitenda Juan cha. Hane chuva vëhë matsejen ne, catsitjungui cha xcusun xi meje sahmi Nina xi cuma tséhë cha.

³¹'Ngayun xuta tjë rë Israel tséhë nixtin vihi matsejen ne, ¿mé xi tangun ngayun cojo? ³²Tangun ngayun cojo langa xi siu ngajan ndetsin, xi jindaya xicjin cojo cjua vihi: “Canijani tsujun ne, mijí xtun; casin va ne, mijí chjihndun.” Cuatjin jindaya langa. ³³Cuatjin chjá cojo nuju matsejen ta, Juan xi vitenda nuju ngayun matsejen ne, jinii me niñu hacuaha hviin me xan, hane ngayun nújun ta jiya xitsehen xahasen rë me. ³⁴Hane ngahan xi Quihndi rë Xuta Jain matsejen ne, jínë hacuaha hvë, hane nújun xi ngahan matsejen ne, ngu cha cahntsuaníñu ngahan, ngu cha cahntsuxan ngahan, hacuaha ngu cha amigu rë cha xi faha tujúnsa cojo jingu sa xuta tsehen ngahan. ³⁵Peru xuta xi fitjengui me cjuatacun rë Nina matsejen ne, xuta xi cuacun vëhë xi tsingacun naja me xi cjuatacun vëhë matsejen ne, ndaja jain. —Cuatjin xu

catsinguijnetaha Jesús cjuá rë me cojo xuta.

**Catsinchataha Jesucristu
ngu chjuun tsehen**

³⁶Ngu nixtin nga jan ne, cuitjin xu camá. Ngu cha fariseo ne, cachja xu cha cojo Jesús xi cjue sinë me cojo cha niñu ndava cha. Hane xi cavisehen me ndava cha fariseo jan ne, sehe quiji cafaha xu me cahndé rë me xcun maxë xi sinë me niñu.

³⁷Ngajan xi ngu chjuun tsehen tsëhë nandya vëhë ne, camachaya xu rë na xi Jesús ne, tacun me ndava ngu cha fariseo tijinë me niñu cojo cha ne, yaha xu na ngu frascu xi ndyojo camá, hincha ngu xcusun aceite ndaja xi jercu hnga chji rë. ³⁸Quiji xu na secun na táha ntsacu me, jihnda na. Hane cojo ndatuxcun na ne, cavetsihin catsicahnchi xu na ntsacu me. Hane cojo tsjarcu na ne, cavujnu na, sehe cavitatsuha na. Hya xi camá xu ne, sehe cavitejnu na aceite. ³⁹Peru xi cavëë xu cha fariseo xi quijicojo rë me jan xi cuatjin casahmi na ne, catsingataha cacun cha cuitjin: “Cha xi cuijyihí vihi ne, sá xi profeta jain cha ne, ha vëë cha mé xcusun chjuun na xi cuatjin satëtsja rë cha ta, tsëhë xi na vëhë ne, ngu chjuun tsehen na.” Cuatjin catsingataha cacun xu cha. ⁴⁰Sehe ngajan xi Jesús ne, catsicuya xu me cjuá tsëhë cjuatacun xi catsingataha cacun cha fariseo jan, cuitjin xu cachja me:

—Simón, tjin ná ngujo cjuá xi cuichjá cojo nuju. —Cuatjin xu cachja me.

Ngajan xi cha Simón jan ne, cuitjin xu cafayangui cha tsëhë me:

—Maestro, tinújun. —Cuatjin xu cachja cha.

⁴¹Hya xi camá xu ne, cachja Jesús cuitjin cojo cha ngu ejemplu: —Cuejña ne xi jo cha jan ne, quitjen cha tujún tsëhë ngu cha nchina. Ngu cha ne, quitjen cha tujún tsëhë hñu cientu nixtin xi sahmi ngu mosu xá. Hane ngu nga cha ne, quitjen cha tujún tsëhë yachan të nixtin. ⁴²Hane xi tsajin rë cha xi cuacun vë tujún xi sahmingojo cha ne, cha nchina jan ne, catsinchataha cha catsijo cha. ¿Jarë cha xi cuicun vi xi hitsë sa tsihmu cacun cha cha nchina jan, xi má nuju? —Cuatjin xu cachja me.

⁴³Sehe ngajan xi cafayangui xu cha Simón cuitjin:

—Xi má ná ne, cha xi hitsë sa cjin quitjen. —Cuatjin xu cachja cha Simón.

Sehe ngajan xi cachja xu Jesús cojo cha cuitjin:

—Jemu ndaja canichuvun cjuá xi canújun. —Cuatjin xu cachja Jesús.

⁴⁴Hane xi cavuya xu me cavutsejen me chjuun jan ne, sehe cachja nga me cojo cha Simón cuitjin:

—Chutsujun hacutjin casahmi chjuun vihi cojo ná. Ngayun ne, hora xi cavisehen ndya nuju ne, catuun nandá xi cjuengui ntsacú. Peru chjuun vihi ne, cojo ndatuxcun na catsicahnchi na ntsacú, hane cojo tsjarcu na ne, cavujnu na. ⁴⁵Hacuaha ngayun ne, cavitatsun ná. Peru na vihi ne, hisca hora xi cavisehen ne, cjëë cuejñaxin na xi vitatsuha na ntsacú. ⁴⁶Ngayun ne, cavitejnuu aceite rcú. Peru chjuun vihi ne,

cavitejnu na aceite ntsacú, aceite xi jemu ndaja jne camahani. ⁴⁷Vêhë xi cuichjá cojo nuju ta tsejen xi ha camanchataha na tsêhë jyé cjin xi tjin rê na ta, tsêhë xi jemu tjin rê na cjuahmutacun. Peru yo xi manchataha tsêhë hitsë jyé xi tjin rê ne, hacuaha chúva cjuahmutacun tjin rê. —Cuatjin xu cachja Jesús.

⁴⁸Ngajan xi cachja xu Jesús cojo chjuun jan cuitjin:

—Jyé nuju ne, ha camanchataha.

—Cuatjin xu cachja me.

⁴⁹Hane xuta xi tijinë xu cojo rê me jan ne, cavetsihin cavinenguise me ngajñi rê me cojo xicjin me cuitjin:

—¿Yo rê cha xi cuijyihí vi xi hisca jyé rê xuta tsinchataha cha?

—Cuatjin xu cachja me.

⁵⁰Peru Jesús ne, cachja nga xu me cojo rê chjuun jan cuitjin:

—Ngayun ne, ha cavetjuntjun ta, tsêhë xi camangutacún cojo ná. Cuma cuangun cojo cjuasua.

—Cuatjin xu cachja me.

Yachjin xi cafachacuenda rê Jesucristu

8 Cuitjin camá nga xu ngu nixtin. Jesús ne, titsujyihiya xu me jemu cjin nandya cojo ranchun tisua me tijimachaya rê xuta cjuandajyihí xi chja tsêhë gobiernu xi sahmi Nina. Hacuaha cojo tejó xuta ladu rê me jan cavisecoo xu rê me. ²Hacuaha cojo sa ngujo yachjin xi cavetju xitsehen xi hincha xahasen rê me hacuaha camandaja me tsêhë chíhin xi má rê me ne, cojo xu me quiji me. María, na xi hacuaha hmí rê na Mágdala, ngu chjuun xi cavetju

yatu xitsehen xahasen rê, ³cojo Juana, chjuun rê Chuza, ngu cha xi sahmixa ndava Herodes, me xi cavitexa ngajan distritu Galilea, cojo Susana cojo jemu cjin sa yachjin xi hacjahi. Yêjê ni yachjin xi cuacun vê ne, cojo xcusun xi tjin rê suvá me ne, cafachacuenda xu me Jesús cojo yêjê ni xuta xi ticojo me.

Ejemplu tsêhë cha xi catsitjê trigu

⁴Cuitjin camá xu ngu ndiya nga. Hya xi jemu cjin xuta camatangun me xi canduva nguehe canduva ngajan me jingu sa nandya xi nduva tjengui xu me Jesús ne, cachja Jesús cojo xuta jan ngu ejemplu vihi:

⁵—Cuejñaa ne xi ngu cha xi tsitjê trigu matsejen ne, cavetju cha quiji cha xi tsitjê cha trigu. Hane jinguyêjê rê xi titsitjê cha matsejen ne, ngujo matsejen ne, cavixu ndiya, hane canune rê. Hane xi canduva chu nisë matsejen ne, catsicjê chu cajinë chu. ⁶Hane ngujo nga matsejen ne, cavixu hiscan xi jemu naxindya. Hane xi cavetsihin tijima yehe ne, caxintsen matsejen ta, tsêhë xi tsajin mé xcuen rê.

⁷Hane ngujo nga matsejen ne, cavixu ngajñi nahyá. Hane xi camachatangun matsejen ne, nahyá jan matsejen ne, vêhë casahmi hndë rê catsixi rê. ⁸Hane xi yahnga nga matsejen ne, cavixu hiscan nihndë ndaja. Hane xi camayehe matsejen ne, casua tutjê rê, ngu cientu sa cuatjin sacuatjin xi camatjê.

Xi cafë cachja me cjua vêhë ne, sehe jercu hñu xu cachja me cuitjin:

—Yo ngayun xi tjin nuju cjuasua xi cuinuhyun cjua naha ne, ndaja tinuhyun. —Cuatjin xu cachja me.

**Mé má ejemplu cachja
Jesucristu cojo xuta**

⁹Ngajan xi xuta ladu rë me jan ne, cavinenguise xu me mé meje cuichja ejemplu xi cachja Jesús jan. ¹⁰Hane Jesús ne, cachja xu me cuitjin:

—Nina ne, casua me cahndé xi ngayun ne, cuijne rcun cjuatacun tséhë gobiernu xi sahmi Nina, cjuatacun xi titjún ne, tsajin yo machaya rë. Peru yëjë sa me xi yahnga ne, tichjá cojo rë me cojo súv ejemplu, cojo sa xi handasa cuihndë me cjuua naha ne, peru cuijnii rcu me.

**Cachja Jesús mé vijne ejemplu
tséhë cha xi catsitjë trigu**

¹¹Quihndë ne, nguehe cuichjá cojo nuju mé meje cuichja ejemplu vëhë. Trigu xi tsitjë ngu cha jan ne, vëhë xi sacuaaha cjuua rë Nina. ¹²Hane hya xi vixu ngujo trigu ndiya ne, hacui sacuaaha hya xi visiñuju xuta cjuua rë Nina. Sehe vinduva Satanás ne, fahatahá cjuua rë Nina tséhë xahasen rë me, cojo sa xi cuetjintjin me ngatsë rë xi cumacjain rë me. ¹³Hane hya xi vixu ngujo trigu hiscan xi jemu naxindya ne, hacui sacuaaha hya xi vihndë xuta cjuua rë Nina, hane fahatsja me cojo cjuasua. Peru trigu xi cuacun vë ne, jemu chúva tyjama rë vetju. Hacuanitjin ni vatju ngujo xuta má. Macjain rë me ngujo nixtin ni, peru hya xi vechú ngunixtin xi chjaháchuva rë me ne, fi ngaxtun me. ¹⁴Hane hya xi vixu ngujo trigu ngajñi nahyá ne, hacui sacuaaha hya xi vihndë xuta cjuua rë

Nina, peru ha xcun xi ha cjuinduju me cojo nixtin rë me ne, tsingataha cacun me tséhë cjuacjintacun tséhë cahntsua ndava me, tsingataha cacun me tséhë cjuanchina, hacuaaha tsingataha cacun me tséhë cjuasua xi tjin ngasunhndë, hane vëhë suaain cahndé xi cumajyë cjuua rë Nina cahntsua xahasen rë me, hacuaaha sahmi me ngu cjuandaja xi tsingacun xi xuta rë Nina me.

¹⁵Hane hya xi vixu yahnga trigu hiscan nihndë ndaja ne, hacuaaha hacui sacuaaha hya xi vihndë xuta cjuua rë Nina cojo ngu xahasen ndaja, ngu xahasen tyjahi, hacuaaha tsismicacuaain me. Hane cuatjin cojo jeya ne, caa rë me sahmi me cjuandaja.

Ejemplu tséhë ngu ndihi

¹⁶Hacuaha tsajin hisca xi ngu xuta xi ha xcun xi ha cavetaha rë me ngu ndihi ne, sehe faha me veyahma me ngahma rë ngu tyucu o sá xi faha me vejña me ngahma nachan ta, hatuxa faha me vejña me cahndé rë, cojo sa xi yëjë xuta xi visehen me hiscan setí ndihi jan ne, scuëë me hasen rë. ¹⁷Hacuanitjin ni chuva vëhë, yëjë cjuua rë Nina xi tivicuyá nuju suvun ni ngayun xuta ladu naha ne, handasa hinchahma yëjë cjuua vëhë quihndë ne, peru cuechú nixtin xi cuetjucaa tsejen, hacuaaha cuicuyun rë yëjë xuta.

¹⁸Vëhë xi meje rë xi nihñu ngahñu xi ndaja cuisñuju cjuua rë Nina ta, tséhë xi tu yo ni xi tjin rë cjuua vëhë ne, Nina ne, sua sa rë me. Hane tu yo ni xi tsajin rë cjuua vëhë ne, hitsë cjuua vëhë xi má rë xi tjin

rë ne, chjahátahá rë. —Cuatjin xu cavicuaya Jesús xuta ladu rë me.

Naa rë Jesucristu cojo xicjin me

¹⁹Ngajan xi naa rë Jesús cojo xicjin me ne, cafehetjengui xu me Jesús. Hane maji vechútahacjin rë me ta, tsëhë xi jercu quitsë camaha xu ni xuta. ²⁰Hane tjin xu yo casua camachaya rë Jesús cuitjin:

—Naa nuju cojo nixti xingun ne, hinchacun me ngajan candatsen, xi nduvatjengui nuju me. —Cuatjin xu casacu camachaya rë me.

²¹Peru Jesús ne, cuitjin xu cafayangui me:

—Xuta xi vihndë me cjua rë Nina hacuaha sahmi me sacuatjin chja cjua vëhë ne, hacuaha tangun ni hmú cáacun me sacuatjin hmú cáacun naa naha cojo xinguen. —Cuatjin xu cafayangui me.

Cavatëcja Jesucristu ngahñu rë tjo cojo cjuasca rë nandá

²²Cuitjin camá nga xu ngu nixtin jan. Cavisehen Jesús cahntsua ngu barcu cojo xuta ladu rë me, sehe cachja xu me cojo xuta jan cuitjin:

—Cuanguen ngunda vëhë.

—Cuatjin xu cachja me.

Sehe quiji me. ²³Hane ngajñi cjui xu barcu cojo rë me ne, Jesús ne, cafañafë xu me. Hya xi camá ne, canduva ngu tjo hñu xi jercu tu cjuachan camahani vanga xcun laguna jan. Hane barcu jan ne, jercu tivisehen xu nandá cahntsua, hane me xi cuacun jan ne, jemu tsavi camahani xi cuma rë me.

²⁴Hane xi quiji tiña xu me hiscan jiñafë Jesús ne, sehe catsingasca me me, cuitjin xu cachja me:

—iTatá, tatá! iNguehe tifë ngayaan! —Cuatjin xu cachja xuta ladu rë Jesús jan.

Hane xi cavasca xu rë Jesús ne, cavatëcja me ngahñu rë tjo jan cojo cjuasca rë nandá jan. Sehe casejyu tjo casejyu nandá, jemu ndaja cavéjñajyuu jingujyë ni. ²⁵Sehe ngajan xi Jesús ne, cuitjin xu cachja me cojo xuta ladu rë me jan:

—¿Há manguaaintacún cojo ná ni? —Cuatjin xu cachja me.

Hane xi catsacjun xuta jan camá ne, jemu quijircun rë me. Sehe cachja xu me ngajñi rë me cojo xicjin me cuitjin:

—iMé xcusun xuta me vi xi hisca tjo hisca nandá vitexa me, hacuaha vihndë tsëhë me ni! —Cuatjin xu cachja xuta ladu rë me jan.

Cha Gadarena xi hincha xitsehen xahasen rë

²⁶Hya xi camá xu ne, cafehe me nandya Gadara, ngu nandya xi tacun ngunda vëhë tsëhë laguna Galilea. ²⁷Hane xi cafehe xu Jesús nangui quixí cojo xuta ladu rë me ne, cavechútáha me ngu cha tsëhë nandya vëhë xi hincha xitsehen xahasen rë cha. Cha vëhë ne, ha jemu tsëë xu xi vajin cha tsjian, hacuaha hacuiin cahntsua ndihya véjña cha ta ngajan tahndë véjña cha. ²⁸Xi cavëë xu cha Jesús ne, jercu cajindaya cha quiji caticjaxcun cha xcun me, hacuaha jercu hñu cachja cha cuitjin:

—¿Mé má cuatjin ninguisuhunjñu cojo ná ngayun Jesús, Quihndi rë Nina xi hatuxa jyë hnga cojo Hasen rë? Nihñu favor ne, xicatuun ná cjuañihi. —Cuatjin xu cachja cha.

²⁹Cuatjin cachja cha ta, tsëhë xi Jesús ne, ha cavitexa me xitsehen xi cuetjuxin tsëhë cha. Ha jemu tsëë xu nduva nixtin xi visehen xitsehen xahasen rë cha. Hane xuta ne, tsihñu tsja tsihñu ntsacu me cha cojo cadena cojo sa xi ha quihndë cuetjiin cha cjue cha. Peru xi vicheya cha cadena ne, xitsehen ne, ficojo cjuachan rë cha ngajan ngu xín camahani tsëhë nandya. Jemu cjín ndiya xu xi cavatju cha camá cuatjin. ³⁰Ngajan xi Jesús ne, cuitjin xu cavinenguise me cha:
—¿Hacutjin hmí nuju? —Cuatjin xu cachja me.

Hane cha vëhë ne, cuitjin cafayangui cha:

—Sindadu Cjín. —Cuatjin xu cachja cha.

Cuatjin cachja cha ta, tsëhë xi jemu cjín xitsehen cavisehen xahasen rë cha. ³¹Hane ngajan xi xitsehen xi cuacun jan ne, jemu cafehya xu favor cojo Jesús xi hacuiin cuitexa me xi cjue ngajan nduchin. ³²Hane tiña ngajan ne, jemu cjín xu chinga hinchataha chu tijinë chu ngajan ngu ndetjún. Hane xitsehen jan ne, cafehya cojo Jesús xi sua me cahndé xi cuisehen xitsehen jan xahasen rë chinga. Hane casua xu me cahndé. ³³Hane xi cavetju xu xitsehen jan tsëhë xahasen rë cha vëhë ne, quiji cavisehen xahasen rë chinga. Hya xi camá xu ne, chinga jan ne, cavanga chu quijijne chu tsëhë rcu ndetjún, hane ngajan cavixuya xu chu ngajñi nandá tsëhë laguna, hane ngajan camiji rë chu nandá ne, ngajan café xu chu.

³⁴Ngajan xi xi cavëë xu cha xi sahmi cuidadu rë chu chinga jan xcusun xi camá ne, cavanga cha quiji casua cha camachaya rë nandya cojo ranchun xcusun vëhë. ³⁵Hya xi camá ne, xuta jan ne, cavetju xu me quiji cavutsejen me xcusun xi camá jan. Hane xi cavechútáha me Jesús ne, hacuaha cavëë me cha xi cavetju xitsehen xahasen rë jan, yaja xu cha ngu tsjian, hacuaha ha cavéjña chihin cjuatacun rë cha, tacun cha tiña ntsacu Jesús. Hane xuta jan ne, jemu catsacjun me camá. ³⁶Hane xuta xi cavëë xu xcusun xi camá jan ne, casuacuenda me cojo xuta xi yahnga jan hacutjin camá xi camandaja cha xi caxincha xitsehen xahasen rë jan. ³⁷Hya xi camá ne, yëjë xuta tsëhë ladu tsëhë nandya Gadara ne, cafehya xu me cojo Jesús xi cuetjuxin Jesús tsëhë xuta xi cuacun jan ta, tsëhë xi jemu catsacjun camaha ni yëjë me camá. Hane ngajan xi Jesús cojo xuta ladu rë me ne, cavisehen xu me barcu sehe cavuya nga me ngunda vihi. ³⁸Hane chaja sa xi cjue Jesús ne, cha xi cavetju xitsehen xahasen rë jan ne, cafehya cha cojo rë me xi cjue cha cojo rë me. Peru Jesús ne, catsinguijnetaha xu me cjua cojo rë cha, cachja me cuitjin:

³⁹—Tuyun tjangun ndya nuju ne, hacuaha tinújun cojo xuta tsëhë cjuandaja xi cuacun casahmi Nina cojo nuju. —Cuatjin xu cachja Jesús.

Ngajan xi xi cavuya cafehe xu cha nandya ne, sehe cavetsihin catsujihiya casuacuenda cha xuta jingujyë ni ngajñi nandya yëjë ni

cjuandaja xi cuacun casahmi Jesús cojo cha.

Catsicuya Jesucristu cjuahñu rë quihndi rë Jairo hacuaha camandaja na xi casatëtsja tsjian rë Jesucristu

⁴⁰Hya xi cavuya Jesús ngunda vihi ne, yëjë ni xutacjín jan ne, jemu ndaja cafaahatsja xu me Jesús ta, tsëhë xi hatuxa siuya me me.

⁴¹Hane hora vëhë ne, canduva xu ngu me xi hmí rë Jairo, me xi má xutaxa rë yungun. Hane quiiji caticjaxcun xu me xcun Jesús. Hane cafehya me favor cojo Jesús xi cjue Jesús ndava me ta, ⁴²tsëhë xi me vëhë ne, tjin xu rë me ngu na lihndi xi quihndi ngu tsëhë me. Hane na lihndi vë ne, sacuaha tejó na nu. Hane meje cueya xu na.

Ngajan xi Jesús ne, quiiji xu me. Hane ngajñi cjui me ne, jemu tivehncun xu xuta me. ⁴³Hane ngu na jan ne, tjin rë tejó nu xi yaha rë na chíhin xahmajni. Hane café tujún rë na cavechji na xcun doctor. Peru tsajin xu yo camá cafaahaxin chíhin xi má rë na. ⁴⁴Hane xi quiiji tiña na táha ngaxtun Jesús ne, quiiji na casatëtsja na ntsacu tsjian rë me. Hya xi camá xu ne, ha tu ñahñu cavasen xi vanga rë na jni. ⁴⁵Ngajan xi Jesús ne, cachja xu me cuitjin:

—¿Yo xi casatëtsja ná? —Cuatjin xu cachja me.

Hane xi cachja yëjë xuta xi hacuain me casatëtsja me ne, sehe cachja xu Pedru cuitjin:

—Tatá, xutacjín ne, tivehncun nuju me, hacuaha hisca titsivaha nuju me. —Cuatjin xu cachja Pedru.

⁴⁶Peru Jesús ne, cachja nga xu me cuitjin:

—Peru tjin yo xi casatëtsja ná ta ngahan ne, camachaya ná xi cavetju ná hitsë ngahñu. —Cuatjin xu cachja Jesús.

⁴⁷Hane xi vutsejen na xi cumaji seyahma na ngajñi rë xuta ne, ña fatsë xu na quiiji caticjaxcun na xcun Jesús. Sehe catsinguixi na xcun yëjë ni xuta mé má cuatjin quiiji na casatëtsja na Jesús, cojo tsëhë xi ngutjen ni camandaja na.

⁴⁸Sehe ngajan xi Jesús ne, cuitjin cachja xu me cojo rë na:

—Ngayun tsan ne, camandaja ngayun ta, tsëhë xi camangutacún cojo ná. Cuma cuangun cojo cjuasua. —Cuatjin xu cachja Jesús.

⁴⁹Tu tichja cuaha xu Jesús cojo na xi camandaja jan ne, cafehe nga ngu me xi canduva me tsëhë ndava xutaxa rë yungun jan, hane cuitjin xu cachja me cojo xutaxa rë jan:

—Quihndi nuju ne, ha cahme na. Ha quihndë xicatu hunndy un rë maestru. —Cuatjin xu cachja me.

⁵⁰Hane hya xi cahndë Jesús cjua vëhë ne, sehe cachja xu me cojo xutaxa rë jan cuitjin:

—Xicarcuun. Catamangutacún ni cojo ná ne, quihndi nuju ne, cumandaja na. —Cuatjin xu cachja me.

⁵¹Hya xi camá xu ne, xi cafehe Jesús ndava xutaxa rë yungun jan ne, casuaain me cahndé xi cojo jingu sa xuta cuisehen me. Suvá ni Jesús cojo Pedru cojo Juan cojo Jacobo cojo naa cojo nahmi rë nima lihndi jan cuisehen me cahntsua ndihya. ⁵²Hane yëjë ni xuta ne, hisca chja hisca jihnda xu me tsëhë nima jan. Ngajan xi Jesús ne, cuitjin xu cachja me cojo xuta jan:

—Ha quihndë xicachjihnduun. Na lihndi vë ne, hacuiin cahme na ta jiñafë na. —Cuatjin xu cachja me.

⁵³Peru xuta jan ne, tu cavejnuccëe xu me Jesús ta, tsëhë xi vëndajaja me xi cahme jain nima. ⁵⁴Hane xi cavisehen Jesús hiscan jiña nima lihndi jan ne, sehe quiji me cafaha me tsja, sehe ndaja hñu cachja xu me cuitjin:

—iTitatjinhngue, tsan! —Cuatjin xu cachja me.

⁵⁵Hya xi camá xu ne, cavuya hasen rë nima, sehe ngutjen ni cavisatjenhnga na. Hane sehe cavitexa xu Jesús xi sua xuta rë na lihndi jan niñu sinë na. ⁵⁶Hya xi camá xu ne, xutacha rë na lihndi jan ne, jemu quijircun rë me. Ngajan xi Jesús ne, cachja xu me cojo xutacha rë na lihndi jan xi tsajin camahani yo cuichja me cojo xcusun xi camá.

Catsingatju Jesucristu tejó xuta ladu rë me xi cuichja cjuandajiyihi rë Nina

9 Cavechú ngu nixtin xi casahmitangun xu Jesús xuta ladu rë me xi tejó jan ne, sehe casua rë me ngahñu hacuaha casua rë me xá xi me xi cuacun vëhë cuitexa xu me yëjë xitsehen hacuaha sahmi me xi xuta hmu rë ne, cuma ndaja xu me. ²Hya xi camá xu ne, sehe catsingatju Jesús me xi sua me cumachaya rë xuta tsëhë gobiernu xi sahmi Nina hacuaha sahmi xuta xi cuacun vë xi xuta hmu rë ne, cuma ndaja xu me. ³Hane cuitjin xu cachja Jesús cojo rë me:

—Xi cuetjun cuangun ne, tsajin camahani mé xi chuhun, hacuiin bastón ne, hacuiin changa, hacuiin

niñu, hacuiin tujún, hacuaha hacuiin jo tsjian ngahma chuhun jima ngu ngayun. ⁴Hacuaha xi cjuhun ngu ndihya ne, ha ngajan ni tinechun nguixun nguixun ni, hisca xi cuetjunxun tsëhë nandya vëhë. ⁵Hya xi xuta tsëhë ngu nandya cjuahatsjaain nuju me ne, xi cuetjun tsëhë nandya vëhë ne, titsunu chojo rë ntsacun cojo sa xi cuma tsejen xi xuta jan cún rë me. —Cuatjin xu cachja Jesús.

⁶Sehe ngajan xi cavetju xu xuta ladu rë Jesús jan, quiji catsujiyihiya me yëjë ni nandya tsëhë distritu Galilea, casua me camachaya rë xuta tsëhë cjuandajiyihi xi chja tsëhë gobiernu xi sahmi Nina hacuaha casahmi me xi xuta hmu rë ne, camandaja xu me jingujyë ni ladu vëhë.

Hvíin xuta yo xi Jesucristu

⁷Hane Herodes, me xi cavitexa ngajan distritu Galilea ne, camachaya xu rë me yëjë xá xi tisahmi Jesús cojo xuta ladu rë me. Hane ngu cachajá xu cjuatacun rë me ta, tsëhë xi ngujo xuta ne, chja me ta Jesús ne, hacui nima Juan Vitenda rë Xuta, hacuaha handasa cahme xu nima Juan vë ne, peru cavuya cjuahñu. ⁸Ngujo nga me ne, chja me ta profeta Elías xi cavuya, hane yahnga nga me ne, chja xu me ta ngu nima profeta xi hacjahi, xi cavéjña hatsëë nixtin ne, handasa cahme ne, peru cavuya cjuahñu. ⁹Peru Herodes ne, catsingataha cacun xu me cuitjin: “Nima Juan ne, ha cavitéxa xi catisun rcu. Peru quihndë çyo rë cha xi cuajiyihi vë xi jemu cjín cjuah nuhya rë tsëhë cha?”

Cuatjin xu catsingataha cacun me. Jemu casahmi xu me ngujoyë xi scuëë me Jesús.

Catsicjen Jesucristu hñú mil xihin

¹⁰Hane xi cavuya xu apóstol tsëhë hiscan xi quiji me jan ne, sehe casuacuenda xu me Jesús xcusun xi casahmi me. Ngajan xi Jesús ne, quijicojo xu me suvá ni apóstol jan ngu cahndë xín, tiña tsëhë ngu nandya xi hmí Betsaida. ¹¹Peru xi camachaya rë xutacjín jan ne, quijitjengui xu me Jesús. Hane Jesús ne, jemu ndaja cafahatsja me xuta jan, hane sehe cachja me cojo xuta jan tsëhë gobiernu xi sahmi Nina. Hane xuta xi meje rë xi cuma ndaja me ne, casahmi xu Jesús xi camandaja me.

¹²Hane xi quiji hora jan ne, xuta ladu rë Jesús xi tejó jan ne, quijivaha me xcun Jesús sehe cachja xu me cojo cuitjin:

—Tinújun cojo xutacjín vë ne, catji me nandya xi siu tiñataha o sá xi ranchun xi siu tiñataha, cojo sa xi cuanguise me cahndë xi cuiyuju me hacuaha cuanguise me xi sinë me ta, tsëhë xi jemu xín tsëhë nandya hiscan xi nechantahan vi. —Cuatjin xu cachja apóstol.

¹³Ngajan xi Jesús ne, cuitjin xu cachja me cojo apóstol jan:

—Ngayun tuhun xi sinë me.

—Cuatjin xu cachja me.

Ngajan xi apóstol ne, cafayangui xu me cuitjin:

—Hñú tutu pan cojo jo ti tjín naja. ¿Há cuanguin chíhin niñu xi sinë yëjë xuta xi cuicun vi ni? —Cuatjin xu cachja me.

¹⁴Cuatjin cachja me ta, tsëhë xi ngajñi rë yëjë xuta xi siutahá jan ne,

sacuaha hñú mil má xuta xi xihin. Sehe ngajan xi cachja xu Jesús cojo xuta ladu rë me jan cuitjin:

—Tinújun cojo rë xuta vë ne, catiyuju me sacuaha yachantë me ngu ngu cahndë. —Cuatjin xu cachja me.

¹⁵Ngajan xi xuta ladu rë Jesús jan ne, cuatjin casahmi me, hane caviyuju xu yëjë xuta. ¹⁶Hya xi camá ne, cafaha xu Jesús hñú pan cojo jo ti jan ne, hane xi cavutsejenniji me ngahnga ne, casua me nacuechji rë Nina, sehe cavotoho langa me pan hacuaha cavatëlanga me ti jan, sehe casua xu me cojo xuta ladu rë me xi cjue sua rë me xutacjín jan. ¹⁷Hane xuta ne, yëjë ni me cajinë me hacutjin xi cachuya rë xahasen rë me. Hane xi cachjaya rë xi cavangui cajinë xuta jan ne, catsë xu tejó chajne.

Catsinguixi Pedru yo Jesucristu

¹⁸Cuitjin camá nga ngundiya. Hya xi tisahmi xu Jesús oración rë me ne, xuta ladu rë me ne, hacuaha cojo me siu me cojo rë me. Sehe ngajan xi cavinenguise xu Jesús me cuitjin:

—¿Mé chja xutacjín jan ne, yo ngahan? —Cuatjin xu cachja me.

¹⁹Sehe ngajan xi cachja xu me cojo Jesús cuitjin:

—Yahnga me ne, chja me ta Juan Vitenda rë Xuta ngayun. Hane yahnga nga me ne, chja me ta profeta Elías ngayun. Hane me xi yahnga nga ne, chja me ta ngayun ne, ngu profeta xi hacjahi, xi cavëjña hatsëë nixtin, xi handasa cahme ne, peru cavuya cjuahñu. —Cuatjin xu cachja xuta ladu rë Jesús.

²⁰Sehe Jesús ne, cuitjin xu cavinenguise nga me:

—Hane ngayun ne, ¿mé nújun ni, yo ngahan? —Cuatjin xu cavinenguise Jesús.

Ngajan xi Pedru ne, cuitjin xu cafayangui me:

—Ngayun xi catsingatju nuju Nina xi cumatitjun ngayun tsijin.

—Cuatjin xu cafayangui Pedru.

Cachja Jesucristu xi tsiquehen xuta me

²¹Peru Jesús ne, cavitexa xu me xuta jan xi tsjin camahani yo xi cuichja cojo me cjuatacun jan.

²²Cuitjin xu cachja me:

—Ngahan xi Quihndi rë Xuta Jain ngahan ne, hachu meje rë xi jemu cjin cjuañihi cuátju cuma; xuta changá cojo nahmi xi matitjun tsëhë nahmi cojo cha xi vicuya cjuachacun ne, tsitjungui me ngahan, tsiquehen me ngahan. Peru xi ma jyan nixtin ne, tsicuya Nina ngahan cjuahñu. —Cuatjin xu cachja Jesús cojo xuta ladu rë me.

²³Hane sehe cavuya cachja nga me cojo yëjë ni xuta jan cuitjin:

—Sá xi tjin yo xi meje rë xi cuma xuta ladu naha matsejen ne, ha quihndë mijí rë xi sahmi hacutjin xi meje rë suvá matsejen ta nchunchujun ni matsejen ne, catejñahñu xahasen rë xi cjuecojo ndiya naha, handasa hisca cueya xcun cru. ²⁴Cuatjin matsejen ta, tsëhë xi yo xi meje cjuenduju cojo ngasunhndë rë cojo cjuatacun rë suvá matsejen ne, cuechintaain cjuahñu xatsë. Peru yo xi cuatju cjuañihi o hisca cueya ngatsë naha matsejen ne, vëhë xi cuechútáha

cjuahñu xatsë. ²⁵¿Mé machjirëhë rë yo xi sacú rë yëjë cjuanchina rë ngasunhndë sá xi cueya hacuaha cuma castigu? ²⁶Machjiriin matsejen ta, tsëhë xi yo xi ma sava rë ngatsë naha cojo ngatsë rë cju naha matsejen ne, ngahan xi Quihndi rë Xuta Jain ngahan matsejen ne, hacuaha cuma sava ná tsëhë hya xi cuinduva cojo hasen ndajyihi naha hacuaha tsëhë Nahmi naha hacuaha tsëhë ángel xi vejña tsëhë me. ²⁷Nguehe cuichjá cojo nuju cjuaquixi matsejen ta tjin yahnga ngayun xi sechun guehe xi cueyuun jinguyëjë rë xi cjëë chun gobiernu xi sahmi Nina. —Cuatjin xu cachja Jesús.

Ñahñu camatsejen nima Moisés cojo xutachanga xi hmí rë Elías visiajmi cojo Jesucristu

²⁸Cuitjin camá nga xu ngundiya hya xi cavatju sacuaha jyin nixtin xi cavicuya Jesús cju vëhë. Quijicojo me Pedru cojo Juan cojo Jacobo quijiniiji xu me ngu ndetjún xi sahmi me oración rë me. ²⁹Hora xi tisahmi xu Jesús oración rë me ne, xcun me ne, cavindeya xcun rë. Hane tsjian rë me ne, jercu tu tyava camahani camá, ña setí jyihi. ³⁰Hacuaha camatsejen xu jo xihin hinchacun visiajmi cojo rë me. Xihin jan ne, hacui xu nima profeta Moisés cojo profeta Elías. ³¹Me xi cuacun vëhë ne, camatsejen me cojo ngu hasen ndajyihi, tivisiajmi xu me tsëhë cjuaveya xi hatuxa tjin rë xi cuechútáha Jesús ngajan Jerusalén. ³²Peru Pedru cojo jo sa me xi yahnga jan ne, ha siufé me, tsëhë xi jercu nijñá rë me. Peru xi

cavascandaja xu rë me ne, cavëë me hacutjin jercu setí camahani tsejen hiscan secun Jesús, hacuaha cavëë xu me jo me jan hinchacuntangun me cojo Jesús. ³³Hya xi camá ne, hora xi tivetjuxin me xi cuacun vë tsëhë Jesús ne, sehe cachja xu Pedru cojo Jesús cuitjin:

—Tatá. Tu ma rë xi nguehe nechin ne, nihñi jyan puestu; ngu cuma tsujun ne, ngu cuma tsëhë Moisés, hane cojo ngu cuma tsëhë Elías. —Cuatjin xu cachja Pedru, peru hisca hvíin me mé xi chja me.

³⁴Hane hora xi tichja xu Pedru cuatjin ne, canduva ngu yuffi casahmi tjahnguen rë tsëhë me. Hane jemu catsacjun me camá xi caxinchavasen me tsëhë yuffi jan. ³⁵Hya xi camá ne, canuhya xu rë ngujo cjua xi cavetju ngajñi yuffi jan xi cachja cuitjin:

—Cha vihi xi Quihndi naha cha, cha xi ngahan cavejñá cáacun xi tsingátju. Tinuhyun cjua xi chja cha. —Cuatjin xu cachja cjua jan.

³⁶Hane xi cavatju cachja cjua jan ne, Jesús ne, camasuvá sa me secun me. Hya xi camá xu ne, tu caviyujuyuu ni me. Hane nixtin hya ne, cachjaain camaha xu ni me cojo hisca ngu tsëhë xcusun xi cavëë me.

**Casahmi Jesucristu xi
camandaja cha lihndi xi jiya
xitsehen xahasen rë**

³⁷Cuitjin camá nga xu camá nchujun hya xi canduvajne Jesús tsëhë ndetjún cojo jyan xuta ladu rë me jan. Tjercu cjín camahani xuta canduvatjengui xu rë me

ndiya. ³⁸Hane ngajñi rë xutacjín jan ne, cavetjujñi ngu xihin xi jercu cajindaya xu cachja cojo Jesús cuitjin:

—Maestro, nihñu favor ne, nduvun chutsujun cha lihndi naha ta ngu tutu má cha vi xi tacun ná cha. ³⁹Hane cuitjin sahmi ngu xitsehen cojo rë cha: faha rë cha, hane tu ñahñu jindaya, sehe vitsuneya rë cha, ña vetju natyaxu hntsua cha, hane hisca hya xi ndiya cjuë cha ne, sehe vetjuxin tsëhë cha. ⁴⁰Xuta ladu nuju, caféhya rë me favor xi cuaxëxin me, peru camaji cavaxëxin me. —Cuatjin xu cachja xihin jan cojo Jesús.

⁴¹Sehe ngajan xi Jesús ne, cuitjin xu cafayangui me:

—Ngayujun ni ne, xuta xi macjaain rë ngayun hacuaha xuta xi cavetjuxin tsëhë ndiya ndajyihi ngayun. ¿Jani hisca hya xi tjin ná xi cuitejña cojo nuju? ¿Jani hisca hya xi tjin ná xi scaa ná cojo nuju? Nduvuncujun quihndi nuju nguehe. —Cuatjin xu cafayangui me.

⁴²Hane hora xi tijima tiña xu cha lihndi jan tsëhë Jesús ne, xitsehen ne, catsiticja rë cha, hacuaha vitsuneya rë cha. Hya xi camá ne, cavatëcja Jesús tsëhë xitsehen, hane casahmi me xi camandaja xu cha lihndi jan. Sehe casua me cha cojo nahmi rë cha. ⁴³Hane yëjë ni xuta jan ne, jemu quijircun camaha xu ni rë me xi cuatjin jyë hnga Nina cojo Hasen rë me.

**Cachja nga Jesucristu xi
tsiquehen xuta me**

Hane jinguyëjë rë xi cuatjin tífircun rë xutacjín jan tsëhë yëjë ni

xcusun xi sahmi Jesús ne, cachja xu me cojo xuta ladu rë me cuitjin:

⁴⁴—Ndaja tetuhunrcun cjua xi tichjá cojo nuju vi: Ngahan xi Quihndi rë Xuta Jain ngahan ne, hatuxa tjin xi cuma ngahan entregadu tsja xuta. —Cuatjin xu cachja me.

⁴⁵Peru xuta ladu rë Jesús jan ne, cavijnii rcu me mé vijne cjua jan ta, tsëhë xi casetsa xu rë cjuatacun rë me, cojo sa xi cuijnii rcu me. Hacuaha tsacjun xu me xi cjuinenguise me Jesús mé vijne cjua vëhë.

Yo xi matitjun

⁴⁶Ngü nixtin jan ne, cavetsihin sacuaaha xi meje scaanya xu xuta ladu rë Jesús ngajñi rë me yo xi hitsë sa matitjun. ⁴⁷Peru Jesús ne, xi ha vëë me hacutjin tsingataha cacun xuta ladu rë me jan ne, sehe cafaha me ngu lihndi cavisecon me ndaya rë me, ⁴⁸sehe cachja xu me cojo xuta ladu rë me jan cuitjin:

—Tu yo ni xi cjuahatsja rë lihndi vihi tsëhë xi ladu naha má ne, hacuaaha hora vëhë cjuahatsja ná ngahan. Hacuaha xi cuatjin cjuahatsja ná ngahan ne, hacuaaha cjuahatsja rë Nina xi catsingatju ná. Hane tu yo ni xi má nuju xi ma tjengui tsëhë ngajñi nuju ngayujun ni ne, vëhë xi matitjun xi má rë Nina. —Cuatjin xu cachja Jesús.

Xuta xi hacuiin condra nuju má me ne, hatuxa favor nuju fi me

⁴⁹Ngajan xi Juan ne, cachja xu me cojo Jesús cuitjin:

—Tatá, cahyin ngu me xi tivaxëxin xitsehen sacuaaha xi suvun catuhun

rë me xá. Hane canújin cojo rë me xi ha quihndë sahmi me cuatjin ta, tsëhë xi me vëhë ne, tsujyihintjenguiin me ngayun sacuatjin niji ngayin. —Cuatjin xu cachja me.

⁵⁰Hane Jesús ne, cuitjin xu cafayangui me:

—Xicanujuun cojo rë me cuatjin ta, tsëhë xi xuta xi hacuiin condra naja má me ne, hatuxa favor naja fi me. —Cuatjin xu cachja Jesús.

Catsingatiin xuta distritu Samaria Jesucristu

⁵¹Hya xi camá ne, xi tijima tiña xu nixtin xi cjueniji Jesús ngajan ngahnga ne, cavejñahñu me cjuatacun rë me xi cjue me ngajan Jerusalén. ⁵²Vëhë xi catsingatju titjun xu me jo xuta ladu rë me. Xi quiji me ne, cafehe me ngu nandya tsëhë xuta Samaria, xi cuanguise me cahndé xi cuejña Jesús cojo xuta ladu rë me. ⁵³Peru xuta jan ne, cafahatsjaain xu me Jesús ta, tsëhë xi Jesús ne, hatuxa tjin cacun me xi cjue me hisca Jerusalén. ⁵⁴Peru hya xi camachaya xu rë Jacobo cojo Juan, xuta ladu rë Jesús, cjua vëhë ne, cachja xu me cojo Jesús cuitjin:

—Tatá. ¿Há nihña sacuatjin casahmi profeta Elías hatsëë nixtin? ¿Há cuitexan xi cuinduva ndihi tsëhë ngahnga, tsicjë rë xuta xi cuicun vi? —Cuatjin xu cachja me.

⁵⁵Ngajan xi Jesús ne, cavuya vutsejen me xuta ladu rë me jan ne, sehe cavatëcja xu me cjuatacun xi tsingataha cacun me xi cuacun jan, cuitjin cachja me:

—Ngayun ne, hyúun mé xcusun Hasen xi tsëhë nuju. ⁵⁶Ngahan

xi Quihndi rë Xuta Jain ngahan ne, hacuiin canduvá xi tsicjé xuta ta xi canduvá ne, xi cuáxëtjé me.

—Cuatjin xu cachja Jesús.

Sehe quiji xu me ngu nga nandya.

Xuta xi camameje cjue cojo Jesucristu

⁵⁷Hane ndiya cjuí Jesús cojo xuta ladu rë me ne, cachja xu ngu me jan cojo rë me cuitjin:

—Tatá. Tu yani ni xi cuangun ne, cjué cojo nuju. —Cuatjin xu cachja me.

⁵⁸Sehe ngajan xi Jesús ne, cuitjin xu cachja me cojo xuta jan:

—Chu ninda ne, tjin nguijo hiscan viyuju chu, hane nisë xi vitjen chu ngahnga ne, tjin ndava chu, peru ngahan xi Quihndi rë Xuta Jain ngahan ne, hisca ndya naha tsajin.

—Cuatjin xu cachja me.

⁵⁹Cachja sa xu me cuitjin cojo ngu nga xuta jan:

—Nduvun, cuanguen cojo ná.

—Cuatjin xu cachja me.

Peru xuta jan ne, cuitjin xu cachja me:

—Tatá. Tuhun ná cahndé, titjun cjué xi seyaniji nahmi naha.

—Cuatjin xu cachja ngu nga xuta jan.

⁶⁰Ngajan xi Jesús ne, cuitjin xu cachja me:

—Xuta xi sacuaaha xi cahme cjuatacun rë me xi sahmicuendaain me Nina ne, me vëhë catinchaniji me nima rë me. Peru ngayun ne, tángun tuhun cumachaya rë xuta tsëhë gobiernu xi sahmi Nina.

—Cuatjin xu cachja me.

⁶¹Ngu nga xuta ne, cachja xu me cojo Jesús cuitjin:

—Tatá. Ngahan ne, hacuaaha cjué cojo nuju. Peru tuhun ná cahndé, cjué tsinguijnetaha cjua cojo xuta naha. —Cuatjin xu cachja xuta jan.

⁶²Peru Jesús ne, cuitjin xu cachja me cojo xuta jan:

—Ngu xuta xi ha cavejña cacun me xi cjuetjengui me ndiya rë Nina sehe cumangu cumajo cacun me íhá cjue, há cjuiin me ne?, tangun me cojo ngu cha xi ha cafaha cha ndetsihin latu xi cuetsihin cuacjan cha nangui peru tivutsejen sa cha taha ngaxtun cha. Sacuatjin machjiriin cha vihi xi cuacjan cha nangui ne, hacuanitjin ni machjiriin me vëhë xi cuisecoo me Nina hiscan xi sahmi Nina gobiernu. —Cuatjin xu cachja Jesús.

Catsingatju Jesucristu jyanchan tejó xuta ladu rë me xi cuichja cjuandajyihi rë Nina

10 Xi cavatju xu vëhë ne, sehe casuaxa Nai naja jyanchan tejó sa xuta ladu rë me, sehe catsingatju titjun me chuva jo chuva jo xuta jan yëjë ni nandya cojo yëjë ni cahndé xi catsingataha cacun Jesús xi sehe cjue me. ²Hane cuitjin xu cachja me cojo:

—Jemu tjin camahani xuta xi meje cuisñuju me cjua rë Nina, peru me xi sua cumachaya rë xuta ne, jemu chuva má me. Vëhë xi meje rë xi chjahyun rë Nina favor xi tsingatju me me xi cjue sua cumachaya rë xuta cjua rë Nina. ³Tángun ni. Ngahan titsingátju nuju ngayun xuta jeya ngajñi rë xuta hnga cacun, sacuaaha cjue ngu chu hnditsánga ngajñi rë chu cjan rë. ⁴Xicachjuun tujún, xicachjuun

changa, hacuaha xicachjuun chuxinxhtë. Xicavisiajmuu cojo xuta hora xi sacu xingun cojo rë me ndiya. ⁵Hane tu jarë ni ndihya xi cuisuhun ne, titjun tinújun ngu nina cuitjin: “Nina sua nuju me cjuandaja cjuajeya.” Cuatjin tinújun. ⁶Hane sá xi ndihya vëhë tjin quihndi tsëhë cjuajeya ne, hacuaha sacú rë me cjuajeya. Peru sá xi hacuiin quihndi tsëhë cjuajeya xi siu jan ne, sacuiin rë me. ⁷Hane xi cuisuhun ngu ndihya ne, ha ngajan ni tinechun, xinu siuhun cojo rë me mé xi sua me. Cuatjin nihñu ta, tsëhë xi ngu xuta xi sahmi me xá ne, vechú chuva rë xi sacú chji rë me. Vëhë xi mijf rë xi cuangun nguehe cuangun ngajan cuinechun. ⁸Hane tu jarë ni nandya xi cuisuhun hiscan xi cjuahatsja nuju xuta ne, xinu xcusun xi sua me xinu, ⁹hacuaha nihñu xi xutahmu rë tsëhë nandya jan ne, cumandaja me, hacuaha cuitjin tinújun cojo yëjë xuta: “Ha camatiña nixtin xi cuma nuju xi sahmi Nina gobiernu.” Cuatjin tinújun. ¹⁰Hane tu jarë ni nandya xi cuisuhun hiscan xi cjuahatsjaain nuju xuta ne, xi chjuhun ndiya xi cuetjunxun tsëhë nandya vëhë ne, cuitjin tinújun cojo xuta: ¹¹“Hisca chojo rë ngajñi nandya nuju xi cavaqui rë ntsacuín ne, cuiitsuni cojo sa xi cuma tsejen xi ngayun cún nuju. Peru meje rë xi cuijne rcun xi ha camatiña nixtin xi sahmi Nina gobiernu.” Cuatjin tinújun. ¹²Cuichjá cojo nuju ta hya xi cuechú nixtin xi tsichuva Nina xuta tsëhë jyë rë me ne, hitsë sa jyë castigu cuatju xuta tsëhë nandya xi fahatsjaain nuju, xi cuma rë xuta

tsëhë nandya Sodoma xi jercu tu casahmi camahani me cjuatsehen.

Cjuachoho xi cuma rë ciudad xi camacjaain rë cju rë Jesús

¹³iJemu chojyih tsëhë xuta nandya Corazín! iHacuaha jemu chojyih tsëhë xuta nandya Betsaida! Jemu chojyih tsëhë me ta, tsëhë xi miji tsindeya me cjuatacun rë me, handasa cavëë me cjuarcun xi casahme ngajñi rë me. Xuta nandya Tiro cojo xuta nandya Sidón ne, hisca hacuiin xuta ladu rë Nina má me sacuatjin rë xuta Corazín cojo Betsaida. Peru sá xi xuta Tiro cojo Sidón cavëë me cjuarcun xi cuacun vë ne, ha catsindeya me cjuatacun rë me, hacuaha ha cavajá me tsjian xi sacuaha tsánaxá hacuaha caviyuju me ngajñi ndesu, sacuaha xcusun naja, cojo sa xi cuma tsejen xi jemu choho má jain rë me tsëhë jyë rë me. ¹⁴Vëhë xi hya xi tsichuva Nina yëjë xuta tsëhë jyë rë me ne, xuta nandya Tiro cojo xuta nandya Sidón ne, hitsë sa chúva castigu cuatju me cuma xi cuma rë xuta Corazín cojo xuta Betsaida. ¹⁵Hane xuta nandya Capernaum ne, ¿há cjue me hisca ngahnga hiscan tacun Nina? iHacuiin! Hatuxa cjue me nduchin, cahndé hiscan ma hasen rë nima castigu.

¹⁶Xuta xi cuihndë me tsujun ne, hacuaha tivihndë me tsahan. Hane xuta xi tsitjungui nuju me ne, hacuaha titsitjungui me ngahan. Hane xuta xi tsitjungui ná me ne, hacuaha titsitjungui me Nina xi catsingatju ná. Cuatjin xu cachja Jesús cojo xuta ladu rë me, sehe cavetju xuta ladu rë me jan quiji me.

**Cavuya xuta ladu rë Jesucristu
xi jyanchan tejó**

¹⁷Hya xi camá ne, xi cavuya xu xuta ladu rë Jesús xi jyanchan tejó jan ne, jercu sua rë xahasen rë me. Hane cuitjin xu cachja me cojo Jesús:

—¡Tatá! ¡Xi veyinnanguin ñihi nuju hora xi tiniññí xá xi cavitexun niji ne, hisca xitsehen vihdé tsijin! —Cuatjin xu cachja xuta xi cuacun jan.

¹⁸Sehe ngajan xi Jesús ne, cuitjin xu cachja me cojo xuta jan:

—Jinguyëjë rë xi tivutsején ngahnga hiscan tacun Nina ne, cjanengui Satanás sacuaha camá ni ngu ndihichuhún. Hane cuatjin cahvë xi tichjahátáha rë gobiernu xi sahmi Satanás. ¹⁹Chutsujun ni, ngahan casuá nuju chuva rë xi tsajin mé cuatjun cuma, handasa nunú chu yë o sá nunú chu naya o sá xi suvá camahani Satanás choho meje sahmi cojo nuju. ²⁰Hacuiin ndaja cuma nuju tsëhë xi vihdé xitsehen tsujun ta xi meje rë ne, ndaja catama nuju tsëhë xi ha quitaháxujun ñihi nuju ngajan ngahnga. —Cuatjin xu cachja Jesús cojo xuta ladu rë me jan.

**Casahmi jyë casahmi
hnga Jesucristu Nina**

²¹Hane ha hora vëhë ni ne, Hasen rë Nina casahmi xi jemu sua camahani camá rë xahasen rë Jesús, sehe cachja xu me cuitjin cojo Nina:

—Ngayun nahmi naha ne, sahmejyë sahmehnga nuju cojo Hasen nuju, ngayun xi Nai rë ngahnga cojo nangui ngayun,

tsëhë xi ngayun caveyúnhmu cjuatacun vëhë xi cuma rë xuta xi jemu vechú cjuatacun rë, hane catuhun camachaya rë xuta xi hvíin camahani. Ngayun nahmi naha, cuatjin canihñu ta, tsëhë xi cuatjin xi cachuya nuju. —Cuatjin xu cachja Jesús cojo Nina.

²²Hane xi cojo yëjë ni xuta ne, cuitjin xu cachja me:

—Yëjë ngarca ni matsejen ne, Nina Nahmi naha casua ná me. Tsajin hisca ngu xi vëë yo xi Quihndi rë Nina matsejen ta suvá ni Nina Nahmi naha xi vëë me. Hacuaha tsajin hisca xi ngu xi vëë yo xi Nahmi naha matsejen ta suva ni ngahan xi Quihndi rë me ngahan xi hvë, cojo tu yo ni xi ngahan meje suá cumachaya rë. —Cuatjin xu cachja me cojo yëjë xuta.

²³Cavuya vutsejen nga me hiscan siu xuta ladu rë me ne, sehe cachja xu me cojo suvá ni me xi cuacun vëhë cuitjin:

—Jemu ndaja tsujun ngayujun ni xi tichutsujun xcusun xi tijima nixtin vihi. ²⁴Nguehe cuichjá cojo nuju ta jemu ndaja tsujun ta, tsëhë xi hacuaha jemu cjín profeta hacuaha jemu cjín xuta xi matitjun xi caviyuju titjún ne, jemu meje scuëë me xcusun xi ngayun tichutsujun, peru casacuiin cavëë me. Hacuaha jemu meje cuisinuju me cjua xi tivisinuju ngayun, peru casacuiin cavisinuju me ta, tsëhë xi cjëë cuma xcusun vëhë nixtin hya. —Cuatjin xu cachja Jesús cojo xuta ladu rë me.

**Ejemplu tsëhë cha Samaria
xi casahmi cjuandaja**

²⁵Ngundiya nga hya xi tacun xu Jesús cojo xuta ne, casecun ngu cha

xi vicuya cjuachacun cavinenguise xu cha cuitjin xi cjuahachuva cha me:

—Maestro. ¿Mé ndatjin xi sahme cojo sa xi cuécutáha cjuahñu xatsé xcun Nina? —Cuatjin xu cavinenguise cha me.

²⁶Ngajan xi Jesús ne, cuitjin xu cachja me cojo cha:

—¿Hacutjin camahindu xcun ley rë Moisés? ¿Mé xi chutayun jan? —Cuatjin xu cachja me.

²⁷Hane xi cafayangui cha ne, cuitjin xu cachja cha:

—“Meje rë xi nihmutacún Nina naja cojo nguñajatacún, cojo yëjë xahasen nuju, cojo yëjë ngahñu nuju, cojo yëjë cjuatacun nuju, hacuaha cuatjin nihmutacún xingun sacuatjin hmutacún suvun yojo nuju.” —Cuatjin xu cachjasun cha cjuá rë ley.

²⁸Hane cuitjin xu cachja Jesús cojo cha:

—Cjuaquixi cjuá xi canújun. Cuatjin nihñu, sehe cuechuntuhun cjuahñu xatsé. —Cuatjin xu cachja Jesús.

²⁹Ngajan xi cha xi vicuya cjuachacun jan ne, xi meje tsingacun cha xi jemu quixi cha cojo cjuatacun rë cha ne, cuitjin xu cavinenguise cha cojo Jesús:

—¿Yo xi xingueen ni? —Cuatjin xu cachja cha.

³⁰Hane ngajan xi Jesús ne, cojo ngu ejemplu cafayangui xu me tséhë cha cuitjin:

—Cuejña ne xi ngu xuta jan ne, cavetju me tséhë nandya Jerusalén ne, cjuí me nandya Jericó. Hane ndiya cjuí me ne, cavechútáha ngujo cha chëjë me. Hane

cafhatahá cha yëjë tséhë me xi yaha me, sehe cavaja cha me. Ña catsiquehenñaja cha me, hane sehe cavanga cha. ³¹Hya xi camá ne, hora vëhë canduva ngu nahmi cavatju me ndiya vëhë, hane xi cavëë me xuma xuta xi casacuhmu rë jan ne, tjeheh ndiya ladu xingu cavatju me quiji me. ³²Ha chuva vëhë ni ne, cafehe ngu sangrista cahndé vëhë. Hane xi cavëë cha xi jiña me xi casacuhmu rë jan ne, cavetahaxin cha hitsé ndiya rë cha sehe cavatju cha quiji cha. ³³Peru ngu cha tséhë distritu Samaria xi quiji cha ndiya vëhë ne, cafehe cha hiscan jiña xutahmu rë jan. Hane xi cavëë cha me ne, jemu camayuma rë cha me. ³⁴Hane xi quijivaha cha xcun me ne, catsirqui cha me, cavitejnu cha aceite cojo xan hiscan casacuhmu rë me sehe catsitjinguia cha me tsjian. Hya xi camá ne, sehe catsiquijin cha me naxin rë cha, sehe quijicojo cha me ngu ndihya hiscan xi hatuxa ndihya viyuju xuta, hane ngajan casahmi cha me cuidadu. ³⁵Hane xi camá nchujun jan ne, cavaxë cha jo denario, tujún xi faha ngu mosu xi sahmixa jo nixtin, sehe casua cha me xi nai rë ndihya jan, sehe cachja cha cojo rë me cuitjin: “Nihñu cjuandaja ne, chjuhuncuendun xuma xutahmu rë vi. Hane xi quisun sa nicujun tséhë xcun tujún xi suá nuju vi ne, xi cúya ne, sehe cuechjë tsujun.” Cuatjin cachja cha Samaria.

³⁶Ngajan xi Jesús ne, xi cuatjin cajnetaha ejemplu xi cachja me ne, sehe cachja xu me cojo cha xi vicuya cjuachacun jan cuitjin:

—¿Jarë tsëhë catsijyan xuta xi cuacun vë xi má nuju xi cjuaquixi xi camá xicjin me xi cavanguihmu chëjë jan? —Cuatjin xu cachja Jesús.

³⁷Ngajan xi cha xi vicuya cjuachacun jan ne, cuitjin xu cafayangui cha tsëhë Jesús:

—Cha xi ngatsë rë cjuayuma ne, casahmi cjuandaja cojo me xi casacuhmu rë jan. —Cuatjin xu cachja cha.

Hane Jesús ne, cuitjin cachja nga xu me cojo cha:

—Quihndë xi cuangun ne, hacuaha cuatjin nihñu. —Cuatjin xu cachja Jesús.

Quiji Jesucristu ndava na Marta

³⁸Hane xi cjui sa xu Jesús cojo xuta ladu rë me ne, xi cavisehen me ngu nandya jan ne, ngu na xi hmí rë Marta ne, cafahatsja na Jesús ndava na. ³⁹Na Marta jan ne, tjin ngu tíchja na xi hmí rë María. Hane na María jan ne, quiji xu na cavéjña na táha ntsacu Jesús, tivisiñuju na cjua xi tivicuya me. ⁴⁰Peru na Marta ne, jemu cjín xcunya xá xi tisahmi na. Hane xi cavatju na hiscan tacun Jesús ne, cuitjin xu cachja na:

—Tatá. ¿Há marcuaain nuju xi na tichja ne, cavejñasuva ná na cojo xá xi tacunvasen tisahme? Tinújun cojo rë na, catisecoo na ngahan. —Cuatjin xu cachja na.

⁴¹Ngajan xi Jesús ne, cuitjin xu cafayangui me tsëhë na:

—Marta, jercu marcun nuju tsëhë jemu cjín xcusun. ⁴²Peru ngu xcusun ni xi sahmi ngujoyë. Na María ne, cavaxijin na xcusun xi ndaja vë, hane hacuiin chjahátahá rë tsëhë na. —Cuatjin xu cachja me.

Cavicuya Jesucristu hacutjin meje rë xi nihña oración

11 Cuitjin camá xu ngundiya hya xi tisahmi Jesús oración rë me ngu cahndé jan. Hane xi cajnetaha casahmi me oración rë me ne, ngu xuta ladu rë me jan ne, cuitjin xu cachja me cojo Jesús:

—Tatá. Ticuyun niji hacutjin nihñi oración niji, sacuatjin cavicuya Juan xuta ladu rë me. —Cuatjin xu cachja me.

²Ngajan xi Jesús ne, cuitjin xu cafayangui me:

—Hya xi nihñu oración ne, cuitjin tinújun:

Ngayun Nahmi niji, meje niji xi ngayijin ni xuta ngasunhndë chjihinrcuin nuju.

Meje niji xi cuinduvun nihñu niji gobiernu.

³Nchunchujun ni tuhun niñu xi xiní.

⁴Ninchatuhun niji tsëhë jyé xi jemu quitjin ta ngayin suvin ne, hacuaha tininchatihin rë yëjë ni xuta xi quitjen me jyé tsijin.

Xicatuun cahndé xi chjaháchuva niji cojo cjuatacun niji.

Cuatjin tinújun. —Cuatjin xu cachja Jesús cojo xuta ladu rë me.

⁵Hya xi camá ne, cachja nga xu Jesús ngu ejemplu cojo xuta ladu rë me. Cuitjin xu cachja me:

—Cuejña ne xi ngayun tjin nuju ngu xuta xi vinga nuju, hane vasen nixten cuangun ndava me, cuinújun cojo rë me cuitjin: “Amigu, nihñu favor tuhun jyan niñu scuxétaha ta,

⁶tsëhë xi ngu amigu naha cafehe ndya naha xi cjuí me ngu nangui, hane tsajin ná mé xi suá sinë me.” Cuatjin cuinújun cojo rë me.

⁷¿Há cjuayangui me tsujin cuitjin tsëhë hisca cahntsua ndihya?:

“Xicatuhunndyuun ná ta tingotjo ndihya ne, ha tichjá, hacuaha quihndí naha ne, nguehe siufë cojo ná. Cumaji cuisátjenhnga suá nuju.” ¿Há cuatjin cjuayangui me tsujun? Hacuín cuatjin. ⁸Cuichjá cojo nuju ta handasa amigu nuju me, peru hacuín ngatsë rë vëhë xi cuisátjenhnga me sua nuju me ta ngatsë rë xi ngajan cjuí ngajan nduva cuinújun ne, cuisátjenhnga me sua nuju me ha tucutjin xi chjahyun. ⁹Hacuaha cuichjá cojo nuju cuitjin: Chjahyun rë Nina, hane sua nuju me. Tinchunsun, hane sacú nuju. Tinújun, hane Nina ne, sua me cahndé cuisuhun. ¹⁰Cuatjin nihñu ta, yëjë ni xuta xi fehya me ne, fahatsja me, hane yo xi vanguise ne, sacú rë, hane yo xi chja ne, sacú cahndé visehen.

¹¹Tsajin ngu nahmi xi, hya xi quihndí rë me cjuehya ngu niñu ne, cahndé rë xi sua me ngu niñu ne, sua me ngu ndyojo, o sá xi hya xi quihndí cjuehya ngu chu ti ne, cahndé rë xi sua me ngu chu ti ne, sua me ngu chu yë, ¹²o sá xi hya xi quihndí cjuehya ngu chjoo ne, sua me ngu chu naya. ¹³Ngayun xi tsehen cjuatacun nuju ne, ma tuhun rë quihndí nuju xcusun xi ndaja. Hitsë guan Nahmi naja xi tacun me ngahnga ta hitsë sa jercu meje sua me Hasen rë me cojo xuta xi cjuehya rë me. —Cuatjin xu cachja Jesús.

Cachja xuta xi Satanás casuaxa rë Jesucristu

¹⁴Cavechú xu ngu nixtin xi cavaxëxin Jesús ngu xitsehen xi casahmi lihmi rë ngu cha jan. Hane hya xi cavetju xitsehen jan ne, cha lihmi jan ne, cavetsihin cachja cha. Hane xutacjín jan ne, jemu quijircun rë me. ¹⁵Hya xi camá ne, ngujo xuta jan ne, cuitjin xu cachja me:

—Beelzebú, xitsehen xi matitjun ne, vëhë casua rë cha xá xi vaxëxin cha xitsehen. —Cuatjin xu cachja xuta jan.

¹⁶Hane ngujo nga xuta ne, xi meje cjuahachuva me Jesús ne, cafehya me me xi sahmi me ngu cjuarcun xi cuinduva ngajan ngahnga. ¹⁷Peru Jesús ne, tsëhë xi ha vëë me mé xi tsingataha cacun xuta xi cuacun jan ne, cuitjin xu cachja me:

—Hya xi xuta tsëhë ngu nandya ticjan me ngajñi rë me cojo xicjin me ne, nandya vëhë ne, ha tivéjña xahva, hisca ndihya ne, tivixusun xcun xicjin. ¹⁸Hacuanitjin ni sá xi Satanás scaan cojo xitsehen xi yahnga xi hacuaha Satanás má nai rë ne, tsichajá ngahñu rë xi vëhë matitjun. Cuatjin chjá ta, tsëhë xi nújun xi Beelzebú casua ná xá xi vaxëxin xitsehen. ¹⁹Peru sá xi Beelzebú casua ná xá xi vaxëxin xitsehen ne, hacuaha ha Beelzebú vëhë casua rë ngu ngu xuta ladu nuju xá xi hacuaha vaxëxin me xitsehen. Vëhë xi ha me vëhë ni cuichja me xi cuaaintjin xi nújun xi Beelzebú casua ná xá. ²⁰Peru sá xi Nina casua ná me xá xi vaxëxin xitsehen ne, ngajan matsejen xi

gubiernu xi sahmi Nina ne, ha tivetsihin.

²¹'Satanás ne, tangun cojo ngu cha xi jemu hñu ngahñu rë. Hya xi ha ndaja tjin chjine cha cojo quicha rë cha xi sahmi cuidadu cha ndava cha ne, yëjë xcusun xi tjin rë cha ne, hacuaha ha ndaja cuidadu tjin. ²²Peru ngahan ne, tangun ngahan cojo ngu me xi hitsë sa jemu hñu camahani ngahñu rë. Hya xi me xi hitsë sa hñu ngahñu rë scaan me cojo cha xi hñu ngahñu rë jan hacuaha tsinguijne me cha ne, cjuahatahá me quicha xi vetaha cacun cha xi cuaxëtje rë cha, hane sehe cuatëcja me yëjë xcusun xi tjin rë cha jan ngajñi rë me cojo xicjin me.

²³Xuta xi fiin me favor naha ne, condra naha má me. Hane xuta xi visecuain ná me xi nihñi tangun cjuatacun rë xuta cojo Nina ne, tsinguetsun me cjuatacun rë xuta. —Cuatjin xu cachja Jesús.

Xitsehen xi vuya

²⁴Hya xi camá ne, Jesús ne, quijinduju sa xu cachja me cuitjin: —Hya xi vetjuxin xitsehen tsëhë xahasen rë ngu xuta hiscan xi camá sacuaha ndava xitsehen jan ne, fi táha hiscan jemu nangui quixí camahani, vanguise cahndé hiscan xi cuejñajenda. Hane xi sacuiin rë cahndé hiscan cuejñajenda ne, cuitjin tsingataha cacun: “Cúya rë cjué ndya naha hiscan xi cavétjuxen.” Cuatjin tsingataha cacun xitsehen jan. ²⁵Hane xi vuya fehe xitsehen jan cahntsua xahasen rë xuta jan ne, vutsejen xitsehen jan cahntsua xahasen jan sacuaha

ngu ndihya xi caxtecha tyjahi tyjahi, hacuaha siundaja chichihin ngu tsé ngu xtí. ²⁶Xi vutsejen xitsehen jan xi cuatjin jyihi jan ne, sehe fi jaha sa rë yatu sa xitsehen xi hitsë sa tsehen xi cuma rë vëhë ne, sehe visehen nga viyujucahndé jan. Peru xi ma ngascan ne, hitsë sa chojyihí tsëhë xuta vëhë xi cuma rë titjún. —Cuatjin xu cachja Jesús.

Xuta xi ndaja jain tsëhë me

²⁷Peru jinguyëjë rë xi tichja xu Jesús cjua vëhë ne, ngu na xi jiyajñi ngajñi rë xutacjín jan ne, cajindaya na cachja xu na cuitjin:

—Jemu ndaja tsëhë chjuun xi catsin rë ngayun, hacuaha jemu ndaja tsëhë ndanisin xi cavacuntuhun. —Cuatjin xu cachja na.

²⁸Peru Jesús ne, cuitjin xu cafayangui me tsëhë na:

—Quixi, peru hitsë sa ndaja tsëhë xuta xi visiñuju me cjua rë Nina hacuaha vihndé me tsëhë. —Cuatjin xu cafayangui Jesús.

Cafehya xuta tsehen ngu seña xi sahmi Nina

²⁹Vëhë ta jima tangun camaha sa xutacjín jan ne, cavetsihin cachja xu Jesús cuitjin:

—Ngayujun ni ngayun xuta tjë rë Israel tsëhë nixtin vihi matsejen ne, hatuxa tsehen cjuatacun nuju. Tichjahyun ngu seña xi sahmi Nina, peru sacuiin nuju matsejen ta ngu ni seña xi sacú nuju matsejen ne, sacuaha seña xi catsingacun profeta Jonás hatsëë nixtin. ³⁰Sacuatjin rë profeta Jonás xi me vëhë camá me ngu seña xi cuma rë xuta nandya

Nínive hatsëë nixtin matsejen ne, ha cuanitjin ni ná ngahan xi Quihndi rë Xuta Jain ngahan matsejen ta ngahan cuma ngahan seña xi cuma nuju ngayujun ni xi nechun nixtin vihi. ³¹Hya xi cuechú nixtin xi tsichuva Nina xuta tsëhë jyé rë me matsejen ne, na xi cavitexa ngajan nangui Sabá hatsëë nixtin matsejen ne, cjue cuinchajyë nuju na ngayujun ni ngayun xuta tjë rë Israel xi nechun nixtin vihi. Cuatjin sahmi na matsejen ta, tsëhë xi jercu tu cjin camahani xi canduva na xi cuihndë na cjuatacun ndacun xi jercu tu ma camahani rë Salomón, me xi cavitexa rë xutachanga naja hatsëë nixtin. Peru ha tejña ngahan nguehe sacuahá ngu seña xi hitsë sa vengui chji rë xi cuma rë Salomón. ³²Hacuaha hya xi cuechú nixtin xi tsichuva Nina xuta tsëhë jyé rë me matsejen ne, yëjë xuta nandya Nínive matsejen ne, cjue cuinchajyë nuju me ngayujun ni ngayun xuta tjë rë Israel xi nechun nixtin vihi. Cuatjin sahmi me matsejen ta, tsëhë xi me xi cuacun vëhë matsejen ne, catsindeya me cjuatacun rë me hya xi casua profeta Jonás camachaya rë me cjuá rë Nina. Peru ha tejña ngahan nguehe sacuahá ngu seña xi hitsë sa vengui chji rë xi cuma rë profeta Jonás. —Cuatjin xu cachja Jesús.

Ndihi rë yojo naja

³³Hane xi quijinduju sa cachja me ne, cuitjin xu cachja me:

—Tsajin hisca xi ngu xuta xi ha xcun xi ha cavatju cavetaha rë me ngu ndihi matsejen ne, faha me

veyahma me o sá xi faha me veyá me ngahma ngu caxa matsejen ta faha me vejña me cahndé rë, cojo sa xi yëjë xuta xi visehen me hiscan setí ndihi jan matsejen ne, scuëë me hasen rë. ³⁴Tuxcuun matsejen ne, vëhë xi sacuahá ndihi rë yojo naja. Vëhë xi hya xi tuxcuun ndacun matsejen ne, hatuxa ma hasen cahntsua yojo naja. Peru sá xi tuxcuun chocun matsejen ne, hacuahá ma jñu cahntsua yojo naja. ³⁵Ndandaja ningatuhuntacún matsejen ne, sacuahá hasen xi jiya cahntsua yojo nuju matsejen ne, ¿há hasen xi cjuaquixi jain?, o há tsajin ne, ¿há jñú? ³⁶Quihndë matsejen ne, sá xi jingujyë ni yojo nuju jiya hasen, hisca xi hitsë jñú tsajin rë matsejen ne, jingujyë ni yojo nuju matsejen ne, jiya hasen sacuahá hya xi sahmi hasen tsajan hasen rë ngu ndihi. —Cuatjin xu cachja Jesús.

Cacjan Jesucristu cojo cha fariseo cojo cha xi vicuya cjuachacun

³⁷Hane xi cajnetaha xu cachja Jesús ne, ngu cha fariseo ne, cachja cha cojo Jesús xi cjue sinë me cojo cha niñu. Xi cavisehen Jesús ndihya ne, quiji xu me cafaha me cahndé rë me xcun maxë. ³⁸Peru xi cavëë xu cha fariseo xcusun rë Jesús ne, jemu quijircun rë cha tsëhë xi hacuiin titjun cavane xu me tsja me sehe sinë me niñu sacuahá vitexa xcusun rë xutachanga rë me. ³⁹Ngajan xi Nai naja ne, cachja xu me cojo cha cuitjin:

—Ngayujun ni ngayun xuta fariseo ne, xcusun nuju xi nihñu tyjahi táha ngaxtun ni ngu vasu o sá xi

ngu tyuva, peru cahntsua xahasen nuju ne, quitsë camahani rë cjuatsehen cojo cjuatacun xi nimuju yëjë ni xcusun. ⁴⁰Sca nuju ngayun. Catijne rcun ta ha me xi casahmi ni táha ngaxtun ne, hacuaha ha me vëhë ni casahmi me táha cahntsua. ⁴¹Peru xi hinchá cahntsua ne, vëhë tuhun sacuaha caridad. Sá xi cuatjin nihñu ne, yëjë ni xcusun ne, tyjahi xi cuma nuju.

⁴²Peru jemu chojyihí tsujun ngayun xuta fariseo, tsëhë xi ngayun ne, handasa nihñu cuidadu xi tuhun diezmu nuju hisca cojo nchurca cojo ruda cojo yëjë sa xcusun ndeya ne, peru nihñucunduun xi nihñu hacutjin xi cjuaquixi cojo xingun, hacuaha nihñucunduun xi nihmutacún Nina. Ngayun ne, meje rë xi ha canihñucunduun Nina, peru hacuaha hacuiin nichayun diezmu nuju vë.

⁴³Hacuaha jemu chojyihí tsujun ngayun xuta fariseo, tsëhë xi ngayun ne, jemu ndama nuju xi cuatjin satë nuju cahndé xi matitjun tsëhë cahntsua yungun. Hacuaha jemu ndama nuju xi cuatjin fi chja xuta nina cojo nuju ngajan ngajñi ndetsin.

⁴⁴Hacuaha jemu chojyihí tsujun ta, handasa matsijin ne, peru jemu chocun xahasen nuju. Vëhë xi tangun ngayun cojo tsjun xi hisca matsijin, hane xuta ne, hisca machayiin rë me cjui nduva me sune me xcun. —Cuatjin xu cachja Jesús.

⁴⁵Ngajan xi ngu cha xi vicuya cjuachacun ne, cachja xu cha cuitjin cojo Jesús:

—Maestro, hya xi nújun cjua vëhë ne, hacuaha cojo ngayin choho nújun tsijin. —Cuatjin xu cachja cha.

⁴⁶Hane Jesús ne, cuitjin xu cachja me:

—Hacuaha cojo ngayun cha xi vicuya cjuachacun, jemu chojyihí tsujun, tsëhë xi vicuyun rë xuta jemu cjin xcusun xi jemu chja camahani cuma sahmichihin me, hane suvun ne, visecuún rë me hisca hitsë.

⁴⁷Jemu chojyihí tsujun ngayun ta, tsëhë xi ngayun ne, nindujun tsjun ndacun tsëhë yëjë ni nima profeta xi xutachanga nuju catsiquehen me hatsëë nixtin. ⁴⁸Ngayun suvun ningacun xi chuya nuju xcusun xi casahmi xutachanga nuju ta, tsëhë xi ngu ladu ne, me vëhë catsiquehen me profeta xi cuacun vë, hane ngu ladu nga ne, ngayun nindujun tsjun rë.

⁴⁹Vëhë xi Nina, me xi jemu vechútaha cjuatacun rë me ne, cachja me cuitjin: “Tsingátju profeta cojo apóstol ngajñi rë xuta xi siu nixtin vihi, hane yahnga me xi cuacun vë ne, tsiquehen xuta me, hane yahnga me ne, sua xuta cjuañihí xi cuatju me xi cuacun vë.” Cuatjin cachja Nina. ⁵⁰Hane cojo chuva vëhë ne, xuta xi siu nixtin vihi ne, me vëhë cháha rë me tsëhë cjuaveya rë yëjë profeta xi cahme hisca ntsacu cavetsihin ngasunhndë, ⁵¹vetsihin cojo hisca cjuaveya rë xutachanga naja Abel vijnetaha cojo hisca cjuaveya rë xutachanga naja Zacarías, me xi catsiquehen rë xuta tiña ngasuncun hiscan ndatsen rë ndava Nina. Cuichjá nga

cojo nuju ta yějě cjuaveya xi cuacun vë ne, cháha rë xuta xi siu nixtin vihi.

⁵²Jemu chojyihí tsujun, ngayun cha vicuya cjuachacun ta, tsëhë xi cavejñuxun cjuatacun rë Nina. Canitjungun cjuatacun rë me, hacuaha hisca catuun cahndé xi sacú rë xuta xi meje rë me cjuatacun rë Nina jan. —Cuatjin xu cachja Jesús.

⁵³Hane hya xi tivetju xu Jesús tsëhë cahndé hiscan cajinë me niñu jan ne, cha xi vicuya cjuachacun cojo cha fariseo jan ne, jemu cjan rë cha, jemu cjín cjuca cafahataha xu cha me, ⁵⁴hacuaha jemu cavangui xu cha chuva rë hacutjin xi sacú rë cha ngu cjuca rë me xi cuaintjin cuichja me.

Cjuandacha xi sahmi cha fariseo

12 Jínguyějě rë xi tichja sa xu Jesús cojo cha xi cuacun jan ne, jercu jima tangun camahani xuta, ña vehnchun xicjin me. Sehe ngajan xi Jesús ne, cavetsihin cachja xu me tjtutjun cojo xuta ladu rë me cuitjin:

—Xicaninguisuhunjñuu cojo cha fariseo xi cuacun vë ta, tsëhë xi cjuandacha xi sahmi cha ne, tangun cojo san rë pan xi hatuxa vitsojo ngajñi rë yějě ni nahyu. ²Yějě ni xcusun xi casetsanguí ne, cuechú nixtin xi chjaháxin rë xi titsanguí rë. Vëhë xi yějě ni xcusun xi hma ne, handasa sehmangui ne, peru cuechú nixtin xi cuetjucaa tsejen. ³Yějě ni cjuca xi má hiscan jñu ne, cuechú nixtin xi cuinuhya rë hiscan hasen. Vëhë xi yějě ni cjuca xi má táha hma ne, cuechú nixtin xi cuinuhya rë táha tsejen.

Yo xi meje rë xi rcún

⁴Nguehe cuichjá cojo nuju, ngayujun ni. Xicarcuun xuta xi tsiquehen nuju me, hane ngaxtun vëhë ne, ha quihndé tsajin mé sa xi cuma sahmi me cojo nuju. ⁵Peru guehe cuichjá cojo nuju yo xi meje rë xi rcún. Meje rë xi Nina xi rcún me. Me xi ngaxtun xi ha catsiquehen nuju ne, tjin rë me cahndé xi tsingatjenya nuju me hiscan xi má hasen rë nima castigu. Cuichjá nga cojo nuju ta hatuxa me vëhë xi meje rë xi rcún me.

⁶Chutsujun ta hñú chu nisë langa ne, jemu xtengui chji rë chu. Peru Nina ne, tsichayaain me hisca xi ngu chu. ⁷Hacuaha ngayun ne, hisca tsjarcun xqui tjin rë Nina. Vëhë xi xicarcuun ta, tsëhë xi jima ngu ngayun ne, hitsë sa jercu vengui chji nuju xi cuma rë xi jemu cjín chu nisë vë.

Xuta xi tsinguixi me xi xuta ladu rë Jesucristu má me

⁸Nguehe cuichjá cojo nuju ta yějě xuta xi tsinguixi me xcun xuta xi yahnga xi xuta ladu naha má me ne, hacuaha ngahan xi Quihndi rë Xuta jain ngahan ne, tsinguixë xcun yějě ni ángel rë Nina xi xuta ladu naha má xuta xi cuacun vë. ⁹Peru yějě xuta xi tsinguixi me xcun xuta xi yahnga xi hacuian xuta ladu naha má me ne, hacuaha hacuanitjin ni tsinguixë ngahan xcun ángel rë Nina.

¹⁰Hacuaha yějě xuta xi choho chja me tsahan, ngahan xi Quihndi rë Xuta Jain ngahan ne, tsinchataha Nina me, sá xi cjuehya me

cjuaninchataha. Peru yějē xuta xi choho chja me tsēhē Hasen rē Nina ne, tsajin cjuaninchataha xi cuma rē me.

¹¹ Hya xi xuta nandya cjuaha nuju me cjuecojo nuju me xcun xutaxa rē yungun o sá xi xcun xutaxa rē ndihyavasen ne, hacuiin cumacjintacún tsēhē chuva rē hacutjin xi chjayunngun o tsēhē xi cuinújun ta, ¹² tsēhē xi ha hora vēhē ni ne, Hasen rē Nina cuichja cojo nuju mé cjua xi meje rē xi cuinújun. —Cuatjin xu cachja Jesús.

Mijí rē xi jercu nimeje cjuanchina

¹³ Hya xi camá ne, ngu xuta tsēhē ngajñi rē xutacjín jan ne, cachja xu me cojo Jesús cuitjin:

—Maestro, tinújun cojo cha vēhē xingueen, catisua cha ngahan xcusun xi satē ná xi cavejña nahmi niji hya xi cahme me. —Cuatjin xu cachja me.

¹⁴ Sehe ngajan xi Jesús ne, cuitjin xu cachja me:

—Peru ngahan ne, hacuiin xá naha xi ngahan cuátēcja xcusun xi satē nuju xingu xingu ngayun. —Cuatjin xu cachja Jesús cojo xuta jan.

¹⁵ Sehe cachja nga xu me cojo xutacjín jan cuitjin:

—Nechun cuidado, hacuiin jercu nimuju cjuanchina matsejen ta, tsēhē xi hacuiin ngatsē rē cjuanchina xi tjin naja matsejen ne, vēhē xi ndacun cjuahñu naja. —Cuatjin xu cachja me.

¹⁶ Ngaxtun vēhē ne, sehe cachja xu Jesús ngu ejemplu cojo xuta cuitjin:

—Cuejña ne xi ngu cha nchina jan matsejen ne, jercu ndaja camá xitjē

xcun nangui rē cha. ¹⁷ Hya xi camá ne, cuitjin catsingataha cacun cha: “¿Mé xi ndatjin sahme quihndē? Ha quihndē tsajin ná cahndē hiscan xinchandaja tutjé naha. ¹⁸ Ndatjin rē xi cuitjin sahme. Tsinguétsun ndihya hiscan hinchandaja tutjé naha, hane tsindaja xi hitsē sa yehe. Hane ngajan cuínchandaja yějē tutjé naha cojo ngu tsé ngu xti sa xi tjin ná. ¹⁹ Hane sehe cuichjá cojo xahasen naha cuitjin: Jercu cjin camahani xcusun hinchandaja ná quihndē, hacuaha jemu cjin nu cjuecane rē. Cuitejñajenda quihndē. Sínē cuēhē tsahan. Suá cjuasua xahasen naha.” Cuatjin catsingataha cacun cha nchina jan. ²⁰ Ngajan xi Nina matsejen ne, cuitjin cachja me cojo cha: “Sca ri ngaye. Nguixun quihndē ne, cueye. Hane yějē xcusun xi cavetje ne, tsajin mé sacú ri tsēhē.” Cuatjin cachja Nina. ²¹ Cuatjin rē xuta xi jercu vetjo cjuanchina xi cuma rē suvá me, peru xcun Nina matsejen ne, tsajin mé xi tjin rē me. —Cuatjin xu cachja Jesús ejemplu vēhē.

Sahmi cuidado Nina xuta ladu rē me

²² Ngajan xi Jesús ne, cuitjin cachja xu me cojo xuta ladu rē me:

—Vēhē xi cuichjá cojo nuju ta: Hacuiin cumacjintacún tsēhē xcusun xi xinu xi sua nuju ngahñu. Hacuaha hacuiin cumacjintacún tsēhē tsjian xi chujun. ²³ Hacuiin cumacjintacún ta, tsēhē xi hitsē sa vengui chji rē cjuahñu nuju xi cuma rē xi chinu. Hacuaha hitsē sa vengui chji rē yojo nuju xi cuma rē tsjian xi chujun. ²⁴ Chutsujun

chu chenda ta hacuiin tsitjê chu, hacuiin fanga chu, hacuaha tsajin rê chu ndyahnga hiscan cuinchandaja chu xi sinê chu. Peru Nina tsicjen me chu. Ngayun ne, hitsê sa jercu vengui chji nuju xi cuma rê chu nisê. ²⁵Hacuaha tsajin hisca xi ngu xuta xi cuma cuesuntaha me cjuahñu rê me hisca ngu hora ngatsê rê xi ma cjin cacun me. ²⁶Sá xi hitsê lihndi xcusun vêhê maji nihñu ne, ¿mé má jercu macjintacún tsêhê xcusun xi yahnga jan ni?

²⁷Chutsujun naxu liriu ta tsihyaain nachjun hacuaha fahyaain tsjian. Peru ngahan cuichjá cojo nuju ta tsjian rê xutachanga naja Salomón ne, handasa jercu ndacun camahani, peru hitsê sa ndajiyihí ngu naxu vêhê. ²⁸Sá xi cuatjin tsicaja Nina xca nguijña xi ngu nixtin ne siutahá nguijña, hane xitu ngu nixtin ne cueti ne, hitsê sa ngayun ta hatuxa tsicaja nuju me, ngayun xi cjêê cumangutacúnndujun cojo me. ²⁹Hacuiin jercu nijendun rê xahasen nuju xi vinchunsun xi xinu xi sihun ta, ³⁰tsêhê xi xcusun vêhê ne, yêjê xutaxín tsêhê jingujyê ni ngasunhdê ne, me vêhê xi vangui me xcusun vêhê. Peru ngayun ne, Nina Nahmi naja ne, ha vêê me xi hatuxa sahmi ngujyê xi sacú nuju xcusun vêhê. ³¹Catamarcun nuju tsêhê gobiernu xi sahmi Nina, hane xcusun vêhê ne, quitahácoo sa sacú nuju.

Cjuanchina xi tacun ngahnga

³²Xicamacjiintacún ngayun xuta ladu naha xi jemu chúva má

ngayun ta, tsêhê xi Nina Nahmi naja ne, ha cavejña cacun me xi cojo cjuandaja rê me ne, sua nuju me xá xi nihñu gobiernu hiscan xi sahmi me gobiernu. ³³Titeñu xcusun xi tjin nuju, hane tujún xi sacú nuju ne, tuhun rê xuta xi tsajin rê me, sacuaha tuhun ngu caridad. Nihñu ngujyê xi sacú nuju cjuanchina xi jercu cjuecani rê. Cuma cuinújan ne, ngu cjuanchina xi tsajin nixtin cjuê xi cuetjún ngajan ngahnga hiscan xi cha chêjê ne, maji ma tiña cha, hisca chu quixún ne, tsinguetsiin chu. ³⁴Cuatjin meje rê xi nihñu ta, tsêhê xi hiscan tetjo cjuanchina nuju ne, hacuaha ngajan quitahá cjuatacun nuju.

Meje rê xi tjinchjine ngayaan tsêhê xi cjuehe Nai naja

³⁵Tuhunchjину yojo nuju, hacuaha catisetí ni ndihi nuju, tsêhê xi cjuehe Nai nuju. ³⁶Nihñu sacuatjin sahmi hndixahan xi viyujuya me nai rê me, hya xi nai rê me quiji ngu ndava suhi. Siuchjine ni me cojo sa xi hora xi cjuehe nai rê me ne, xi tu cuichja ne, ngutjen cjue scuxaha me tingotjo xi cuisehen nai rê me. ³⁷Jemu ndaja tsêhê yêjê hndixahan xi, hora xi cjuehe nai rê ne, sacútsja rê xi siu quicun. Nguehe cuichjá cojo nuju cjuaquixi ta, xi scuêê nai rê hndixahan jan xi cuatjin quicun hndixahan ne, cuêhêchjine me yojo rê me, sehe cjuecojo me hndixahan xcun maxê, sehe cuiyuju me xi sinê me. ³⁸Jemu ndaja tsêhê hndixahan xi sacútsja rê nai rê xi siu quicun, handasa nixten

cjuehe me o sá hisca tiña sahasen cjuehe me. ³⁹Hacuaha meje rē xi cumachaya nuju cjuatacun vihi: sá xi nai rē ngu ndihya ha machaya rē me hora xi cuinduva cha chējē ndava me ne, suaain me cahndē xi scuxaha cha ndava me, sehe tsichējē cha. ⁴⁰Hacuanitjin ni meje rē xi ngayujun ni ngayun ne, tuhunchjinu yojo nuju ta, tsēhē xi hora xi ningatuuntacún xi cjuēhē ngahan xi Quihndi rē Xuta Jain ngahan ne, hora vēhē rē cjuēhē. —Cuatjin xu cachja Jesús.

**Xuta xi vihndē cojo xi
vihndiin tsēhē Nina**

⁴¹Hya xi camá ne, Pedru ne, cuitjin xu cachja me cojo Nai naja: —Tatá. Ejemplu xi canújun vē ne, ¿há suvin ni ngayin xuta ladu nuju meje rē xi cuetihinrcuin?, o há tsajin ne, ¿há cojo yējē sa xuta xi yahnga cuetaharcu me? —Cuatjin xu cachja Pedru.

⁴²Ngajan xi Nai naja ne, cuitjin xu cafayangui me:

—Ngayujun ni ne, meje rē xi nihñu sacuaha sahmi ngu hndixahan xi jemu quicun cacun xi sahmicihin yējē ni hacutjin xi meje rē nai rē, ngu hndixahan xi cjuahaxa xi cjuahacuenda rē yējē sa hndixahan xi hora tjin sua xi sinē. ⁴³Jemu ndaja tsēhē ngu hndixahan xi, hora xi cjuehe nai rē ne, sacútsja me hndixahan jan xi tisahmi tutjin xi casuaxa rē nai rē. ⁴⁴Cuichjá cojo nuju cjuaquixi ta, nai rē hndixahan vēhē ne, suaxa me hndixahan vēhē xi hacuaha cjuahacuenda yējē sa xcusun xi tjin rē me. ⁴⁵Peru cuejña ne xi hndixahan vēhē ne,

tsingataha cacun cojo cjuatacun rē cuitjin: “Nai naha ne, tijima tafi sa xi cjuehe me.” Cuatjin tsingataha cacun. Sehe cuetsihin cuaja rē hndixahan xi yahnga jan, hacuaha cuetsihin cuatjutaha sinē cuihi hisca cuma chihi. ⁴⁶Peru cuechú ngu nixtin xi tsajin tacunya hndixahan vēhē, ngu hora xi hisca hvíin ne, hya cjuehe nai rē, hane jemu jyē castigu sahmi me. Sehe tsingatju me cuatjutangun cjuañihi cojo hndixahan xi yahnga xi casahmichiin tutjin xi casatēxa rē.

⁴⁷Hndixahan xi ha ndaja vēē hacutjin xi meje rē nai rē hane cavihinchjinii, hacuaha casahmii tutjin meje rē nai rē ne, jemu sehen camahani rē. ⁴⁸Peru hndixahan xi hvíin hacutjin xi meje rē nai rē hane casahmi xcusun xi vechú chuva rē xi cuma castigu ne, chúva sehen rē. Hane yējē ni hndixahan xi jemu cjin xcusun xá casua nai rē xi sahmi ne, hacuaha cuatjin jercu cjin cjua chjahya rē hya xi sahmi entregadu cuenta rē.

**Sahmi Jesucristu xi sahmi
condra xuta xicjin me**

⁴⁹Ngahan ne, canduvá ne xi cuétaha rē sacuaha ngu ndihi ngasunhdē, ngu ndihi xi tsingacun mé cún cjuatacun rē xuta. Hacuaha jemu meje ná xi ha hisca ha casetaha rē. ⁵⁰Ngahan ne, tjin ná xi cuátju ngu cjuañihi sacuatjin rē ngu xuta xi tjin rē me xi satē rē me nandá hya xi xtenda me. Hacuaha jercu choho má ná hisca xi cuma chihin cjuacjintacun vēhē. ⁵¹Xi má nuju ngayun ne, ¿há cjuajeya canduvácojo xi cuma rē

xuta ngasunhndë? Hacuini cuatjin. Ngahan ne, canduvá ne xi sahme xi sahmi condra xuta xicjin me. Cuatjin sahmi condra xicjin me ta, tsêhë xi ngujo me ne, cumangu cacun me cojo ná, hane ngujo nga me ne, cumanguaain cacun me cojo ná. ⁵²Xi cuetsihin nixtin vihi ne, hisca cojo xi cjuiniji sa ne, cuejña ne xi ngu ndihya ne, siu hñú xuta cojo xicjin me. Hane jyan me ne, sahmi condra me me xi jo jan. Hane me xi jo jan ne, sahmi condra me me xi jyan jan. ⁵³Nahmi ne, sahmi condra me cha quihndi rë me, hane cha quihndi rë me jan ne, sahmi condra cha nahmi rë cha. Naa ne, sahmi condra me na quihndi rë me, hane na quihndi rë me ne, sahmi condra na naa rë na. Nahya ne, sahmi condra me jahnda rë me, hane jahnda rë me ne, sahmi condra na nahya rë na. —Cuatjin xu cachja Jesús cojo xuta ladu rë me.

**Camamiji cuijne rcu xuta
xcusun xi casahmi Jesucristu**

⁵⁴Hya xi camá ne, cachja nga xu Jesús cojo xutacjín jan cuitjin:
—Nguehe nangui naja matsejen ne, hya xi chutsujun xi tivisecún ngu yufí ngajan táha ladu vetje tsuhi matsejen ne, ngutjen nújun ta cuaha ngu tsi hñu, hane cuatjin jain má. ⁵⁵Hane hya xi vanga ngu tjo xi cjui táha ladu ngatihin matsejen ne, ngayun matsejen ne, nújun ta cuma suë, hane cuatjin jain má. ⁵⁶Jemu hyun mé vijne xcusun xi cún nangui cojo xcusun xi cún ngahnga. ¿Mé má nújun xi hyúun mé vijne xcusun xi tijima nixtin vihi ni? ¡Jemu ndacha ngayun!

**Meje xati rë xi cuichancjan si xi
tacun ngajñi naja cojo Nina**

⁵⁷Hane ngayun matsejen ne, ¿mé má nichuvuun suvun cojo cjuatacun nuju xcusun xi cjuaquixi ni?
⁵⁸Ndiya tivangun cojo xuta xi meje cuinchajyë nuju ngajan xcun xutaxa rë matsejen ne, nihñu ngahñu xi cuisuhun cjuandaja cojo me, cojo sa xi xticja si xi tacun ngajñi nuju cojo rë me matsejen ta, sá tsajin ne, cjuecojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane mayu jan matsejen ne, cjue cueyá nuju me ndavaya.
⁵⁹Hane cuichjá cojo nuju cjuaquixi matsejen ta hatuxa cuetjuun tsêhë ngajan jinguyëjë rë xi cjëë cuechjun yëjë ni tujún xi quitjun. —Cuatjin xu cachja Jesús.

**Sahmi ngujoyë xi nindeyan
cjuatacun naja**

13 Ha hora vëhë ni ne, cafehe xu ngujo xuta hiscan tacun Jesús. Hane cachja xu me cojo Jesús tsêhë ngujo xuta tsêhë distritu Galilea xi cavitexa Pilatu xi cueya hya xi titsiquehen xuta xi cuacun vë chu rë me xi sua me cjuatjo cojo Nina.

²Ngajan xi Jesús ne, cuitjin xu cachja me cojo xuta xi cachja cojo rë me jan:

—Hane tsêhë xi cuatjin cahme ngujo xuta Galilea xi cuacun vë ne, ¿há vëhë xi má nuju xi hitsë sa tsehen me xi cuma rë yëjë sa me xi yahnga? ³Jéya, hacuini cuatjin. Peru sá xi ngayun nindeyuun cjuatacun nuju ne, ngayujun ni

ne, hacuaha cuatjin cueyun. ⁴O há tsajin ne, xuta xi tyjuhunjyan xi cahme hya xi caticjane rë torre tsëhë Siloé jan ne, ¿há má nuju xi hitsë sa tsehen me xi cuma rë yëjë sa xuta xi caviyuju ngajan Jerusalén? ⁵Jéya, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun. —Cuatjin xu cachja Jesús.

Ejemplu tsëhë ya xi cavaquiin tú rë

⁶Sehe ngajan xi Jesús ne, cachja sa xu me ngu ejemplu cojo xuta jan, cojo sa xi sua me cumachaya rë xuta xi jemu chúva camá nixtin xi cuma tsindeya xuta cjuatacun rë me. Cuitjin cachja me:

—Cuejñaa ne xi ngu ya túhaxi jan ne, secun xcun nangui rë ngu cha jan. Hane xi canduva cha xi tsëhë jan, vanguise cha tú rë ne, casacuiin rë cha. ⁷Sehe ngajan xi cachja cha cojo cha mosu rë cha cuitjin: “Ha tjin rë jyan nu xi vinduva vanguësë tú rë ya vi ne, sacuiin ná. Tiche. ¿Mé má tu cuenda cuisecun tsinguetsun rë nangui?” Cuatjin cachja cha xi tsëhë jan. ⁸Ngajan xi cha mosu jan ne, cuitjin cafayangui cha: “Tatá. Tuhun rë cahndé catiseacun ndastu ngu nu sa, hane cuacján nangui rë, hacuaha cuíncha rë abono. ⁹Xi cuatjin ne, ¿há suaain tú rë nduva nga ngu nu? Hane sá xi hacuaha ni suaain tú rë ne, sehe cuichan.” Cuatjin cafayangui mosu jan. Cuatjin xu fi ejemplu xi cachja Jesús.

Casahmi Jesucristu xi camandaja ngu chjuun nixtin xi chjahájenda rë

¹⁰Ngu nixtin xi chjahájenda rë, hya xi tivicyua xu Jesús cahntsua

ngu yungun jan ne, ¹¹ngajan tacun ngu chjuun xi ha cjuí tyjuhunjyan nu xi camaticua na hane ha quihndë maji xu ma quixi nínnda ngaxtun na. ¹²Xi cavëë Jesús na ne, cajindaya xu me na, sehe cachja me cojo na cuitjin:

—Ngayun tsan ne, ha camandaya ngayun tsëhë xi cuatjin jyihi ngayun vë. —Cuatjin xu cachja Jesús.

¹³Hane ha hora vëhë ni cavisanetsja xu me na, hane ngutjen ni camaquixi nínnda ngaxtun na. Hya xi camá ne, casahmi jyë casahmi hnga xu na Nina. ¹⁴Peru presidente rë yungun jan ne, jemu camacjan xu rë me tsëhë xi casahmi Jesús xi camandaja ngu chjuun nixtin xi chjahájenda rë. Vëhë xi cachja xu me cojo xutacjín jan cuitjin:

—Tjin naja jyun nixtin xi nihña xá. Vëhë xi meje rë xi ngajñi rë jyun nixtin vëhë matsejen ne, hya nduvun xi cumandaja ngayun, hacuiin xi tu nixtin xi chjahájenda rë matsejen ne, hya cuinduvun. —Cuatjin xu cachja presidente rë yungun jan.

¹⁵Peru Nai naja ne, cuitjin xu cachja me:

—iJercu choho ningatuhuntacún! Jima ngu ngayun matsejen ne, hatuxa vuhunndayun ndyaja vuhunndayun burru nuju tsëhë cahndé rë chu xi cuangun nicuhun chu nandá, handasa nixtin xi chjahájenda rë. ¹⁶Hane na vihi xi xuta ladu rë Nina na hacuaha tjinñu rë Satanás na cahntsua tyjuhunjyan nu matsejen ne, ¿há ndaintjin xi sehenndaya na nixtin

xi chjahájenda rē ni? —Cuatjin xu cachja Nai naja.

¹⁷Hane xi cafē xu cachja Jesús cjuá vëhë ne, yëjë ni xuta xi má condra rē me ne, jemu camasava xu rē me. Peru yëjë sa xuta xi yahnga ne, jercu ndaja camá xu rē me tsëhë yëjë ni xcusun ndaja xi casahmi Jesús.

Ejemplu tsëhë tutjé lihndi

¹⁸Hacuaha cachja sa xu Jesús ejemplu vihi:

—Gubiernu xi sahmi Nina ne, ¿mé xi tangun cojo? ¹⁹Tangun cojo ngu tutjé xi jemu lihndi camahani. Hya xi ngu xuta tsitjé me tutjé vëhë xcun nangui rē me ne, cuetju, cuma ngu ya, hisca nisë xi vitjen chu ngahnga ne, sahmi chu ndava chu rcu. —Cuatjin xu cachja Jesús.

Ejemplu tsëhë san rē pan

²⁰Cavuya cachja nga xu Jesús cuitjin:

—Gubiernu xi sahmi Nina ne, ¿mé xi tangun cojo? ²¹Tangun cojo san rē pan xi visecjan ngu chjuun ngajñi rē nahyu rē pan cojo sa xi sahmixa ngajñi rē yëjë ni nahyucjín jan. —Cuatjin xu cachja Jesús.

Ejemplu tsëhë tingotjo xcu

²²Ndiya cjuí xu Jesús ngajan Jerusalén ne, cavatju xu me nandya cojo ranchun xi siu ndiya cjuí me jan, hane cachja me cojo xuta cjuá rē Nina. ²³Hya xi camá ne, cavinenguise xu ngu me xi cavinenguise rē Jesús cuitjin:

—Tatá. ¿Há jemu chúva xuta xi tivetjutje me? —Cuatjin xu cavinenguise xuta jan.

Sehe ngajan xi Jesús ne, cachja xu me cojo xuta xi siu jan cuitjin:

²⁴—Nihñu ngahñu xi cuma cuisuhun hiscan sahmi Nina gobiernu táha tingotjo xi xcu ta, tsëhë xi nguehe cuichjá cojo nuju ta cuechú nixtin xi jemu cjín xuta xi cuma meje cuisehen me jan, peru cumaji. ²⁵Ta hya xi ngahan xi nai rē cahndé vëhë ngahan, cuinduva cuéchja tingotjo ne, ngayun ne, cuinechun candatsen, sehe cjunntsun tingotjo jan hacuaha cuitjin cuinújun: “Tatá. Chuxuhun tingotjo tsijin.” Cuatjin cuinújun. Hane xi cjuayanguë tsujun ne, cuitjin cuichjá: “Hveen jani canduvun ngayun.” Cuatjin cuichjá cojo nuju. ²⁶Hane ngayun ne, cuitjin cuinújun nga: “Cachini cahyin tangun cojo nuju, hacuaha nangui niji canujyuhunyun cavicuyun cjuá rē Nina.” Cuatjin cuinújun. ²⁷Hane cuitjin cuichjá nga cojo nuju: “Hveen jani nandya nuju. Tángunxun tsahan, ngayujun ni ngayun xuta sahmi cjuatsehen.” Cuatjin cuichjá. ²⁸Ngajan ni ne, jemu chjihndun hacuaha nijanurii nehñu, hya xi chutsujun Abraham cojo Isaac cojo Jacob, cojo yëjë profeta xi siu me ngajan hiscan xi sahmi Nina gobiernu, peru ngayun ne, caviyujú nuju candatsen. ²⁹Hane cuinduva xuta tsëhë táha ladu vetjucaa tsuhi cojo táha ladu vetje tsuhi cojo yëjë sa ladu, cuinduva me sinë tangun me hiscan xi sahmi Nina gobiernu. ³⁰Nguehe cuichjá cojo nuju ta yahnga xuta xi tjengui me quihndë ne, me vëhë cuma titjun me, hane yahnga me xi titjun quihndë ne, me vëhë cuma

tjengui me hya xi cuejña Nina gobiernu rë me jan. —Cuatjin xu cachja Jesús.

Jemu choho camá rë Jesucristu ngatsë rë xuta Jerusalén

³¹Ha hora vëhë ni ne, cafehe xu ngujo cha fariseo, hane cuitjin xu cachja cha cojo Jesús:

—Ndatjin xi tetjunxun tsëhë nguehe ta, tsëhë xi Herodes ne, meje tsiquehen nuju me. —Cuatjin xu cachja cha xi cuacun jan.

³²Hane ngajan xi Jesús ne, cuitjin cafayangui xu me:

—Tángun ne tinújun cojo rë chu ninda vë cuitjin: “Chutsujun ni, quihndë cojo nchujun ni ne, cuáxëxen xitsehen hacuaha sahme xi cuma ndaja xuta hmu rë, hane nguini ne, tsinguíjnetaha xá xi tisahme.” Cuatjin tinújun. ³³Peru hacuaha sahmi ná ngujoyë xi cjué sa quihndë nchujun ni cojo nguini hisca xi cjuëhë hiscan xi tifé ta, tsëhë xi profeta ngahan, hane ngu profeta ne, cumaji xi cueya jingusa nandya xi hacuiin nandya Jerusalén.

³⁴¡Ngayun xuta Jerusalén, ngayun xi cojo ndoyojo nicuhun profeta xi tsingatju Nina ngajñi nuju! ¡Jemu choho má ná! ¡Mé hitsë ndiya xi meje scávëvaha nuju sacuaha javëvaha ngu nisë quihndi rë chu xi cuincha chu ngahma tyjunga rë chu, peru ngayun ne, mijí nuju! ³⁵Chutsujun ni, Nina ne, catsismicacun me ngayun. Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: “¡Catsinchacun Nina me xi titsingatju me ngajñi naja!” —Cuatjin xu cachja Jesús.

Casahmi Jesucristu xi camandaja cha xi yaha rë chíhinsquee

14 Cuitjin camá xu ngu nixtin xi chjahájenda rë hya xi quiji cajnë Jesús niñu ndava ngu cha xi matitjun ngajñi rë cha fariseo. Xi cafehe Jesús jan ne, cha xi siu jan ne, siu tifahachuva xu ni cha Jesús. ²Hacuaha hiscan tacun Jesús ne, ngajan xu tacun ngu cha xi yaha rë chíhinsquee. ³Ngajan xi Jesús ne, cavinenguise xu rë me cha xi vicuya cjuachacun cojo cha fariseo cuitjin:

—¿Há tjin cahndé nixtin xi chjahájenda rë xi nihña xi cumandaja xuta, o há tsajin cahndé? —Cuatjin xu cavinenguise Jesús.

⁴Hane cha xi cuacun jan ne, tu caviyujujuu xu ni cha. Hya xi camá ne, cafaha xu Jesús cha hmu rë jan, hane casahmi me xi camandaja cha, sehe catsingatju me cha cafe cha. ⁵Sehe cavinenguise xu me cha xi siu jan cuitjin:

—¿Há tjin ngu ngayun xi nixtin xi chjahájenda rë ne, cuanguun marcu macjain naxun quihndi nuju o sá ndyaja nuju sá xi cjuinenguia ngu ndava nandá xi jemu nungun? —Cuatjin xu cavinenguise me.

⁶Hane cha xi cuacun jan ne, camaji cafayangui xu cha hisca xi ngu cjua xi meje rë Jesús.

Meje rë xi ninguijne yojo naja

⁷Hya xi camá ne, tsëhë xi vutsejen xu Jesús xi xuta xi cachjindaya rë tsëhë suhi jan ne, tivaxijin me cahndé xi matitjun ngajan xcun maxë ne, vëhë xi cachja xu me cojo xuta jan cuitjin:

⁸—Hya xi chjindaya nuju cuangun xinu ngu comida ne, xicachjuun cahndé xi matitjun ngajan xcun maxé ta sá tu hacuaha cachjindaya rë ngu me xi hitsé sa meje rë xi chjahárcun rë xi cuma nuju ngayun.

⁹Hane cuinduva me xi cajindaya nuju catsijotjun ni ne, cuichja me cojo nuju cuitjin: “Tuhun rë me vihi cahndé nuju vë.” Cuatjin cuichja me cojo nuju. Ngajan xi ngayun ne, cojo jyë cjuasava ne, cuangun chjuhun cahndé xi ma tjengui. ¹⁰Xi meje rë ne, hya xi cuatjin chjindaya nuju ne, tángun chjuhun cahndé xi ma tjengui, cojo sa xi hya xi cuinduva me xi cajindaya nuju ne, cuichja me cojo nuju cuitjin: “Ngayun ne, nduvun chjuhun ngu cahndé xi hitsé sa matitjun.” Cuatjin cuichja me. Ngajan xi ngayun ne, jercu sahmi jyë sahmi hnga nuju me ngajni rë yëjë xuta xi siu jan. ¹¹Cuatjin cuma ta, tsëhë xi yëjë xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me yojo rë me ne, Nina ne, sahmi yehe rë me.

¹²Hacuaha cachja nga xu Jesús cuitjin cojo me xi cajindaya rë me:

—Hya xi nihñu ngu suhi ne, xicachjindayuun rë amigu nuju, xicachjindayuun rë xingun, hacuaha xicachjindayuun rë xuta nchina xi siu tahndee ndya nuju, sá tu hacuaha squindaya nuju me xi cuangun ndava suhi rë me, hane cojo vëhë ni ne, ha camangojo cjuandaja nuju.

¹³Cahndé rë vëhë ne, hya xi nihñu ngu suhi ne, chjindayun rë xuta

yuma, chjindayun rë xuta xi yoho me, chjindayun rë xuta rengun, hacuaha chjindayun rë xuta rcá.

¹⁴Sá xi cuatjin nihñu ne, jemu ndaja tsujun ta, tsëhë xi xuta xi cuacun vë ne, tsajin rë me mé cojo sahmingojo me cjuandaja nuju. Peru Nina sahmingojo me tsujun hya xi tsicuya me cjuahñu xuta xi tsajin jyë rë. —Cuatjin xu cachja Jesús.

Ejemplu tsëhë ngu suhi jyë

¹⁵Hane xi cahndé xu ngu cha xi cojo tijinë jan cjuá xi cachja Jesús ne, cuitjin xu cachja cha cojo rë me: —iJemu ndaja tsëhë xuta xi siné me niñu hiscan xi sahmi Nina gobiernu! —Cuatjin xu cachja cha.

¹⁶Ngajan xi Jesús ne, casuacuenda xu me cha ngu ejemplu vihi:

—Cuejña ne xi ngu cha jan ne, casahmi cha ngu suhi jyë, hacuaha jemu cjín xuta cajindaya rë cha me. ¹⁷Xi casune hora xi siné cha cojo xuta ne, sehe catsingatju cha hndixahan rë cha ndava xuta xi ha cachja cha cojo xi cuichja hndixahan jan cojo rë xuta cjuá vihi: “¿Há cuangun xu ta, ha tjin chjine yëjë ni?” Cuatjin cachja hndixahan jan. ¹⁸Hya xi camá ne, cavetsihin jima ngu me cachja me mé tsëhë xi cumaji cjue me. Hane me xi tjutjun ne, cuitjin cachja me cojo hndixahan jan: “Ngu rquí nangui cavátsë ne, sahmi ná ngu jyë xi cjué scutséjen. Vëhë xi cumaji cjué ndava suhi.” Cuatjin cachja me. ¹⁹Hane ngu nga me ne, cuitjin cachja me: “Cavátsë hñú ninchin ndyaja, hane cjué cjuaháchuva chu. Vëhë xi cumaji cjué ndava suhi.” Cuatjin cachja me. ²⁰Hane

ngu nga me ne, cuitjin cachja me: “Cumaji cjué ta, tséhë xi ngahan ne, ha cavíxan.” Cuatjin cachja me. ²¹Hya xi camá ne, hndixahan jan ne, quiji cachja cojo nai rë cjuá xi cachja xuta xi cuacun jan. Hane xi camacjan rë nai rë ndihya jan ne, cuitjin cachja cha cojo hndixahan rë cha: “Tetji ne, tihin sanii ngajan ndiyatë cojo ndiyahndë tséhë ngajñi nandya ne, chjindaye rë xuta yuma cojo xuta yoho cojo xuta rcá cojo xuta rengun ne, ndovecueje me.” Cuatjin cachja cha. ²²Hane xi cavuya hndixahan jan ne, cuitjin cachja: “Tatá. Camá tutjin xi cavitexun ná, peru tjin sa cahndé.” Cuatjin cachja hndixahan jan. ²³Ngajan xi cachja nga nai rë hndixahan jan cojo rë cuitjin: “Tihin nga hisca ndiya nguñña, hane nihñi rë xuta nguñyë ndovecueje me, cojo sa xi catitsë rë ndya naha. ²⁴Nguehe cuichjá cojo ri ta hisca xi ngu me xi cajindáya rë tjun tjun ne, satiin rë me sinë me tséhë suhi xi tisahme.” Cuatjin cachja nai rë hndixahan jan. —Véhë cajnetaha xu ejemplu xi casuacuenda Jesús.

Meje rë xi nihña cuenta há scaa naja cuiseen ladu rë Jesucristu

²⁵Ngajan xi hya xi quiji sa xu Jesús ndiya rë me xi cjuí me Jerusalén ne, jemu cjin camahani xuta cjuí me cojo rë me. Hane xi cavuya me cavutsejen me xutacjin jan ne, cuitjin xu cachja me:

²⁶—Sá xi tjin ngu ngayun xi meje cuinduvuntjengun ná matsejen ne, meje rë xi hitsë sa nihmutacún ná ngahan xi cuma rë xi nihmutacún nahmi nuju, naa nuju, chjuun

nuju, quihndi nuju, xingun, hisca cojo yojo nuju suvun. Sá tsajin ne, cumaji cuma ngayun ngu xuta ladu naha. ²⁷Jarë ngayun xi nduvuntjengun ná matsejen ne, sá xi cuejñuhñuun xahasen nuju xi cuanguncujun ndiya naha handasa hisca cueyun xcun cru matsejen ne, cumaji cuma ngayun ngu xuta ladu naha. ²⁸Ha hyan matsejen ta hya xi ngu xuta meje sahmi me ngu ndihya jyë ne, titjun sahmi me cuenta rë me, há chutaha tujún rë me hisca xi tsinguijnetaha me sahmi me ndihya. ²⁹Cuatjin sahmi me cuenta rë me matsejen ta sá tsajin ne, sá xi ngutjen sahmi me xihndënaña rë hane cumaji tsinguijnetaha me sahmi me ndihya matsejen ne, yëjë ni xuta xi scuëë me matsejen ne, jemu cuejnuçëë me me. ³⁰Cuitjin cuichja me: “Cha xi cavetsihin casahmi ngu ndihya jyë vi ne, camaji catsinguijnetaha cha casahmi cha.” Cuatjin cuichja xuta. ³¹Hacuaha ha hyan matsejen ta hya xi ngu me xi matitjun cjue sahmi me ngu si jyë cojo jingu sa me xi matitjun xi condra rë me matsejen ne, titjun tsingataha cacun ndaja me, çhá scaa rë me cojo të mil xuta rë me xi sahmi me si cojo condra rë me xi ticojo can mil xuta rë? ³²Sá xi vutsejen me ta scaain rë me matsejen ne, jinguyëjë rë xi cjin sa nduva condra rë me matsejen ne, tsingatju me ngujo xuta xi tsinguijnehnchan cjuá. ³³Véhë xi ngayujun ni matsejen ne, meje rë xi cuatjin titjun ndaja ningatuhuntacún çhá scaa nuju, há scaain nuju? matsejen ta, tséhë xi yëjë ni ngayun xi nismutacuun

yějē ni xcusun xi tjin nuju matsejen ne, cumaji cuma ngayun xuta ladu naha. Cuatjin xu cachja Jesús.

Yo xi hacuiin ndaja tjengui rē Jesús ne, tangun cojo naxa xi fē xtya rē

³⁴Hacuaha cachja sa xu Jesús cojo xutacjín jan cuitjin:

—Ngayejen ni matsejen ne, ha hyan matsejen ta naxa matsejen ne, ndaja. Peru sá xi cjuē xtya rē matsejen ne, ¿hacutjin cuma xincha nga tutju rē ni? ³⁵Ha quihndē tsajin mé cumachjirēhē. Cumaji nicojonxan sacuaha nihndē, hacuaha cumaji nicojonxan sacuaha abono. Chjahá rē cuixu candatsen. Yo ngayun xi tjin nuju cjuasua xi cuinuhyun cju naha matsejen ne, ndaja tinuhyun. —Cuatjin xu cachja Jesús.

Ejemplu tsēhē chu tsánga xi cachajá

15 Ngundiya jan ne, jemu cjín xu cha faha tujúnsa cojo xuta tsehen xi yahnga jan quiji casahmi tiña me tsēhē Jesús, xi meje cuisinuju me cjuá xi cuichja Jesús. ²Hane cha fariseo cojo cha xi vicuya cjuachacun ne, cachjahma xu cha cojo xicjin cha cuitjin:

—Cha xi cuijyíhi vi ne, tsingatihin cha visiajmi cha cojo xuta tsehen hacuaha jinētangun cha cojo me. —Cuatjin xu cachjahma cha.

³Sehe ngajan xi Jesús ne, cachja xu me ngu ejemplu cojo cha xi cuacun vē cuitjin:

⁴—Cuejña ne xi ngu ngayun tjin nuju ngu cientu chu tsánga. Hane sá xi chajá ngu chu tsujun ne, hatuxa cuiyujuntuhun chu xi ñujuchan tyjuhunñuju jan nguijña

ne, sehe cuangun cuinchunsun ngu chu xi cachajá jan hisca xi sacú nuju chu. ⁵Hane xi sacú nuju chu ne, chjuhun chu cuesuntuhun chu xi jercu ndama nuju. ⁶Hane xi cjuhun ndya nuju ne, nihñutangun yějē xuta xi vinga nuju cojo me xi siu tahndee ndya nuju, hane cuitjin cuinújun cojo rē me: “Cuinechan cojo ná cjuasua ta casacu ná chu tsánga naha xi cachajá.” Cuatjin cuinújun. ⁷Nguehe cuichjá cojo nuju ta hacuaha hitsē sa jyē cjuasua cuejña ngajan ngahnga ngatsē rē ngu xuta tsehen xi tsindeya me cjuatacun rē me xi cuma rē ngatsē rē ñujuchan tyjuhunñuju xuta ndaja xi tsajin mé má tsindeya me cjuatacun rē me. Cuatjin xu cachja Jesús.

Ejemplu tsēhē tujún quicha xi cachajá

⁸Hya xi camá ne, cuitjin cachja nga xu Jesús ngu ejemplu:

—Cuejña ne xi ngu chjuun jan ne, tjin rē me tē tujún quicha xi jercu hnga chji rē. Hane sá xi tsichajá me ngu ne, hatuxa cuetaha rē me ndihi, sehe cuitecha me ndihya sehe cuanguise chichihin me hisca xi sacú rē me. ⁹Hane xi sacú rē me ne, sahmitangun me yějē xuta xi vinga rē me cojo me xi siu tahndee ndava me ne, hane cuitjin cuichja me cojo rē me: “Cuinechan cojo ná cjuasua ta casacu ná tujún naha xi catsichajá.” Cuatjin cuichja me. ¹⁰Nguehe cuichjá cojo nuju ta hacuaha jemu jyē cjuasua cuiyuju ángel tsēhē Nina ngatsē rē ngu xuta tsehen xi tsindeya me cjuatacun rē me. Cuatjin xu cachja Jesús.

**Ejemplu tsèhè cha xi catsismi
cacun ndava nahmi rè**

¹¹Hya xi camá ne, cuitjin cachja nga xu Jesús ngu ejemplu:
—Cuejña ne xi ngu me jan ne, tjin rè me jo quihndi. ¹²Hane cavechú ngunixtin xi cha quihndi ngascan tsèhè me vihi ne, cachja cha cojo rè me cuitjin: “Papá, tsèhè yèjè ni xcusun xi satè ná hya xi cueyun ne, meje ná xi tuhun ná quihndè.” Cuatjin cachja cha. Sehe ngajan xi nahmi rè cha jan ne, cavatècja me hacutjin xi satè rè xingu xingu quihndi rè me. ¹³Hane hacuiin tsèè ni jan ne, cha quihndi ngascan jan ne, xi casahmi tangun cha yèjè xcusun xi casatè rè cha jan ne, sehe cavetju cha quiji cha ngu nangui cjin. Hane xi cafehe cha jan ne, sehe cavetsihin cha tujyè catsicojo cha tujún rè cha, casahmi cha yèjè ni hacutjin xi ndama rè xahasen rè cha. ¹⁴Hane xi cafè catsicojo cha tujún jan ne, hya canduva ngu jindya jyè jingujyè ni ladu vèhè. Hya cavetsihin camachaja rè cha. ¹⁵Hya xi camá ne, cavetsihin casahmi cha xá sacuaaha mosu rè ngu me tsèhè nandya jan. Hane me vèhè catsingatju me cha xi cjue sahmi cuidadu cha chu chinga rè me ngajan ranchun. ¹⁶Hane tsèhè xi jemu vojo camahani rè cha ne, hisca meje sinè cha xi tijinè chu chinga jan, peru tsajin yo casua rè cha. ¹⁷Hane hya xi catsingataha cacun ndaja cha ne, cuitjin catsingataha cacun cha: “Yèjè mosu rè nahmi naha ne, tsajin mé machaja rè xi sinè, hane ngahan ne, tivèya jindya nguehe xi vojo

ná. ¹⁸Jemu sa rè ndaja ne, cúa cjué nga ndava nahmi naha, hane cuitjin cuichjá cojo rè me: Cahndeen tsèhè Nina hacuaha cahndeen tsujun.

¹⁹Ha quihndè vechiin chuva rè xi cuitejña cojo nuju sacuaaha quihndi nuju. Nihñucundun sacuaaha xi mosu nuju ngahan quihndè xi cavúya.” Cuatjin catsingataha cacun cha. ²⁰Hya xi camá ne, sehe cavuya cafe cha nangui rè cha xi cjue cha ndava nahmi rè cha.

’Peru cjin sa cjui cha tsèhè ndava nahmi rè cha ne, cavèè nahmi rè cha xi nduva cha, hane jemu camayuma rè me cha. Sehe vanga me quijitjengui me cha, catsuvacja me cha hisca cavitatsuha me cha. ²¹Sehe ngajan xi cavetsihin cachja cha cojo nahmi rè cha cuitjin: “Papá, cahndeen tsèhè Nina hacuaha cahndeen tsujun. Ha quihndè vechiin chuva rè xi cuitejña cojo nuju sacuaaha quihndi nuju.” Cuatjin cavetsihin cachja cha. ²²Peru nahmi rè cha ne, cachja me cuitjin cojo ngujo hndixahan rè me: “Tángunsanii, tángun chjuhun ngu tsjian xi tsjian ndaja jan ne, sehe nduvun nicujún cha quihndi naha vi. Hacuaha nduvuncujun ngu xtungun sehe teyun rcutsja cha, hacuaha nduvuncujun chuxinxte xi cuinchun ntsacu cha. ²³Xi camá vèhè ne, sehe tángun chjuhun ngu ndyaja xi ndaja hñu cacun chu cueya chu xinèè chu. Nihña ngu suhi, tahan cjuasua xahasen naja ta, ²⁴tsèhè xi cha quihndi naha vi ne, sacuaaha xi cahme cha hane sehe cavuya cha cjuahñu, sacuaaha xi cachajá cha hane sehe casacu nga cha.” Cuatjin cachja nahmi rè cha.

Hya xi camá ne, sehe cavetsihin casahmi me suhi.

²⁵Peru cha quihndi tjun rë me vihi ne, tsajin cha ta nguijña quiji cha. Hane xi camatiña cha tsëhë ndava cha xi cavuya cha xi quiji cha nguijña ne, cahndë cha xi fane tyjó ndava cha hacuaha tité xuta.

²⁶Hya xi camá ne, sehe cajindaya cha ngu cha hndixahan rë nahmi rë cha, sehe cavinenguisse cha mé jima jan. ²⁷Hane cha hndixahan jan ne, cuitjin cafayangui cha: “Cha tsuhun cavuya cha. Hane hacuaha cavitexa nahmi nuju xi cahme ngu ndyaja xi ndaja hñu cacun xi cuma suhi, tsëhë xi cavuya cafahtsja nga me xingun cojo ngu cjuahñu ndajiyi.” Cuatjin cafayangui hndixahan jan. ²⁸Peru cha quihndi tjun jan ne, jemu camacjan rë cha, hisca ndihya mijí cuisehen cha. Hane xi cavetju nahmi rë cha ne, jercu cjin cachja me cojo cha xi cuisehen cha ndihya. ²⁹Ngajan xi cha vëhë ne, cuitjin cafayangui cha tsëhë nahmi rë cha: “Chutsujun ni, ngahan ne, ha jemu tsëë nduva nixtin xi tivisécoo nuju, hacuaha tsajin ngu cjua xi cahndeen tsujun xi canújun. Peru ngahan ne, hisca ngu tentsun catuun chu xi cueya chu xi sahme ngu suhi cojo amigu naha. ³⁰Peru quihndë xi cafehe cha quihndi nuju vë xi tu ngajan quiji catsicjë cha cjuanchina nuju cojo yachjin tsehen jan ne, canicuhun ngu ndyaja hñu cacun xi xinu cojo cha.” Cuatjin cafayangui cha. ³¹Hya xi camá ne, cuitjin cachja nga nahmi rë cha: “Ngaye tsan xi nchunchujun ni nechin cojo ná ne, yëjë ni xi tsahan ne, hacuaha

tsiji. ³²Ndatjin xi nihña ngu suhi cuitjin, cuinechan cjuasua ta, cha tsajan vi ne, sacuaha xi cahme cha peru cavuya cha cjuahñu, sacuaha xi cachajá cha peru casacu nga cha.” Cuatjin cachja nahmi rë cha. Vëhë xu ejemplu xi cachja Jesús cojo cha fariseo cojo cha xi vicuya cjuachacun.

Ejemplu tsëhë cha xi matitjun tsëhë xa xi cuaaintjin casahmi

16 Hacuaha cachja nga xu Jesús cojo xuta ladu rë me ngu ejemplu cuitjin:

—Cuejña ne xi cavéjña ngu xuta nchina xi hacuaha tjin rë me ngu cha xi matitjun tsëhë yëjë ni xa rë me. Hane cha xi matitjun tsëhë xa jan ne, cavinchajyë ngu xi cavinchajyë rë cha cojo me xi tsëhë xa tsëhë xi jemu catsicojo cha tujún rë me xi matsijin mé casahmi cha cojo. ²Hane xi cajindaya me xi tsëhë xa jan cha ne, sehe cachja me cojo cha cuitjin: “Ngaye ne, cafahtantsa ngu jyé riji. Quihndë ne, nihñi ná entregadu cuenta tsëhë xa xi tacun ntse ta, ngaye ne, ha quihndë cumaji cuihinnduju cojo xa xi nechintehe.” Cuatjin cachja me. ³Sehe ngajan xi cha xi matitjun tsëhë xa jan ne, cuitjin catsingataha cacun cha: “¿Mé xi ndatjin sahme quihndë xi tivaxëxin ná nai naha tsëhë xa xi tejñataha? Ngahan ne, maji sahme xa xi hai. Hacuaha sava ná cjué cjuéhya caridad. ⁴Haan, ha hvë mé xi sahme cojo sa xi cjuahatsja ná xuta ndava me hya xi cuétjuxen tsëhë xa xi tejñataha.” Cuatjin catsingataha cacun cha. ⁵Hya xi

camá ne, cajindaya cha chuva ngu chuva ngu xuta xi quitjen tsêhê nai rê cha. Hane cuitjin cachja cha cojo ngu me: “Ngayun ne, ¿hacutjin quitjun tsêhê nai naha?” Cuatjin cachja cha. ⁶Sehe ngajan xi me xi quitjen jan ne, cuitjin cafayangui me: “Ngu cientu tonel tsêhê aceite.” Cuatjin cafayangui me. Hane cha xi matitjun tsêhê xa jan ne, cuitjin cachja cha cojo rê me: “Juhun xujun tsêhê cuenta nuju vi ne, tinechun sanii, nihñu sa ngu, hane tetuhun yachantê ni.” Cuatjin cachja cha. ⁷Hya xi camá ne, cachja nga cha cojo ngu nga me cuitjin: “Ngayun ne, ¿há cjín quitjun tsêhê nai naha?” Cuatjin cachja cha. Hane cuitjin cafayangui me xi quitjen jan: “Ngu cientu xutsu trigu.” Cuatjin cafayangui me. Hane cha xi matitjun tsêhê xa jan ne, cuitjin cachja cha: “Juhun xujun tsêhê cuenta nuju vi ne, nihñu sa ngu, hane tetuhun ñujuchan ni.” Cuatjin cachja cha. ⁸Ngajan xi xuta nchina xi nai rê xa jan ne, cavaxëndaja me cha tsehen xi matitjun tsêhê xa ngatsê rê xi jemu quicun cacun cha xi cuatjin casahmi cha. Hitsê sa quicun cacun xuta tsehen cojo ngasunhndê rê me, xi cuma rê xuta xi fitjengui me ndiya rê Nina.

⁹Nguehe cuichjá cojo nuju ngayun xuta ladu naha ta hacuaha meje rê xi chjuhun tujún nuju, handasa hatuxa tsehen ta tsêhê xi tsêhê ngasunhndê, hane nicujunxun, cojo sa xi cuinga rê xuta ngayun. Cuatjin nihñu cojo sa xi hya xi cuechú nixtin xi cueyun hacuaha ha quihndê cumachjiriin nuju tujún ne, cjuahatsja nuju Nina

ngajan hiscan xi cuinechan cojo rê me yêjê nu yêjê nixtin.

¹⁰Yo xi tjin rê cjuaquixi xi ndaja sahmi ngu xa xi chúva ne, hacuaha hatuxa tjin rê cjuaquixi xi ndaja sahmi ngu xa xi jyê. Hacuaha yo xi vindacha hya xi sahmi ngu xa xi chúva ne, hacuaha hatuxa vindacha hya xi sahmi ngu xa xi jyê. ¹¹Vêhê xi ngayun ne, sá xi vindachun hya xi nicujunxun tujún tsehen xi tsêhê ngasunhndê ne, hatuxa cuejñaai Nina ntsun cjuanchina xi cjuaquixi, xi tsêhê me. ¹²Hacuaha sa xi vindachun hya xi nicujunxun cjuanchina tsêhê jingu sa ne, Nina ne, hatuxa suaain nuju me cjuanchina xi cuma tsujun suvun.

¹³Tsajin ngu hndixahan xi ma fahacuenda xa tsêhê jo nai rê xa ta, tsêhê xi choho scuëê rê ngu nai rê hane tsihmu cacun nai rê xi majo jan. O sá tsajin ne, jemu cuetaha yojo rê cojo ngu nai rê, hane nai rê xi majo jan ne, hisca sahmicuendaain rê. Vêhê xi xi ngu ñahñu ni ne, maji nihñu hacutjin xi meje rê Nina cojo hacutjin meje rê cjuanchina tsehen xi tsêhê ngasunhndê. Cuatjin xu cachja Jesús cojo xuta ladu rê me.

¹⁴Cha fariseo, xi hacuaha jemu chuya rê cha tsêhê tujún ne, cahndê xu cha yêjê cjua xi cachja Jesús cojo xuta ladu rê me jan. Hane cavejnucêê cha Jesús. ¹⁵Ngajan xi Jesús ne, cachja xu me cojo cha cuitjin:

—Ngayun xi nújun cojo xuta xi jemu ndaja xuta ngayun, peru Nina ne, vêê me cjuatacun xi jiya cahntsua xahasen nuju. Hane cjuatacun xi sahmi yehe sahmi

hnga xuta ne, Nina ne, chuyiin camahani rë me tsëhë.

**Cumaji chjaháxin rë hisca
ngu cjua tsëhë ley rë Nina**

¹⁶Hya xi chaja sa tsujyihya Juan Vitenda Xuta ne, yëjë xuta ne, casacu camachaya rë me cjua rë Nina ngatsë rë ley xi cavejña Nina tsja Moisés, cojo ngatsë rë profeta xi hacuaha cachja me cjua rë Nina. Hisca nixtin rë Juan ne, hisca quihndë ne, tisuá ngahan tijimachaya rë xuta cjuandajyih xi chja xi Nina ne, sahmi me gobiernu. Hane yëjë ni xuta ne, meje cuisehen me hiscan sahmi Nina gobiernu, handasa cojo cjuachan.

¹⁷Ngahnga cojo nangui ne, hitsë sa chjaain cjuë xi cuma rë xi chjaháxin rë ngu cjua tsëhë ley rë Nina.

**Jyé rë xuta xi tsismi chjuun rë
sehe cuixan cojo jingu sa chjuun**

¹⁸Ngu xuta xi tsismi me chjuun rë me sehe cuixan me cojo jingu sa chjuun ne, tangun me cojo ngu xi sahmi cjuatsehen cojo ngu chjuun xi hacuain chjuun rë. Hacuaha yo xi cuixan cojo ngu chjuun xi xihin rë na ne, catsismi cha na ne, tangun cojo ngu xi sahmi cjuatsehen cojo ngu chjuun xi hacuain chjuun rë.

**Ejemplu tsëhë cha nchina cojo
cha yuma xi hmí rë Lázaro**

¹⁹Cuejña ne xi cavéjña ngu cha xi jemu nchina, xi jercu ndaja camahani tsjian vajú. Nchunchujun ni ne, jemu ndajyih suhi sahmi cha. ²⁰Hacuaha cavéjña ngu xuma cha yuma xi hmí rë Lázaro, xi jingujyë

ni yojo rë cha camatsë. Hane jiña cha ngajan tingotjo ndava cha nchina jan. ²¹Hane hacuaha cojo cha yuma jan jemu meje sinë cha hitsë xi vangui jinë cha nchina jan. Hatuxa jemu choho vatju cha má, hisca vinduva naña chimajnu chu tsë xi yaja rë cha. ²²Hya xi camá ne, xi cahme xuma cha yuma jan ne, quijicojo ángel hasen rë cha ngajan cahndë ndajyih, cavéjña tangun cojo hasen rë nima Abraham. Hane cha nchina jan ne, hacuaha cahme cha, hane caseyaniji cha.

²³Hane hya xi jiya hasen rë cha nchina jan cahndë hiscan xi fi hasen rë nima ne, jercu tivatju cjuañih. Hane xi cavuya cavutsejenniji hasen rë cha ne, cavëë rë hasen rë nima Abraham tsëhë cjin ni, hacuaha cavëë rë hasen rë nima Lázaro, tacun tangun cojo hasen rë nima Abraham. ²⁴Hya xi camá ne, cajindaya hasen rë cha nchina jan tsëhë hasen rë nima Abraham, cuitjin cachja: “Tatá Abraham, catamayuma nuju ngahan ne, tinújun cojo cha Lázaro vë ne, catitsicahnchi cha rcutsja cha cojo nandá, sehe ningatjun cha catinduva catitsinguijnehnchan cha hitsë neje ta, tsëhë xi jercu má camahani ná cojo ndih vi.” Cuatjin cachja hasen rë cha nchina jan. ²⁵Peru hasen rë nima Abraham ne, cuitjin cafayangui: “Ninguitsjin tsan ta xcun cjuahñu riji ne, jemu ndaja cavatji camá, hane xuma cha Lázaro vi ne, jemu choho cavatju cha camá. Peru quihndë ne, tisacu rë cha cjuetacun nguehe, hane ngaye ne, tivatji cjuañih.

²⁶Hacuaha tjin sa ngu cjua xi cuichjá cojo ri: Nina ne, cavejña me ngu xanga jyë xi jiyavasen tsëhë hiscan xi nechintihin ngayin cojo tsëhë hiscan xi nechintehe ngaye, cojo sa xi yo ngayin xi meje cuátjin xi cuinduvín ndyá ne, cumaji, hacuaha yo ngayun xi meje cuatjun cuinduvun nguehe ne, hacuaha cumaji.” Cuatjin cafayangui hasen rë nima Abraham. ²⁷Sehe ngajan xi hasen rë cha nchina jan ne, cuitjin cachja: “Tatá, nihñu favor ne, ningatjun cha Lázaro ngajan ndava nahmi naha, ²⁸cojo sa xi sua cha cumachaya rë catsihñú xingueen xi siu jan, cojo sa xi hacuini cojo cha cuechú cha cahndé vihi hiscan xi tacun cjuañihi xi tivatjin tijima.” Cuatjin cachja hasen rë cha nchina. ²⁹Hane hasen rë nima Abraham ne, cuitjin cachja: “Peru cha xi cuacun vë ne, cuma cuisñuju cha cjua xi ha catsihindu Moisés cojo cjua xi ha catsihindu profeta hatsëë nixtin. Vëhë catetaharcu cha.” Cuatjin cachja hasen rë nima Abraham. ³⁰Ngajan xi hasen rë cha nchina jan ne, cuitjin cafayangui: “Tatá Abraham, cumaji xi cojo cjua vëhë ni. Peru sá xi yo cuetju tsëhë ngajñi rë nima xi cjue cuichja cojo cha ne, ngajan xi tsindeya cha cjuatacun rë cha.” Cuatjin cafayangui hasen rë cha nchina jan. ³¹Peru hasen rë nima Abraham ne, cuitjin cachja: “Sá xi mijí cuihndé cha tsëhë cjua xi catsihindu Moisés cojo cjua xi catsihindu profeta ne, hacuanitjin ni cumacjaain rë cha, handasa ngu nima cuya cjuahñu, cjue cuichja cojo rë cha.” Cuatjin cachja hasen rë nima Abraham. Cuatjin xu

fi cjua xi cachja Jesús cojo cha fariseo cojo xuta ladu rë me.

**Miji rë xi nihña xi tsismicacun
ngu xuta ndiya rë Nina**

17 Ngu nixtin jan ne, hacuaha cachja xu Jesús cojo xuta ladu rë me cuitjin:

—Hatuxa cuinduva xcusun xi meje sahmi xi nismetacuun ndiya rë Nina, peru jemu chojyihí tsëhë xuta xi nduvacojo xcusun vëhë. ²Hitsë sa ndaja tsëhë xuta vëhë xi xtyangui ngu ndyojo natsi nguisin me sehe ningatjenya rë me ngajñi ndachacun, xi cuma rë xi sahmi me xi ngu xuta ladu naha tsismicacun me ndiya rë Nina.

³Nechun cuidadu tsëhë xcusun xi nihñu. Sá xi ngu xingun choho sahmi cojo nuju ne, tinújuntuhun rë. Hane sá xi tsindeya cjuatacun rë ne, ninchatuhun rë. ⁴Hane sá xi hisca yatu ndiya choho sahmi cojo nuju ngu nixtin, hane hacuaha jima ngu ndiya vëhë cjue cuichja cojo nuju xi tsindeya cjuatacun rë ne, ninchatuhun rë. —Cuatjin xu cachja Jesús.

**Cuma cuinuhyan tsëhë Nai
naja sá xi mangutacuun
ndastu hitsë cojo rë me**

⁵Ngajan xi apóstol ne, cuitjin xu cachja me cojo Nai naja: —Nihñu xi hitsë sa ndaja cumangu tacuín cojo nuju. —Cuatjin xu cachja me.

⁶Sehe ngajan xi Nai naja ne, cuitjin xu cafayangui me: —Sá xi mangutacún cojo ná ndastu hitsë ne, hacuaha cuma cuinújun cojo ya vihi catjixin tsëhë

cahndé hiscan secun, hane catji catiseacun ngajan ngajñi ndachacun, hane hacuaha cuihndé tsujun.

**Hacutjin meje rë xi sahmi
hndixahan cojo nai rë**

⁷Cuejña ne xi ngu ngayun ne, tjin nuju ngu hndixahan xi vacjan nangui tsujun o sá xi sahmi cuidadu rë chu nuju. Hane xi cjuehe hndixahan vëhë xi quiji nguijña ne, ¿há cuinújun cojo cuitjin: “Ndove sanii ne, xini niñu?” ⁸Jéya, hacuiin ta cuitjin cuinújun cojo: “Tehe chjini xi sínë, hacuaha tehe chjini yojo riji xi cuindove chani xi sínë xi cuëhë, hane xi cuijnetaha sínë ne, sehe xini sihi ngaye.” Cuatjin cuinújun. ⁹Hacuaha tuun nacuechji rë hndixahan vëhë tsëhë xi casahmi yëjë ni hacutjin xi cavitexun rë. ¹⁰Hacuanitjin nuju ngayun ta hya xi ha café canihñu yëjë ni hacutjin cavitexa nuju Nina ne, cuitjin meje rë xi ningatuhuntacún: “Ngahan ne, ngu hndixahan tujuyë ni ngahan ta xi casahme ne, hacutjin xi casatëxa ná ne, vëhë ni xi casahme. Cuatjin meje rë xi ningatuhuntacún.” Vëhë xu cjua xi cachja Jesús cojo xuta ladu rë me.

**Casahmi Jesucristu xi
camandaja të cha hmu rë**

¹¹Hane hya xi tivatju xu Jesús vasencja tsëhë distritu Samaria cojo distritu Galilea xi cjui me ngajan Jerusalén ne, cuitjin camá. ¹²Hora xi ha cuisehen me ngu nandya jan ne, nduvatjengui xu të cha me, cha xi yaha rë ngu xcusun chñhin vitaha xi setaha yojo naja. Hane caxinchacunhñu xu cha hitsë jan,

¹³hane tsëhë cjin ni cajindaya xu cha cachja cha cuitjin:

—i Tatá Jesús! iCatamayuma nuju ngayin! iNihñu xi cumandaja ngayin! —Cuatjin xu cajindaya cha cachja cha.

¹⁴Hane xi cavëë Jesús cha ne, cuitjin xu cachja me:

—Tángun hiscan xi siu nahmi, ningacun rë me yojo nuju xi tsajin mé cún ngayun. —Cuatjin xu cachja me.

Hane ndiya cjui cha ne, camandaja xu cha. ¹⁵Hya xi camá ne, xi cavëë xu ngu cha xi camandaja cha ne, cavuya quijitjengui xu cha Jesús, jindaya cha chja cha xi tisahmi jyë tisahmi hnga xu cha Nina. ¹⁶Hane xi cafehe xu cha hiscan secun Jesús ne, quiji caticjaxcun cha xcun me, xi tisua cha nacuechji rë me. Cha xi cuajyihí jan ne, cha Samaria cha. ¹⁷Sehe ngajan xi Jesús ne, cuitjin xu cavinenguise me xuta ladu rë me:

—¿Hacuiin yëjë të cha xi cuicun vi xi camandaja cha ni? ¿Cha xi ñaja sa ne, jarë cha ne? ¹⁸¿Há súvã ni cha xi cuijyihí vi xi ngu xutaxín cha xi cavuya cha xi sahmi jyë sahmi hnga cha Nina ni?

¹⁹Sehe cachja xu me cojo cha xi camandaja jan cuitjin:

—Tisatjunhngun, hane tjangun. Ngatsë rë xi camangutacún cojo ná ne, vëhë xi camandaja ngayun. —Cuatjin xu cachja Jesús.

**Hacutjin cuma hya xi cuinduva
Nina sahmi me gobiernu**

²⁰Cuitjin xu camá nga ngundiya. Cha fariseo ne, cavinenguise cha Jesús janihya cuinduva Nina sahmi

me gobiernu. Sehe ngajan xi Jesús ne, cuitjin xu cafayangui me tsëhë cha:

—Nina ne, hya xi cuinduva me sahmi me gobiernu ne, hacuiin titjun sua me cumachaya naja sehe cuinduva me. ²¹Tsajin yo cuichja: “Cuajyihi Nina nguehe”, o sá: “Cuajyihi Nina ngajan”; ta Nina ne, ha tisahmi me gobiernu ngajñi nuju. —Cuatjin xu cachja me cojo cha fariseo.

²²Hya xi camá ne, cuitjin xu cachja me cojo xuta ladu rë me:

—Cuechú nixtin xi jemu cuma meje chutsujun ná ndastu ngu hora, ngahan xi Quihndi rë Xuta jain ngahan, peru cumaji. ²³Yahnga me cuichja me cojo nuju: “Cuajyihi me nguehe”, o sá: “Cuajyihi me ngajan”; peru hacuiin cuangun cojo me, hacuiin cuanguntjengun me ta ²⁴sacuaha sahmi hasen ndihichuhún xi ha tu ñahñu sahmi hasen rë jingujyë ni ngahnga, hisca nguehe hisca ngajan ne, cuatjin ha tu ñahñu scutsejen ná xuta tsëhë yëjë ni ladu hya xi cuechú nixtin xi cuinduva nga ngahan xi Quihndi rë Xuta Jain ngahan. ²⁵Peru chaja sa xi cuechú nixtin vëhë ne, hatuxa meje rë xi jemu cjín cjuañihi cuátju cuma, hacuaha xuta xi siu nixtin vihi ne, tsitjungui ná me. ²⁶Sacuatjin casahmi xuta nixtin hya xi cavéjña xutachanga naja Noé ne, hacuanitjin ni sahmi xuta hya xi ngahan cuinduva. ²⁷Nixtin rë Noé vë ne, jinë jihvi xuta, vixan me, tsinguixan me quihndi rë me. Cuatjin sahmi cuaha me hisca nixtin xi cavisehen Noé cahntsua barcu, hacuaha casesuntë nandá,

hane ngajan cafë yëjë xuta cahme me. ²⁸Hacuanitjin ni xcusun vëhë casahmi xuta nixtin hya xi cavéjña ngu xutachanga xi hmí rë Lot: jinë hvi me, vatsë me, viteña me, vincha me tjë, hacuaha sahmi me ndihya. ²⁹Peru nixtin xi cavetju Lot tsëhë nandya Sodoma ne, cavixu ndihi tsëhë ngahnga, hacuaha cavixu ndyojo xi yaha rë ndihi, sacuaha xi cavaha ngu tsihñu, hane ngajan cafë yëjë xuta cahme me.

³⁰Hacuaha cuanitjin ni sahmi xuta hya xi cuinduva ngahan xi Quihndi rë Xuta Jain ngahan.

³¹Nixtin hya ne, xuta xi hinchasun me rcu ndava me ne, mé tsëhë me xi siu cahntsua ndihya ne, miji rë xi cuitujne me cjue jaha me. Hacuaha ha chuva vëhë ni ne, xuta xi siutahá me nguijña ne, miji rë xi cuya cjue me ndava me. ³²Ninguitsjun sacuaha xcusun xi cavatju nima chjuun rë Lot. ³³Yo xi meje cjuenduju cojo ngasunhndë rë cojo ngahñu rë suvá ne, cuechintaain cjuahñu xatsë; peru yo xi cuatju cjuañihi o hisca cueya ngatsë naha ne, vëhë xi cuechútáha cjuahñu xatsë.

³⁴Nguehe cuichjá cojo nuju ta nguixun nixtin hya ne, jo xuta cuiyujufë tangun me ngu nachan. Ngu me ne, chjaháxin rë me, hane me xingu jan ne, cuejña me. ³⁵Hacuaha jo nga yachjin ne, cuiyujutahá na coho na. Ngu na ne, chjaháxin rë na, hane na xingu jan ne, cuejña na. ³⁶Hacuaha jo nga cha ne, cuiyujutahá cha nguijña. Ngu cha ne, chjaháxin rë cha, hane cha xingu jan ne, cuejña cha. —Cuatjin xu cachja Jesús.

³⁷Hane xuta ladu rë me ne, cuitjin xu cavinenguise rë me:

—¿Hane jani cuma xcusun vëhë ni, tatá? —Cuatjin xu cavinenguise me.

Sehe ngajan xi Jesús ne, cachja xu me ngu ejemplu cuitjin:

—Hiscan jiña chu xi cahme ne, hacuaha ngajan matangun chu lote. —Cuatjin xu cachja Jesús.

**Ejemplu tsëhë chjuun
cahan cojo juez tsehen**

18 Hacuaha cachja sa xu Jesús ngu ejemplu cojo xuta ladu rë me xi sua me cumachaya rë xi meje rë xi yasen ni ne, sahmi me oración rë me, miji rë xi sahmi chúva cacun me. ²Cuitjin xu cachja me:

—Cuejña ne xi ngu nandya jan ne, tjin ngu juez xi tsacjuiin rë Nina hacuaha faharcuaain rë xuta.

³Hacuaha nandya jan ne, tacun ngu chjuun cahan. Hane nchunchujun ni quiji na xcun juez jan ne, cachja na cuitjin: “Meje ná xi nihñucundun jyé xi vincha xuta tsahan.” Cuatjin cachja na. ⁴Peru juez jan ne, jemu jyë nixtin xi mijí sahmicuenda me tsëhë na. Peru xi camá ngascan ne, cuitjin catsingataha cacun me: “Handasa tsacjuun Nina hacuaha faharcuun xuta ne, ⁵peru ngatsë rë xi jemu tisuaxti na cahan vi ngahan ne, vëhë xi cjuahácuenda cjuacjintacun rë na, sá tsajin ne, jemu tsijenda na ngahan xi ngajan cjui ngajan nduva na.” Cuatjin xu catsingataha cacun me.

⁶Sehe ngajan xi Nai naja ne, cachja sa xu me cuitjin:

—Chutsujun hacutjin chja juez tsehen vë. ⁷Nina ne, çhacuiin

hatuxa cjuahacuenda me cjuacjintacun rë xuta xi cavaxijin me, xi nguixun nguitajñu fehya rë me xi cjuahacuenda me tsëhë? ¿Há jemu cuindeya cjuahacuenda me?

⁸Nguehe cuichjá cojo nuju ta Nina ne, ngutjen ni cjuahacuenda me. Peru hya xi cuinduva nga ngahan xi Quihndi rë Xuta Jain ngahan ne, ¿há tjin xuta xi mangucacun cojo ná guehe ngasunhndë? —Cuatjin xu cachja Nai naja.

**Ejemplu tsëhë oración rë cha fariseo
cojo oración rë cha faha tujúnsa**

⁹Hacuaha siu sa xu ngujo xuta xi tsingataha cacun suvá me xi tsajin jyé rë me xcun Nina hacuaha sahmi xta me cojo xuta xi yahnga. Hane xuta xi cuacun vë ne, cuitjin xu cachja Jesús ngu ejemplu cojo rë me:

¹⁰—Cuejña ne xi jo cha jan ne, quiji cha yungun xi matitjun xi sahmi cha oración rë cha. Ngu cha ne, cha fariseo cha, hane cha xingu ne, cha faha tujúnsa cha. ¹¹Cha fariseo jan ne, cavisekun cha casahmi cha oración rë cha cahntsua xahasen ni rë cha, cachja cha cuitjin: “Ngayun Nina, suá nacuehji nuju ta ngahan ne, hacuiin tangun ngahan cojo jingu sa cha xi ndacha cha, tsehen cha, tsindesu cha cojo jingu sa chjuun, hacuaha hisca tanguaain ngahan cojo cha faha tujúnsa vi. ¹²Sahme xun naha jo ndiya xi ngu totje, hacuaha vátëcja të cahndé tsëhë yëjë ni xi sacu ná, hane suá nuju ngu cahndé.” Cuatjin casahmi cha fariseo oración rë cha. ¹³Peru cha faha tujúnsa ne, hitsë ni cjin secun cha, hacuaha hisca cavuyaain cavutsejen

cha ngahnga ta tu cavisanetsja ni cha rcu cha, cachja cha cuitjin: “Ngayun Nina, catamayuma nuju ngahan xi jemu tjin jyé naha.” Cuatjin cachja cha. ¹⁴Cuichjá cojo nuju ta cha faha tujúnsa jan ne, xi tu cavuya cafe cha ndava cha ne, ha café jyé rë cha xcun Nina, peru cha fariseo jan ne, hacuiin cuatjin café jyé rë cha. Cuatjin camá ta, tséhë xi yëjë xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me yojo rë me ne, Nina ne, sahmi jyé rë me. —Cuatjin xu cachja Jesús.

Catsinchacun Jesucristu nixti

¹⁵Hacuaha cjuicojo xu xuta nixti rë me hiscan tacun Jesús xi cuisanetsja me nixti jan. Peru hya xi cavëë xu xuta ladu rë Jesús xi cuatjin cjui xuta cojo nixti rë me ne, cavatëcja xu me cjuatacun rë xuta jan. ¹⁶Peru Jesús ne, cajindaya xu me nixti jan xi cjuetjengui rë me, sehe ngajan xi cachja xu me cojo xuta ladu rë me cuitjin:

—Tuhun rë nixti cahndé catinduya tjengui ná. Xicanichuun rë cahndé ta, tséhë xi nixti xi cuacun ne, hatuxa visehen ngajan hiscan xi sahmi Nina gobiernu. ¹⁷Cuichjá cojo nuju cjuaquixi ta suvá ni xuta xi tsingatihin me xi sahmi Nina me gobiernu sacuatjin tsingatihin nixti ne, me vëhë ni xi cuisehen me hiscan xi sahmi Nina gobiernu. —Cuatjin xu cachja Jesús.

Jemu chja cuisehen xuta nchina ladu rë Nina

¹⁸Ngu xuta xi matitjun ne, cavinenguise xu me Jesús cuitjin:

—Ngayun Maestro, jemu ndaja ngayun. ¿Mé xi meje rë xi sahme cojo sa xi sacú ná cjuahñu xatsë? —Cuatjin xu cachja me.

¹⁹Sehe ngajan xi Jesús ne, cuitjin xu cafayangui me:

—¿Mé má cuatjin nújun xi ndaja ngahan? Tsajin yo xi ndaja. Ngu ni Nina xi ndaja me. ²⁰Ngayun ne, ha hyun hacutjin chja ley rë Nina xi chja cuitjin: “Xicanihñuu cjuatsehen cojo rë ngu chjuun o cojo rë ngu xihin xi hacuiin tsujun, xicanicuun xuta, xicanihñuu cjuachëjë, xicanujuun cjuandesu tséhë xuta, chjuhuncun nahmi nuju hacuaha chjuhuncun na nuju.” —Cuatjin xu cachja Jesús cjuarë rë Nina.

²¹Hane ngajan xi xuta xi matitjun jan ne, cuitjin xu cachja me cojo Jesús:

—Yëjë cjuarë vëhë ne, ha cáhndë tséhë hisca cjualihndi naha.

—Cuatjin xu cachja me.

²²Hane xi cahndë xu Jesús cjuarë me ne, sehe cachja xu me cuitjin:

—Tjin sa ngu cjuarë xi machaja nuju: yëjë ni xcusun xi tjin nuju ne, titeñu, hane sehe tichuncjun tujún rë ngajñi rë xuta yuma. Hane xi cuatjin nihñu ne, jemu jyé cjuanchina sacú nuju ngajan ngahnga. Hane xi cjuë cuichuncjun tujún vëhë ne, sehe nduvun tiseacun ná. —Cuatjin xu cachja Jesús.

²³Peru xi cahndë xu xuta xi matitjun jan cjuarë xi cachja Jesús ne, jemu va camá cacun me, tséhë xi jercu nchina camahani me. ²⁴Hane xi vutsejen xu Jesús xi jemu va camá cacun xuta xi matitjun jan ne, sehe cachja xu me cuitjin:

—Jemu chja xi ngu xuta xi tjin rë me cjuanchina cuisehen me hiscan sahmi Nina gobiernu. ²⁵Ha hitsë sa chjaain cuatju ngu chu camellu ngojo rë ngu nîndu xi cuma rë xi cuisehen ngu xuta nchina hiscan sahmi Nina gobiernu.

—Cuatjin xu cachja Jesús.

²⁶Ngajan xi xuta xi cahndë me cjua jan ne, cuitjin xu cachja me:

—Sá cuatjin ne, ¿yo xi cuma cuetjutje ni? —Cuatjin xu cachja me.

²⁷Hane Jesús ne, cuitjin xu cafayangui me:

—Yëjë ni xi maji sahmi xuta ne, Nina ne, hatuxa ma sahmi me.

—Cuatjin xu cafayangui Jesús.

²⁸Ngajan xi Pedru ne, cuitjin xu cachja me cojo Jesús:

—Chutsujun ni. Ngayin ne, ha canismitacuín yëjë ni xcusun xi tjin niji, hane tivisecuin nuju. —Cuatjin xu cachja Pedru.

²⁹Hane Jesús ne, cuitjin xu cachja me:

—Cuichjá cojo nuju cjuaquixi ta yëjë xuta xi tsismicacun me ndava me, tsismicacun me chjuun rë me, tsismicacun me xicjin me, tsismicacun me xutacha rë me, tsismicacun me quihndi rë me, xi cjuetjengui me ndiya rë Nina ne, ³⁰hatuxa cjín sa cahndé sacú rë me xi cuma sacuaha ndava me, hacuaha hatuxa cjín sa xuta sacú rë me xi cuma sacuaha xuta rë me, quihndë xi siu me ngasunhndë vihi, hane hya xi cueya me ne, sacú rë me ngu cjuahñu xatsë. —Cuatjin xu cachja Jesús.

Camá jyan ndiya cachja Jesucristu xi cueya me

³¹Hya xi camá xu ne, quijicojoxin Jesús tejó xuta ladu rë me, sehe cachja xu me cojo cuitjin:

—Quihndë ne, tivanguen Jerusalén. Hane xi cjuehen jan ne, cuetjucaa yëjë sacuatjin catsihindu profeta tsahan, ngahan xi Quihndi rë Xuta Jain ngahan. ³²Ngahan ne, cuma ngahan entregadu tsja xutaxín, cuejnuccëë ná xuta, choho cuichja me tsahan, cuëhënatya ná me. ³³Hane xi cjuë cuaja ná me ne, sehe tsiquehen ná me. Peru xi ma jyan nixtin ne, cúa nga cjuahñu. —Cuatjin xu cachja Jesús.

³⁴Peru xuta ladu rë me jan ne, hisca ngu xu cjua vëhë cajni rcu me ta tjihma cjuatacun vëhë xi cuma rë me. Vëhë xi hvíin xu me mé vijne cjua xi cachja Jesús jan.

Casahmi Jesucristu xi camatsejen nga rë ngu cha rcá ngajan Jericó

³⁵Hya xi camá ne, xi camatiña xu Jesús tsëhë nandya Jericó cojo xuta ladu rë me ne, ngajan tacun xu ngu cha rcá tjeheh ndiya, fehya cha caridad. ³⁶Hane xi cahndë cha xi jercu cjín xuta fane ntsacu me ne, sehe cavinenguise xu cha mé jima jan. ³⁷Hane tjin xu yo cachja cojo cha xi Jesús tsëhë nandya Nasaret tivatju me cojo xuta ladu rë me.

³⁸Hane cha rcá jan ne, cuitjin xu cajindaya cha cachja cha:

—iNgayun Jesús, tjë rë David!
Catamayuma nuju ngahan.

—Cuatjin xu cachja cha.

³⁹Hane xuta xi cjuí titjun jan ne, cavisiajmi cjan xu me cojo cha xi sejyu cha. Peru cha vëhë ne, hitsë sa jercu cajindaya xu cha cachja cha, cuitjin cachja cha:

—iNgayun tjë rë David!
Catamayuma nuju ngahan.
—Cuatjin xu cachja cha.

⁴⁰Ngajan xi Jesús ne, xi casecunhñu xu me ne, sehe cavitexa me xi cuinduva cojo xuta cha rcá jan hiscan xi secun me. Hane xi camatiña cha tsêhê Jesús ne, sehe cavinenguise xu me cha cuitjin:

⁴¹—¿Mé xi meje nuju xi sahme cojo nuju ni? —Cuatjin xu cavinenguise me.

Sehe ngajan xi cha rcá jan ne, cuitjin xu cachja cha:

—Tatá. Meje ná xi cuma tsejen nga ná. —Cuatjin xu cachja cha.

⁴²Hane Jesús ne, cuitjin xu cachja me cojo cha:

—Catamatsejen nga nuju. Ngayun ne, camandaja túxcun ta, tsêhê xi camangutacún cojo ná. —Cuatjin xu cachja Jesús.

⁴³Hane ha hora vêhê ni ne, camatsejen nga xu rê cha. Sehe quiji xu cha cojo Jesús táha sahmi jyê sahmi hnga cha Nina. Hane xi cavêë yêjê xuta xcusun xi camá jan ne, jemu cavaxëndaja xu me Nina.

Jesucristu cojo cha Zaqueo

19 Hya xi camá ne, cavisehen xu Jesús nandya Jericó xi cuatju me vasencia nandya. ²Hane ngajan tacun xu ngu cha xi hmí rê Zaqueo, ngu cha xi matitjun tsêhê cha faha tujúnsa, hacuaha jemu nchina cha. ³Hane cha vêhê ne, jemu meje scuëë xu cha yo xi Jesús, peru camaji ta, tsêhê xi jercu cjín camahani xuta quitsë me, hacuaha cha vêhê ne, jemu patú xu cha.

⁴Hane xi cavangatitjun cha ne, quiji camiji xu cha ngu ya jyê, cojo sa xi cuma scuëë cha Jesús ta, tsêhê xi hatuxa ngajan cuatju me. ⁵Hane xi

cafehe xu Jesús jan ne, sehe cavuya cavutsejenniji me rcu ya hiscan quisun cha ne, sehe cachja xu me cojo cha cuitjin:

—Zaqueo, nduvunjnu sanii ta, tsêhê xi sahmi ná nguÿjê xi ndya nuju cuitejña quihndê. —Cuatjin xu cachja me.

⁶Ngajan xi cha Zaqueo ne, marcu macjain xu cavitujne cha, cafahatsja cha Jesús cojo yêjê ni cjuasua, quijicojo cha me ndava cha.

⁷Hane xi cavêë yêjê xuta xi cuatjin casahmi Jesús ne, sehe cachjahma xu me cojo xicjin me cuitjin:

—Quiji cavêjña me cojo ngu cha tsehen. —Cuatjin xu cachjahma me.

⁸Hya xi camá ne, xi ha tacun Jesús ndava cha Zaqueo ne, cavisatjenhnga xu cha, sehe cachja xu cha cojo Nai naja cuitjin:

—Chutsujun ni, tatá. Vasentjin tsêhê yêjê ni xcusun xi tjin ná ne, suá rê xuta yuma. Hane sá xi tjin yo xi cavaxé rê tujún cojo cjuandacha ne, ñuju cuatjin sacuatjin xi cafahá ne, tsicúya tsêhê me. —Cuatjin xu cachja cha.

⁹Ngajan xi Jesús ne, cuitjin xu cachja me:

—Quihndê ta cuatjin ne, ngayujun ni tsêhê ndihya vihi ne, cavetjuntjun ta, me xi cuijyih vi ne, hacuaha cojo me má me xuta ladu rê Nina. ¹⁰Hane ngahan xi Quihndi rê Xuta Jain ngahan ne, canduvá xi cuanguësê hacuaha cuaxétjê xuta ladu rê Nina xi cachajá me tsêhê ndiya rê Nina. —Cuatjin xu cachja Jesús.

Ejemplu tsêhê tujún xi casua nai rê hndixahan

¹¹Xi tu cajnetaha cavisinuju xuta cjua vêhê ne, Jesús ne, cachja sa

xu me ngu ejemplu cojo xuta jan ta, tsëhë xi tiña siutahá me cojo nandya Jerusalén, hane má xu rë xuta ta ha hisca tacun xati xi cuinduva Nina sahmi me gobiernu.

¹²Hane cuitjin xu cachja me:

—Cuejña ne xi ngu xuta chacun jan ne, quiji me ngu nangui cjin, xi cjuahaxa me xi cumatitjun me tsëhë estadu rë me, sehe cuya nga me. ¹³Hane chaja sa xi cjue me ne, cajindaya me të hndixahan rë me, sehe casua rë me jima ngu hndixahan jan tujún. Sehe cachja me cojo cuitjin: “Nihñu xa cojo tujún vihi jinguyëjë rë xi cjué sehe cúa.” Cuatjin cachja me. ¹⁴Peru xuta tsëhë estadu rë me ne, jemu choho vëë rë me. Vëhë xi hya xi ha quiji xuta chacun ja ne, catsingatju xuta estadu rë me jan ngujo cha xi cuichja cha cuitjin cojo xuta xi suaxa rë xuta chacun jan: “Mamijí niji xi me xi cuajyihí vë cumatitjun me tsijin.” Cuatjin cuichja cha.

¹⁵Hya xi camá ne, xi cavuya xuta chacun jan xi cafë caphatsja me xa ne, cavitexa me xi chjindaya rë cha hndixahan rë me xi casua rë me tujún jan, cojo sa xi sua cha cumachaya rë me há cjín cavesun rë cha jima ngu cha xi casahmi cha xa cojo tujún xi casua me cha.

¹⁶Hane cha hndixahan xi canduva titjun ne, cuitjin cachja cha: “Tatá. Sacuatjin tujún xi catuhun ná ne, cavesun ná të cuatjin sa.” Cuatjin cachja cha. ¹⁷Sehe ngajan xi nai rë hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsë rë xi jemu ndaja canihñi xa xi chúva vë ne, suá ri të nandya xi

cumatitjun ngaye tsëhë.” Cuatjin cachja me. ¹⁸Hane xi canduva cha xi majo ne, cuitjin cachja cha: “Tatá. Sacuatjin tujún xi catuhun ná ne, cavesun ná hñú cuatjin sa.” Cuatjin cachja cha. ¹⁹Hane nai rë hndixahan jan ne, cuitjin cachja me: “Ngaye ne, cumatitjun ngaye tsëhë hñú nandya.” Cuatjin cachja me. ²⁰Hya xi camá ne, xi canduva nga ngu cha ne, cuitjin cachja cha: “Tatá. Cuajyihí tujún xi catuhun ná nguehe. Tujún vi ne, cavinchándaja cahntsua ngu pañutu ta, ²¹tsëhë xi tsácjun nuju. Ta ngayun ne, jemu hñu cjuá nuju. Tangun ngayun cojo ngu xuta xi fanga me handasa hacuiin me vëhë catsitjë me ta, tsëhë xi ngayun ne, hacjahi sahmi xa ne, ngayun chjuhunnuntsun chji rë.” Cuatjin cachja cha hndixahan vëhë. ²²Ngajan xi xuta chacun jan ne, cuitjin cachja me cojo hndixahan vëhë: “Ngaye, hndixahan tsehen ne, cojo cjua riji sove ni tsichúva ri. Ngaye xi noje xi hye xi jemu hñu cjua naha, hacuaha tangun ngahan cojo ngu xuta xi fanga me handasa hacuiin me catsitjë me, tsëhë xi ngahan ne, hacjahi sahmi xa ne, ngahan fahántsa chji rë. ²³Sá xi hye xi cuatjin ne, ímé má hacuiin xcun bancun cahmi chani tujún xi casuá ri, cojo sa xi hya xi cjuëhë ne, cúa cjuahántsa tujún naha, peru cojo quihndi rë ni?” Cuatjin cachja xuta chacun jan cojo hndixahan rë me. ²⁴Sehe cachja sa me cojo ngujo hndixahan rë me xi hinchacun jan cuitjin: “Chjuhuntuhun tujún xi yaha cha vë ne, sehe tuhun rë cha xi cavesun rë të cuatjin sa sacuatjin tujún xi casuá rë.” Cuatjin cachja

xuta chacun jan. ²⁵Hane hndixahan jan ne, cuitjin cafayangui: “Tatá. ¡Peru cha vëhë ne, ha tjin rë cha të cuatjin sa!” Cuatjin cachja cha. ²⁶Ngajan xi xuta chacun jan ne, cuitjin cachja me: “Nguehe cuichjá cojo nuju ta yëjë xuta xi cavesun rë me xcun xi ha tjin rë me ne, suá sa rë me. Hane xuta xi tsajin mé cavesun rë me ne, hisca xi tjin rë me ne, cjuahátahá. ²⁷Hane sacuaaha condra naha xi mijí rë xi ngahan cumatitjun ngahan tsëhë ne, tángun chjuhun, nduvuncujun guehe, sehe nicuhun guehe xcún.” Cuatjin cachja xu xuta chacun xcun ejemplu xi cachja Jesús.

Cafehe Jesucristu nandya Jerusalén

²⁸Hya xi camá xu ne, xi cavatju cachja Jesús cjuá vëhë ne, sehe cavetju me quiji sa xu me xi cjeuehe me Jerusalén. ²⁹Hane hya xi camatiña me tsëhë nandya Betfajé cojo nandya Betania, nandya xi siu tiña tsëhë ndetjún xi hmí rë Ndetjún Olivu ne, sehe catsingatju xu me jo xuta ladu rë me xi cjue tixa rë me, ³⁰hane cuitjin xu cachja me:

—Tángun nandya xi tsejen tacun vë. Hane xi cjuhun jan ne, ngajan cuechuntuhun ngu chu burru xatsë, xi hisca ngu cjëë cuijin rë chu, tjihñu chu. Hane chundecjun chu, nduvuncujun chu. ³¹Hane sá xi yo cjuinenguise nuju mé má cuatjin chundecjun chu ne, sehe tinújun cuitjin: “Nai niji meje rë me chu.” Cuatjin tinújun. —Cuatjin xu cachja Jesús.

³²Hane me xi casatëxa rë jan ne, quiji xu me, hane cavetjucaa jain

sacuatjin cachja Jesús cojo rë me. ³³Hane jinguyëjë rë xi tivundecja me burru jan ne, nai rë chu ne, cuitjin xu cachja me:

—¿Mé má cuatjin chundecjun burru vë? —Cuatjin xu cachja me.

³⁴Hane xuta ladu rë Jesús jan ne, cuitjin xu cafayangui me:

—Nai niji meje rë me chu.

—Cuatjin xu cachja me.

³⁵Sehe quijicojo xu me chu hiscan tacun Jesús. Hane caviyujusun me tsjian rë me ngaxtun chu, sehe catsiquijin xu me Jesús burru jan. ³⁶Hane xi cjuí Jesús quisun me burru jan ne, táha ticandi xu xuta tsjian rë me hiscan cjuí Jesús.

³⁷Ngajan xi xi jima tiña xu Jesús cojo yëjë xutacjín jan nandya Jerusalén, hiscan xi cafaha rë xi ha cuitsingaxten ndiya tsëhë Ndetjún Olivu ne, yëjë ni xutacjín xi xuta ladu rë Jesús jan ne, jercu ndama xu rë me, hisca cavetsihin cajindaya me cachja me xi cavaxëndaja me Nina tsëhë yëjë ni cjuarcun xi cavëë me. ³⁸Cuitjin xu cachja me:

—Jemu catsinchacun Nina me xi nduva vi xi cuma titjun tsajan, tsëhë xi Nina catsingatju rë me. Ngahnga ne, hatuxa jemu tjin cjuandaja cjuajeya, hacuaaha Nina ne, hatuxa jyë hnga me cojo Hasen rë me. —Cuatjin xu cavaxëndaja xuta Nina.

³⁹Hane ngujo cha fariseo xi hinchajñi ngajñi rë xutacjín jan ne, cachja xu cha cojo Jesús cuitjin:

—Maestro, tichuncjun cjuá xi tichja xuta ladu nuju vë. —Cuatjin xu cachja cha.

⁴⁰Hane xi cafayangui Jesús ne, cuitjin xu cachja me:

—Nguehe cuichjá cojo nuju ta sá xi xuta xi cuicun vi sejyu me ne, ndyojo vi cuetsihin squindaya cuichja nga. —Cuatjin xu cafayangui me.

⁴¹Hane xi camatiña sa xu Jesús tséhë Jerusalén ne, xi cavëë me nandya jan ne, cajihnda xu me ngatsë rë. ⁴²Sehe cachja xu me sacuahá xi tichja me cojo xuta Jerusalén, cuitjin xu cachja me: —iSá mé ni xi hacuahá cojo ngayun hyun cjuatacun xi yaha cjuandaja cjuajeya! Peru quihndë matsejen ne, cjuatacun vëhë matsejen ne, jiyahma xi cuma nuju. Vëhë xi hyúun. ⁴³Peru cuechú nixtin xi yëjë ni condra nuju matsejen ne, sahmi me nguýë xi cuma cuisehen me nandya nuju, xinchandee nuju me yëjë ni ladu xi cuinchahñu nuju me. ⁴⁴Tsixujne me yëjë ni ndihya tséhë nandya nuju, tsicanguin me hisca ngu ndyojo xi tinecoo, hacuahá tsiquehen nuju me ngayujun ni xi nechun nandya nuju. Cuatjin cuatjun cuma matsejen ta, tséhë xi ngayun matsejen ne, cajni rrun hya xi cafehe Nina xi cuaxëtje nuju me. Cuatjin xu cachja Jesús.

Cavaxë Jesucristu xuta tsehen tséhë ndatsen yungun

⁴⁵Hane xi cafehe me nandya Jerusalén ne, sehe quiji xu me yungun xi matitjun. Hane xi cavisehen me ndatsen yungun jan ne, cavetsihin cavaxë me xuta xi sahmi ndetsin jan. ⁴⁶Cuitjin xu cachja me:

—Cuitjin camahindu xcun xujun rë Nina sacuatjin xi cachja me: “Ndyá naha ne, vejña xa xi cjue

xuta sahmi me oración rë me.” Cuatjin chja Nina. Peru ngayun ne, tinihñuxun cojo sacuahá ngu cahndé hiscan xi matangun xuta chëjë. —Cuatjin xu cachja Jesús.

⁴⁷Hya xi camá ne, nchunchujun xu ni quiji Jesús cavicuya me xuta ngajan ndatsen yungun xi matitjun. Hane yëjë ni nahmi xi matitjun cojo yëjë cha xi vicuya cjuachacun cojo yëjë sa xuta xi matitjun ne, jemu cavangui xu me chuva rë xi tsiquehen me Jesús, ⁴⁸peru casacuinyiin xu rë me mé sahmi me ta, tséhë xi yëjë ni xuta ne, tivisiñuju xu me cjua rë Jesús nguñaja cacun me.

Cavinenguise xuta cojo Jesucristu yo cavitexa rë me

20 Cuitjin camá xu ngu nixtin hya xi tivicuya Jesús xuta hacuahá tisua me jimachaya rë cjuandajyihí rë Nina ngajan ndatsen yungun xi matitjun. Hacuahá camatangun xu nahmi xi matitjun cojo cha xi vicuya cjuachacun cojo xuta changá, ²hane cuitjin xu cavinenguise me Jesús:

—Tinújun cojo niji ne, ¿yo cavitexa nuju xi cuatjin nihñu? ¿Yo casuaxa nuju? —Cuatjin xu cavinenguise me.

³Hane xi cafayangui Jesús ne, cuitjin xu cachja me:

—Hacuaha cjuinenguësë nuju ngu cjua, hane chjayunngun tsahan:

⁴¿Yo cavitexa rë Juan xi cuitenda me xuta? ¿Há Nina ne, o há tsajin ne, há xuta? —Cuatjin xu cachja me.

⁵Sehe ngajan xi xuta xi cuacun jan ne, cavisiajmicjín me ngajñi rë me, cachja xu me cuitjin:

—Sá xi cuinújan xi Nina cavitexa me cha Juan vè ne, cjuinenguise naja me: “¿Mé má camacjaain naja cha?” ⁶Hane sá xi cuinújan xi xuta cavitexa rë cha ne, yëjë ni xuta ne, tsiquehen naja me cojo ndyojo ta, tsëhë xi yëjë ni xuta ne, ha macjain rë me xi cha vëhë ne, profeta cha.

—Cuatjin xu cavisiajmicjín me.

⁷Ngajan xi xuta xi cuacun jan ne, cachja me xi hvíin me. ⁸Sehe ngajan xi Jesús ne, cuitjin xu cachja me:

—Sá cuatjin ne, ngahan ne, hacuaha cuichjaan cojo nuju yo cavitexa ná xi cuitjin sahme.

—Cuatjin xu cachja Jesús.

Ejemplu tsëhë cha sahmixa xi jemu tsehen cha

⁹Hya xi camá ne, cavetsihin cachja xu Jesús cojo yëjë ni xuta jan ejemplu vihi:

—Cuejña ne xi ngu me jan matsejen ne, catsitjë me xcun nangui rë me xca rë uva. Sehe casua me ngujo cha sahmixa xi cjuahacuenda cha sehe cjuaha tsë tsë me cojo cha. Hya xi camá ne, sehe cavetju me quiji me ngu nangui jemu tsëë camahani. ¹⁰Hane xi cavechú nixtin rë tutjë jan matsejen ne, sehe catsingatju me ngu mosu hndixahan rë me xi quiji cachja cha cojo cha xi fahacuenda xitjë jan xi sua cha hitsë tutjë xi satë rë me xi casacu rë cha xcun nangui rë me jan. Peru cha xi fahacuenda xitjë jan matsejen ne, tu cavaja cha cha hndixahan jan, sehe catsingatju cha cafe, ndastu mé casua rë cha. ¹¹Hya xi camá ne, cavuya catsingatju nga me

ngu hndixahan rë me. Hndixahan vëhë matsejen ne, jemu cavaja rë cha, jemu choho cachja cha cojo, sehe catsingatju cha cafe, ndastu mé casua rë cha. ¹²Hya xi camá ne, cavuya catsingatju nga me ngu hndixahan xi majyan. Hndixahan vëhë matsejen ne, jemu cavanguihmu rë cha, sehe cavaxëxin cha tsëhë ngajan.

¹³Ngajan xi nai rë xitjë jan matsejen ne, cuitjin catsingataha cacun me: “¿Mé xi ndatjin sahme quihndë? Ndatjin rë xi tsingátju quihndi naha xi jemu hmú cáacun. Cjuaharcun rë cha, xi quihndi naha.” Cuatjin catsingataha cacun me. ¹⁴Peru xi cavëë cha xi fahacuenda xitjë jan cha vëhë matsejen ne, sehe cavisiajmicjín cha cojo xicjin cha cuitjin: “Cha vihi ne, quihndi rë me xi cuahatsja cha xitjë vi. Niquen cha, cojo sa xi tsajan cuma nangui vi.” Cuatjin cavisiajmicjín cha. ¹⁵Hane xi cavaxëxin cha cha tsëhë nangui jan matsejen ne, sehe catsiquehen cha.

’Xi má nuju matsejen ne, ¿mé sahmi nai rë xitjë jan cojo cha xi cuacun fahacuenda jan? ¹⁶Cjue tsiquehen me cha, sehe sua me xitjë jan cjuahacuenda jingu sa cha sahmixa. —Cuatjin xu cachja Jesús.

Hane xi cahndë yëjë xuta cjuava vëhë ne, cachja xu me cuitjin:

—iCatamamiji cacun Nina xi cuatjin cuma! —Cuatjin xu cachja me.

¹⁷Ngajan xi xi cavuya vutsejen Jesús xuta jan ne, cuitjin xu cachja me:

—¿Mé vijne xi cuitjin camahindu xcun xujun rë Nina?:

Ndyojo xi catsitjungui
chjinevexo ne,
vêhê ndyojo xi cavéjña tjun tjun
yuju rê xihndênaña.

Cuatjin camahindu. ¹⁸Hya xi ngu
xuta cjuinenguisun me xcun ndyojo
vêhê matsejen ne, cuatêlanga
rê me. Hane hya xi ndyojo vêhê
cjuinenguisun rê ngu xuta matsejen
ne, ña cuma tẽ me. —Cuatjin xu
cachja Jesús.

¹⁹Vêhê xi cha xi vicuya
cjuachacun cojo nahmi xi matitjun
ne, jemu cavangui xu me chuva rê
hacutjin cuma xi cjuaha me Jesús
hora vêhê ni, tsêhê xi vëê me xi
ejemplu xi cachja Jesús ne, condra
rê me chja. Peru tsêhê xi tsacjun xu
me xuta ne, vêhê xi cafaain xu me
Jesús ngutjen.

Cjuacjintacun tsêhê tujúnsa

²⁰Tu siu xu ni me cuidadu tsêhê
cjuua rê Jesús, hisca catsingatju xu
me ngujo cha xi tsejen sacuaha
xuta ndaja, xi cuangui cha chuva
rê xi cuaxê rê cha Jesús ngu cjuua xi
cuaintjin, cojo sa xi cuma chjahá
rê me cjuachani rê me xcun xutaxa
rê ndihyavasen. ²¹Hane cha xi
cuacun jan ne, cuitjin xu cachja cha
cojo Jesús.

—Maestro, ngayin ne, hyin ta
ngayun ne, vicuyun rê xuta cojo
cjuaquixi. Hacuaha tangun ni
nújun cojo yêjê xuta ta, tsêhê xi
ngayun ne, hatuxa vicuyun ndiya
rê Nina cojo cjuaquixi. ²²Quihndê
ne, sacuaha ley rê Moisés ne, ¿há
sua cahndé xi cuechjen tujúnsa naja
cojo César, me xi matitjun, o há
suaain cahndé? —Cuatjin xu cachja
cha.

²³Peru Jesús ne, tsêhê xi ha
vacun rê me xi jemu ndacha cha ne,
cuitjin xu cachja me cojo cha:

²⁴—Ningacun ná ngu tujún.
Quihndê ne, ¿yo xcusun rê hacuaha
yo ñihi rê xi quitahá xcun tujún vê?
—Cuatjin xu cavinenguise Jesús.

Hane cha xi cuacun vê ne, cuitjin
xu cafayangui cha:

—Tsêhê César. —Chja xu cha.

²⁵Sehe ngajan xi Jesús ne, cuitjin
xu cachja me cojo cha:

—Sá xi cuatjin ne, tuhun rê César
xi tsêhê me, hane tuhun rê Nina xi
tsêhê me. —Cuatjin xu cachja me.

²⁶Hane camaji cavaxê xu rê cha
Jesús ngu cjuua xi cuaintjin xi
cuihndê xuta. Hane xi quijircun
xu rê cha tsêhê cjuua xi cafayangui
Jesús ne, tu caviyujuyuu xu ni cha.

Cjuachjinenguise tsêhê xi cuya nima cjuahñu

²⁷Hya xi camá ne, cafehe xu
ngujo cha saduceo hiscan tacun
Jesús. Cha xi cuicun vi ne, vicuya
cha cjuachacun xi chja xi xuta xi
cahme ne, cuyaaing nga me cjuahñu.
Ngajan xi cha xi cuacun cafehe jan
ne, cachja xu cha cojo Jesús cuitjin:

²⁸—Maestro, Moisés ne,
catsihindu me xcun xujun rê Nina
xi sá xi ngu xihin cueya, hane tsajin
rê chjuun rê hisca ngu quihndi
ne, hntsê nima vêhê ne, meje rê
xi cjuaha rê chjuun cahan vêhê,
cojo sa xi sacú rê na quihndi xi
cuma sacuaha quihndi rê nima
vêhê. ²⁹Quihndê ne, cuejña xi ngu
ndihya ne, siu yatu cha cojo hntsê
cha. Hane cha tjun ne, cafaha cha
chjuun. Peru cahme cha, hane
chjuun rê cha vêhê ne, casacuiin

rë na hisca ngu quihndi cojo cha.

³⁰Hya xi camá ne, hntsë nima vëhë, cha xi majo ne, cafaha cha na cahan vëhë camá chjuun rë cha na, peru hacuaha cahme cha hane casacuiin rë na quihndi.

³¹Hacuanitjin ni cafaha cha xi majyan jan na hisca xi cafë yëjë xi yatu cha cafaha cha na. Peru yëjë cha xi cuacun vë ne, cafë cha cahme cha chuva ngu chuva ngu cha. Hane na vëhë ne, casacuiin rë na hisca ngu quihndi cojo cha xi cuacun vë. ³²Hiscan xi cajnetaha ne, na vëhë ne, hacuaha cahme na. ³³Quihndë ne, hya xi cuya yëjë nima cjuahñu ne, çjarë cha xi cuacun vë xi chjuun rë cha na xi cjuaquixi ta, tsëhë xi yëjë ni xi yatu cha ne, camá chjuun rë cha na? —Cuatjin xu cachja cha saduceo cojo Jesús.

³⁴Sehe ngajan xi Jesús ne, cuitjin xu cachja me cojo cha:

—Xuta xi siu me ngasunhndë quihndë ne, tsinguixan me hacuaha vixan me. ³⁵Peru xuta xi vechú chuva rë xi cuya me cjuahñu xi ha cuatju cueya me hacuaha sacú rë me cjuahñu xatsë ne, cuixaain me hacuaha tsinguixaain me hya ta, ³⁶tsëhë xi ha quihndë cueyaain nga me, tsëhë xi tangun cuma me cojo ángel. Hacuaha cuma me quihndi rë Nina, tsëhë xi cuya me cjuahñu.

³⁷Hacuaha hya xi chutayan cjua xi cachja Moisés ngajan hiscan xi catí yanahyá xcuen ne, hya sacu machaya naja tsëhë xi nima ne, cuya cjuahñu ta, tsëhë xi cachja Moisés xi Nina naja ne, Nina rë Abraham, Nina rë Isaac, cojo Nina rë Jacob má me. ³⁸Peru Nina ne,

hacuiin nina rë nima ta nina rë xuta xi quicun me ta, tsëhë xi xi cuma rë Nina ne, yëjë ni xuta ne, quicun me, handasa cahme yahnga me. —Cuatjin xu cachja Jesús.

³⁹Ngajan xi ngujo cha vicuya cjuachacun ne, cuitjin xu cachja cha:

—Maestro, ndatjin cjua xi canújun.

⁴⁰Cuatjin xu cachja cha ta, tsëhë xi tsacjun xu cha cjuinenguise sa cha me.

¿Yo tjë rë má me xi catsingatju Nina?

⁴¹Sehe ngajan xi Jesús ne, cachja nga xu me cuitjin:

—¿Hacutjin má xi cuatjin chja xuta xi me xi tsingatju Nina ne, tjë rë David má me? ⁴²Ta suvá David ne, cachja me cuitjin xcun xujun tsëhë Salmo:

Nina ne, cachja me cojo Nai naha cuitjin:

“Tinechin nguehe ladu quixi naha,

⁴³ hisca hya xi yëjë ni xi sahmi ri condra ne, cuiyujú ngahan ngahma gobiernu riji.”

Cuatjin cachja David cjua xi cachja Nina. ⁴⁴Quihndë ne, sá xi suvá David chja me xi Nai rë me má me xi tsingatju Nina ne, çhacutjin má ne xi hacuaha tjë rë me ni? —Cuatjin xu cachja Jesús.

Cachjajyë Jesucristu cojo xuta ladu rë me tsëhë cha vicuya cjuachacun

⁴⁵Jinguyëjë rë xi tivisiñuju yëjë xuta jan ne, Jesús ne, cachja xu me cuitjin cojo xuta ladu rë me:

⁴⁶—Xicaninguisuhunñuu cojo cha xi vicuya cjuachacun, xi jemu ndama rë cha xi cuatjin vajá cha

tsjian nduju, hora xi fi tsujyihya cha, jemu chuya rē cha xi cuatjin fi chja xuta nina cojo cha ngajan ngajñi ndetsin, hacuaha jemu chuya rē cha xi cuatjin satē rē cha cahndé xi matitjun tsēhē cahntsua yungun, o hiscan ngu ndava suhi. ⁴⁷Cha xi cuacun vē ne, hacuaha jemu cjin tujún vaxē cha yachjin cahan. Hisca xi chjayuma cha ne, hacuaha jemu nduju hora, peru hacuiin nguñaja cacun cha chja cha. Vēhē xi cha xi cuacun vē ne, hitsē sa jyē castigu cuatju cha xi cuma rē jingusa xuta. —Cuatjin xu cachja Jesús.

Tujún xi cavincha chjuun cahan cahntsua alcancía

21 Ngu nixtin jan ne, jinguyējē rē xi tivutsejen xu Jesús xi tivincha xuta nchina tujún cahntsua alcancía tsēhē cjuandaja rē me cojo Nina ne; ²hacuaha cavēē xu me xi canduva ngu chjuun cahan xi jemu yuma, hane hacuaha cavincha na jo tujún langa cahntsua alcancía jan. ³Sehe ngajan xi cachja xu Jesús cojo xuta ladu rē me cuitjin:

—Cuichjá cojo nuju cjuaquixi ta na cahan vē xi jemu yuma na ne, hitsē sa vengui chji rē tujún xi cavincha na xi cuma rē tujún xi jemu cjin cavincha yējē xuta nchina xi cuacun vē ta, ⁴tsēhē xi me xi cuacun vē ne, tsēhē cjuanchina xi tjin rē me ne, ngajan cavaxē me tujún xi cavincha me. Peru na vēhē ne, handasa jemu tjin rē na cjuachaja ne, hitsē lihndi tujún xi tjin rē na ne, cavincha na yējē cahntsua alcancía. —Cuatjin xu cachja Jesús.

Cachja Jesucristu xi cuetsun yungun

⁵Ngu ndiya, hya xi ngujo xuta jan cachja xu me xi yungun xi matitjun ne, jemu ndacun ndyojo camá cojo, hacuaha jercu camaxcuen cojo tu mé ni xcusun cjuatjo xi casua xuta ne, cachja xu Jesús cuitjin:

⁶—Sacuaha xcusun xi chutsujun vi ne, cuechú nixtin xi hisca ngu ndyojo ndacun xi cuicun vi ne, tsajin hinchasuncoo xicjin ta cjuē yējē cuixujne. —Cuatjin xu cachja Jesús.

Hacutjin sacú cumachaya naja xi ha meje cuijnetaha nixtin vihi

⁷Ngajan xi xuta jan ne, cavinenguise xu me cojo Jesús cuitjin:

—Maestro, hane ¿janihya cuetjucaa xcusun vēhē ni? ¿Hacutjin cuma sacú niji cjuaquixi xi xcusun vēhē ne, ha tivechú nixtin xi cuetjucaa ni? —Cuatjin xu cavinenguise me.

⁸Ngajan xi Jesús ne, cuitjin xu cachja me:

—Nechun cuidado, cojo sa xi hacuiin cuma ndacha ngayun ta, tsēhē xi jemu cjin xuta cuetjucaa me xi cuichja me xi hacui me xi catsingatju Nina me, hacuaha cuichja me xi ha camatiña nixtin. Peru xicatsanguntjenguun me. ⁹Hacuaha hya xi cuma chaya nuju cjuaxi jemu yehe si tijima ngu nación ne, o sá xi tjin cjuatacun xi jemu yehe si nduva ne, xicarcuun ta, hatuxa tjin xi titjun xcusun vēhē cuma. Peru hacuiin ngutjen hya cuijnetaha nixtin vihi.

¹⁰Hacuaha quijinduju sa xu cachja me cuitjin:

—Scaan xuta tsëhë ngu nación cojo jingu sa nación, hacuaha scaan xuta tsëhë ngu nandya cojo ngu nga nandya. ¹¹Hacuaha jemu cjin cahndé xi cjuani nangui, jemu cjin cahndé xi cuatju chíhin vitaha, jemu cjin cahndé xi cuma jindya, hacuaha jemu yehe chircun cuma tsejen ngajan ngahnga xi sua cumachaya nuju mé xi cuma.

¹²Peru chaja sa xi cuma yëjë xcusun vëhë ne, xuta ne, tsujyihyatjengui nuju me cojo cjuahngatacun. Cjuaha nuju me cjucojo nuju me xcun xutaxa rë yungun, hisca cuincha nuju me ndavaya. Cjucojo nuju me xcun xutaxa rë ndihyavasen, hisca xcun gobernador, ngatsë rë xi ladu naha má ngayun. ¹³Xi cuatjin cuatjun cuma ne, vëhë sua nuju cahndé xi ningui xun yëjë cju hacutjin cavicuyá nuju. ¹⁴Tejñungutacún xi hacuain titjun jemu cjin ningatuhuntacún hacutjin chjayunngun tsëhë xutaxa rë ta, ¹⁵tsëhë xi ngahan suá nuju cjuatacun xi cuinújun ngu cju xi condra nuju ne, cumaji tsitjungui me hacuaha cumaji cuichja me xi quixiin. ¹⁶Hacuaha hisca xutacha nuju, o sá xi xingun, o sá xi xuta nuju, o sá xi amigu nuju ne, cuinchajyë nuju me. Hacuaha tjin yahnga ngayun ne, hisca tsiquehen nuju me. ¹⁷Yëjë ni xuta ne, choho scuëë nuju me, tsëhë xi ladu naha ngayun. ¹⁸Peru xicamacjiintacún ta tsajin camahani mé xi nichujun. ¹⁹Caticaa nuju ta, tsëhë xi cuatjin xi cuetjuntjun.

²⁰Peru hya xi chun xi jemu cjin xuta nduvacjin cuetsihin

xinchandee me nandya Jerusalén xi sahmi me ngu si jyë cojo nuju ne, vëhë sua machaya nuju xi camatiña nixtin xi nandya Jerusalén ne, cjuë tsinguetsun xuta nduvacjin vë. ²¹Nixtin hya ne, ngayujun ni xi nechun yëjë nandya tsëhë distritu Judea ne, tiyun tángun hiscan ndetjún. Hacuaha ngayujun ni xi nechun nguehe nandya Jerusalén ne, tetjunxun. Hacuaha ngayujun ni xi nechun ranchun rë Jerusalén ne, xicatsanguun nandya xi naxuntjun yojo nuju. ²²Cuatjin meje rë xi nihñu ta, tsëhë xi nixtin hya ne, sahmi Nina castigu nandya vihi, cojo sa xi xi cuatjin ne, cuetjucaa yëjë hacutjin camahindu xcun xujun rë Nina. ²³Jemu chojyih tsëhë yëjë yachjin xi hinchahma quihndi rë me cojo yëjë me xi tjin rë quihndi vaqui nixtin hya ta, tsëhë xi cuatju ngu cjuandya jyë nación vihi, hacuaha cuatju xuta nguehe ngu castigu. ²⁴Hacuaha jemu cjin xuta nguehe cueya me cojo quicha, hacuaha jemu cjin xuta nguehe tsihñu xuta tsëhë jingu sa nación me sehe tsingatju me me yëjë ni nación. Hane xi cuatju vëhë ne, suvá xutaxín cjuë nduva me sunesun me xcun nangui tsëhë nandya Jerusalén, hisca xi cjuë nixtin xi xuta xi cuacun vë cuitexa me nandya Jerusalén vi.

Xcusun xi cuma hya xi cuinduva nga Jesucristu

²⁵Nixtin hya ne, hacuaha cuma tsejen cjuarcun xi cuma xcun tsuhi cojo sá cojo niñú. Hane nguehe ngasunhndë ne, jercu cjin tsingataha cacun xuta tsëhë yëjë

ni nación, ña cuya sca me tsëhë xi jercu cjuane ndachacun, hacuaha jercu tsiquijin rë tsindyu rë. ²⁶Yëjë xuta ne, ña cuma ndaya cacun me xi tsacjun me, xi tsingataha cacun me tsëhë chircun xi cuma nguehe ngasunhdë ta, tsëhë xi hisca ngahñu xi yaja ngahnga ne, cjuiniyaya. ²⁷Sehe hya scuëë xuta ngahan, xi Quihndi rë Xuta Jain ngahan, xi cuinduva ngajñi rë yuffi cojo jemu jyë ngahñu, hisca setí hisca vatë jyihi ngahan xi cuinduva. ²⁸Hya xi xcusun xi cuacun vë cuetsihin cuma ne, tisechun chutsujun ngahnga ta camatiña nixtin xi cuetjuntjun.

²⁹Xi quijinduju sa cjuavisiajmi rë Jesús ne, cachja xu me ngu ejemplu vihi:

—Quihndë ne, ningatuhuntacún tsëhë yaxujún o sá yahnga sa ya xi vixu xca rë. ³⁰Xi tu chun xi cuetjusehen ya xi cuacun vë ne, ha hyun ta ha camatiña chan tsi. ³¹Hacuaha chuva vëhë ni ne, hya xi chun xi cuetsihin cuma yëjë xcusun xi cachjá cojo nuju vë ne, vëhë sua cumachaya nuju xi ha camatiña nixtin xi nduva Nina sahmi me gobiernu.

³²Cuichjá cojo nuju cjuaquixi ta ngayujun ni xi nechun nixtin vihi ne, hacuiin ngayujun caveyun chaja sa xi cuatju yëjë xcusun xi cachjá cojo nuju jan. ³³Ngahnga cojo nguehe ngasunhdë ne, hatuxa cjuë. Peru hisca ngu cju naha ne, tsajin xi cuetjincaain.

³⁴Nechun cuidadu tsëhë xcusun xi nihñu. Xicatuun cahndé xi cjuatacun nuju ne, tsé rë cojo cjuatacun tsëhë cjuachihi, cojo

cjuacjintacun tsëhë xcusun xi mameje nuju xcun ngasunhdë nuju, sá tu tsajin tjin chjine ngayun hya xi cuechú nixtin vëhë, ³⁵sacuatjin tsajin tjin chjine ngu chu hya xi finenguisun rë chu chen. Vëhë xi nechun cuidadu ta, tsëhë xi hatuxa cuechú nixtin vëhë, hya xi sahmi Nina gobiernu yëjë ni xuta jingujyë ni ngasunhdë. ³⁶Nechun cuidadu. Yasen ni chjahyun rë Nina xi cuechú chuva rë xi cuetjuntjun tsëhë yëjë ni cjuacjintacun xi ha tu hora sa xi cuinduva. Hacuaha chjahyun rë Nina xi cuma cuetjunndujun hora xi cuisechun xcún xi cjuaháchuva nuju cojo cjuatacun nuju, ngahan xi Quihndi rë Xuta Jain ngahan. —Cuatjin xu cachja Jesús.

³⁷Nguinixtin ne, ndatsen yungun xi matitjun xu véjña Jesús vicuya me xuta. Hane nguixun ne, vetju xu me fi véjña me ndetjún xi hmí rë Ndetjún Olivu. ³⁸Hane yëjë ni xuta ne, tajñu tajñu xu ni fi me yungun jan xi cuisinuju me cju xi vicuya Jesús.

Camachihin cju hacutjin xi chjahá rë Jesucristu

22 Hya xi camá xu ne, camatiña suhi tsëhë pan xi hacuiin cojo san rë pan má, suhi xi hmí rë Pascua. ²Hane nahmi xi matitjun cojo cha vicuya cjuachacun ne, jemu tivangui xu me chuva rë hacutjin xi tsiquehen me Jesús. Peru táhahma xu tisahmi me xcusun vëhë ta, tsëhë xi tsacjun xu me xuta.

³Hya xi camá xu ne, Satanás ne, cavisehen xu cahntsua xahasen

rë Judas, cha xi hacuaha hmí rë Iscariote, ngu cha ngajñi rë me xi tejó xi má ladu rë Jesús. ⁴Ngajan xi Judas jan ne, quiji cavisiajmicjín xu cha cojo ngujo nahmi xi matitjun cojo ngujo cha mayu yungun hacutjin cuma xi cjuaha xuta xi cuacun vë Jesús. ⁵Hane nahmi xi matitjun cojo mayu jan ne, jemu ndaja camá xu rë me, hisca caviyuju cacun me xi sua me cha tujún. ⁶Hane Judas ne, cojo cjuatacun vëhë ne, camangu cacun cha, sehe ngajan xi cavangui xu cha ngu hora xi tsajin cjín xuta, xi sahmi cha entregadu Jesús cojo xuta xi cuacun jan.

**Hacutjin cajinë Jesucristu
tsëhë suhi rë Pascua**

⁷Cavechú xu nixtin tsëhë suhi rë pan xi hacuiin cojo san rë pan má, nixtin hya xi meje rë xi cueya chu tsánga. ⁸Sehe ngajan xi Jesús ne, catsingatju xu me Pedru cojo Juan ngu tixa, hane cuitjin xu cachja me:

—Tángun tuhunchjinu xi xinënguixuun tsëhë suhi.

—Cuatjin xu cachja me.

⁹Sehe ngajan xi me xi cuacun jan ne, cavinenguise xu me Jesús cuitjin:

—¿Hane jani meje nuju xi cuihinchjini ni? —Cuatjin xu cavinenguise me.

¹⁰Hane Jesús ne, cuitjin xu cachja me:

—Chutsujun ni, xi cjuhun tjehe nandya jan ne, ngajan cuechuntuhun ngu cha xi yaniji ngu nisa nandá, hane tánguntjengun cha hisca xi cjuhun ndihya hiscan cjuí cha, ¹¹sehe tinújun cojo nai rë

ndihya jan cuitjin: “Cuitjin cjuá xi catsingatju maestru tsujun: ¿Jarë cuarto xi tuhun, sehe ngajan sínë niñu tsëhë suhi cojo xuta ladu naha?” Cuatjin tinújun cojo rë me. ¹²Hane me vëhë ne, tsingacun nuju me ngu cuarto jyë xi tacun ngahnga hiscan xi ha tjin chjine ndihya. Hane ngajan tuhunchjinu xi xinë. —Cuatjin xu cachja Jesús.

¹³Hane xi quiji me xi jo jan ne, cavetjucaa jain yëjë cjuá xi cachja Jesús cojo rë me. Hane ngajan cavëhëndaja xu me xi sínë nguixun Jesús cojo rë me tsëhë suhi.

¹⁴Hane xi cavechú hora ne, cafaha xu Jesús cahndé rë me xcun maxë cojo xingu xingu apóstol.

¹⁵Hane sehe cachja xu me cojo apóstol jan cuitjin:

—Jemu meje sínë cojo nuju comida tsëhë suhi vihi chaja sa xi cjuehe cjuaveya naha ta, ¹⁶tsëhë xi nguehe cuichjá cojo nuju ta ha quihndë tsajin nixtin xi cúa sínë nga comida tsëhë suhi vihi. Sínë nga, peru hisca hya xi cuinduva Nina sahmi me gobiernu ta, tsëhë xi cjuatacun xi vicuya naja suhi vihi ne, hya cuetjucaa jain. —Cuatjin xu cachja Jesús.

¹⁷Hane xi cafahatsja xu me ngu vasu ne, sehe casua me nacuechji rë Nina, sehe cachja xu me cuitjin:

—Juhun vihi ne, sehe sihun tsë tsë cojo xingun ta, ¹⁸hacuaha cuichjá nga cojo nuju ta quihndë cojo nixtin xi cjuiniji sa ne, ha quihndë cyaan cuëhë xan rë uva. Cuëhë, peru hisca hya xi cuinduva Nina sahmi me gobiernu. —Cuatjin xu cachja Jesús.

¹⁹Hane xi cafaha me ngu niñutsju hacuaha casua me nacuechji rë

Nina ne, sehe cavotohocja xu me niñutsju jan. Hane xi casua rë me apóstol jan ne, sehe cachja xu me cuitjin:

—Vihi ne, yojo naha vi, xi tisuá xi cueya ngatsë nuju. Cuitjin nihñu xcusun vihi yasen ni, cojo sa xi ninguitsjun ná. —Cuatjin xu cachja Jesús.

²⁰Hane xi cajnetaha cajinë nguixun me ne, hacuanitjin xu ni casahmi me cojo vasu. Hora xi casua rë me apóstol ne, cuitjin xu cachja me:

—Xan vihi ne, vihi jni naha xi cuetju ngatsë nuju. Cuatjin xi cuma chihin compromisu xatsë xi tisahmi Nina cojo xuta.

²¹Peru chutsujun ni, cha xi sahmi ná entregadu ne, ngeuhe tacun cha ngajñi naja. ²²Hane ngahan xi Quihndi rë Xuta Jain ngahan ne, hatuxa tjin ná xi cueya sacuatjin cavichaya Nina tsahan. Peru jemu chojyihí tsëhë cha xi sahmi ná entregadu. —Cuatjin xu cachja Jesús.

²³Ngajan xi yëjë xu apóstol jan ne, cavetsihin cavinenguise xicjin me jarë me xi sahmi xcusun vëhë.

Yo xi hitsë sa matitjun

²⁴Hya xi camá xu ne, cavetsihin sacuaaha xi meje scaanya me ngajñi rë me yo xi chja xuta xi hitsë sa matitjun. ²⁵Ngajan xi Jesús ne, cuitjin xu cachja me:

—Yëjë ni xuta xi matitjun ngeuhe ngasunhndë ne, jercu sahmi yehe me yojo rë me sacuaaha xi me vëhë má me nai rë xuta. Hacuaha jercu meje rë me xi yëjë xuta ne, cuichja me xi jemu ndaja me xi matitjun

vë. ²⁶Peru ngayun ne, mijí rë xi cuatjin nihñu ta xi meje rë ne, ngu xi matitjun tsëhë ngajñi nuju ne, catitsinguijne yojo rë sacuaaha ngu xi chúva nu rë. Hane ngu xi vitexa tsëhë ngajñi nuju ne, hacuaaha catitsinguijne yojo rë sacuaaha ngu hndixahan. ²⁷¿Yo xi hitsë sa matitjun ni? ¿Há ngu xi tijinë ne, o há tsajin ne, há ngu hndixahan xi cjui cani comida? Xi tijinë ne, hatuxa vëhë xi hitsë sa matitjun. Peru ngahan ne, tejña ngajñi nuju sacuaaha ngu hndixahan nuju.

²⁸Ngayun ne, ngayun xi cacaa nuju cojo yëjë cjuañihí xi cavatjuun camá. ²⁹Vëhë xi sacuaaha casuaxa ná Nahmi naha xi ngahan sahme gobiernu ne, cuatjin suáxa nuju xi nihñu gobiernu, ³⁰cojo sa xi ngayun ne, hacuaaha xinu siuhun cojo ná ngajan hiscan sahme gobiernu. Hacuaha suáxa nuju xi nichuvun cjuatacun rë yëjë tejó tjë naja, ngayaan xi tjë rë xutachanga naja Israel ngayaan. —Cuatjin xu cachja Jesús.

Casua Jesucristu camachaya rë Pedru xi cuichja me xi hvíin me yo Jesucristu

³¹Hacuaha cachja sa xu Jesús cuitjin cojo Pedru xi hacuaaha hmí rë me Simón:

—Chutsujun ni Simón. Satanás ne, casacu rë cahndé xi tsichuva cjuatacun nuju ngayujun ni. ³²Peru ngayun Simón ne, caféhya rë Nina ngatsë nuju, cojo sa xi hacuiin cumandaya tacún sacuatjin xi mangutacún cojo ná. Hane hya xi ngayun cuyun nga ndiya naha ne, tuhun ngahñu xingun. —Cuatjin xu cachja Jesús.

³³Ngajan xi Pedru ne, cachja xu me cojo Jesús cuitjin:

—Tatá. Ngahan ne, tsingatehen cjué ndavaya cojo nuju hisca tsingatehen cueya cojo nuju.

—Cuatjin xu cachja Pedru.

³⁴Ngajan xi Jesús ne, cuitjin xu cafayangui me tséhë Pedru:

—Nguehe cuichjá cojo nuju, Pedru. Chaja sa xi squihnda ngu xahnda ne, ha jyan ndiya canújun xi hyúun yo ngahan. —Cuatjin xu cachja Jesús.

Camatiña hora xi chjahá rë Jesucristu

³⁵Hacuaha cachja me cojo xuta ladu rë me cuitjin:

—Hya xi catsingátju nuju xi cachjá cojo nuju xi chuun tujún, chuun changa hacuaha chuun chuxinxté ne, ¿há quixi xi tsajin mé camachaja nuju? —Cuatjin xu cachja Jesús.

Hane xuta ladu rë me jan ne, cuitjin xu cachja me:

—Juun, tsajin mé. —Cuatjin xu cachja me.

³⁶Hane Jesús ne, cachja nga xu me cuitjin:

—Peru quihndë ne, jarë ngayun xi tjin nuju tujún, tjin nuju changa ne, chuhun, tángun cojo. Hane yo xi tsajin rë ngu quichandujú ne, catiteña tsjanga rë ne, sehe catatsë ngu quichandujú. ³⁷Cuatjin meje rë ta, tséhë xi guehe cuichjá cojo nuju ta hacutjin xi camahindu tsahan xcun xujun rë Nina ne, hatuxa tjin rë xi cuetjucaa, cjuá xi chja cuitjin: “Cuichja xuta tséhë me xi ngu xuta tsehen me.” Cuatjin camahindu. Hatuxa cuetjucaa

sacuatjin camahindu. —Cuatjin xu cachja Jesús.

³⁸Sehe ngajan xi xuta ladu rë Jesús jan ne, cuitjin xu cachja me:

—Chutsujun ni, tatá. Nguehe ne, ha siu jo quichandujú. —Cuatjin xu cachja me.

Sehe ngajan xi Jesús ne, cuitjin xu cafayangui me:

—Cojo vëhë ne, ha cuma.

—Cuatjin xu cachja me.

Casahmi Jesucristu oración rë me ngajan Ndetjún Olivu

³⁹Hya xi camá ne, xi cavetju xu me tséhë nandya Jerusalén ne, sacuatjin xi ha xcusun rë me ne, quiji xu me Ndetjún Olivu. Hacuaha cojo yëjë xuta ladu rë me quiji xu me cojo rë me. ⁴⁰Hane xi cafehe me jan ne, cachja xu me cojo xuta jan cuitjin:

—Chjahyun rë Nina xi hacuiin chjaháchuva nuju cojo cjuatacun nuju. —Cuatjin xu cachja me.

⁴¹Hane xi quijixin me hitsë tséhë xuta ladu rë me jan ne, sehe ngajan cavixcuhnchi xu me xi sahmi me oración rë me, ⁴²cuitjin xu cachja me:

—Ngayun Nahmi naha, sá mé ni xi meje nuju ne, chjuhunxun cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan. —Cuatjin xu cachja me.

⁴³Hya xi camá ne, cavëë xu me ngu ángel xi canduva tséhë ngahnga, casua rë me ngahñu.

⁴⁴Hane xi jemu jima ndaya cacun xu me ne, hitsë sa jercu cafehya rë me Nina. Hacuaha ndasueya xi

cavetju rë me ne, sacuahahi jni xu cún xi cavixu nangui.

⁴⁵Hane xi cavisatjenhnga xu Jesús xi cajnetaha casahmi me oración rë me ne, xi cavuya quiji me hiscan siu xuta ladu rë me jan ne, casacutsja xu me xi siufë, ngatsë rë cjuachoho rë. ⁴⁶Sehe ngajan xi Jesús ne, cuitjin xu cachja me cojo xuta jan:

—¿Mé má cuatjin tsjuñufun ni? Tisatjunhngun ne, nihñu oración nuju, sátu chjaháchuva nuju cojo cjuatacun nuju. —Cuatjin xu cachja Jesús.

Cafaha xuta Jesucristu

⁴⁷Jinguyëjë rë xi tichja cuaha xu Jesús ne, ha tu ñahñu jercu cjin xuta cafehe me. Hane cha xi hmí rë Judas, ngu cha ngajñi rë me xi tejó xi má ladu rë Jesús jan ne, titjun xu cha xcun xuta cjin jan cjuí cha. Hane xi cafehe cha jan ne, sehe quijitiña xu cha xi cuitatsuha cha Jesús xi sua cha me nina. ⁴⁸Ngajan xi Jesús ne, cuitjin xu cachja me cojo cha:

—Judas, ¿há cuatjin cuitatsuhun ná xi nihñu ná entregadu, ngahan xi Quihndi rë Xuta Jain ngahan? —Cuatjin xu cachja me.

⁴⁹Hane xi cajne rcu xuta xi siu cojo Jesús xcusun xi cuma jan ne, sehe cachja xu me cuitjin:

—Tatá. ¿Há cujin rë me quicha? —Cuatjin xu cachja me.

⁵⁰Hya xi camá xu ne, ngutjen cavaja ngu me jan cha hndixahan rë nahmi xi matitjun tsëhë yëjë ni nahmi, hane cavatësun xu me tyjavañuju quixi cha. ⁵¹Hane

ngajan xi Jesús ne, cuitjin xu cachja me:

—Camá ni. —Cuatjin xu cachja me.

Hane xi cavetahatsja xu me hiscan cati rë cha ne, camandaja xu cha casahmi Jesús. ⁵²Hane nahmi xi matitjun cojo cha mayu yungun xi matitjun cojo xutachanga, xi cafehe me xi cjuaha me Jesús ne, cachja xu Jesús cojo rë me cuitjin:

—¿Há nduvun chjuhun ná sacuahahi ngu xuta xi chëjë me, xi cuatjin nduvun cojo ya cojo quicha vë ni? ⁵³Xi cavitejñaya cojo nuju nchunchujun ni ndatsen yungun jan ne, cavetuhunntsuun ná. Peru quihndë cavechú hora xi casua Nina cahndé xi nihñu cojo ná tu mé ni xi meje nuju, cavechú hora xi Satanás cuitexa. —Cuatjin xu cachja Jesús.

Cachja Pedru xi hvíin me yo Jesucristu

⁵⁴Hya xi camá xu ne, xi cafaha xuta jan Jesús ne, quijicojo me me ndava nahmi xi matitjun tsëhë yëjë ni nahmi. Pedru ne, hacuaha tjengui xu me cjuí me tu cjin tu cjin ni hacutjin cjuí xuta jan cojo Jesús. ⁵⁵Hane xi cafehe xu me jan ne, casahmi me ngu ndava ndihi ngajan ndatsen ndihya, sehe ngajan quiji me caviyuju tangun me. Hacuaha cojo xu Pedru quiji me cavéjña tangun me cojo xuta jan.

⁵⁶Hane xi cavëë xu na hndixahan rë nahmi jan Pedru, tacun me xcun ndihi jan ne, xi cavutsejenndaja na me ne, sehe cachja xu na cuitjin:

—Me xi cuijyihí vi ne, cojo me tacun me cojo me xi cuajyihí vë hya. —Cuatjin xu cachja na.

⁵⁷Hane Pedru ne, cavitijaya me cachja xu me cuitjin:

—Hveen yo vë. —Cuatjin xu cachja me.

⁵⁸Xi cavatju nga ngu hora lihndi ne, xi cavëë nga ngu cha Pedru ne, cachja xu cha cuitjin:

—Ngayun ne, hacuaha ladu rë me xi cuacun vë má ngayun. —Cuatjin xu cachja cha.

Ngajan xi Pedru ne, cuitjin xu cachja me:

—iJéya, hacuiin! —Cuatjin xu cachja me.

⁵⁹Xi cavatju sacuaha ngu hora nga xu ne, cachja nga ngu cha xi tacun jan cuitjin:

—Ha cjuaquixindaja ta cha xi cuijyih vi ne, cojo cha tacun cha cojo cha xi cuajyih vë, tsëhë xi hacuaha cha Galilea cha. —Cuatjin xu cachja cha.

⁶⁰Ngajan xi Pedru ne, cuitjin xu cafayangui me:

—Hveen mé xi nújun vë. —Cuatjin xu cachja me.

Hane ha tu tichja cuaha xu Pedru ne, ha tu ñahñu cajindaya ngu xahnda jan. ⁶¹Ngajan xi Nai naja ne, cavuya vutsejen xu me Pedru. Hane Pedru ne, catsinguitsjen xu me cjua xi cachja Nai naja cojo rë me, xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Cjua vëhë xi catsinguitsjen xu Pedru. ⁶²Hane xi cavetju xu me candatsen ne, cajihnda susu me.

Catsixcuehyu xuta Jesucristu

⁶³Hane cha xi siutahá sahmi cuidadu rë Jesús jan ne,

titsixcuehyu xu cha me hacuaha tivaja cha me. ⁶⁴Hane xi cavetsa xu cha tuxcun me ne, sehe cavaja sa cha me, sehe cachja xu cha cuitjin:

—iTinoje! ¿Yo xi tivaja ri?

—Cuatjin xu cachja cha.

⁶⁵Hacuaha jemu cjín sa xu cjua cachja cha xi choho chja cha tsëhë me.

Casahmicuenda xuta xi matitjun jyé rë Jesucristu

⁶⁶Hane xi camá nchujun jan ne, camatangun xu xuta changá tsëhë nandya jan cojo nahmi xi matitjun cojo cha xi vicuya cjuachacun. Sehe quiji chani xu rë Jesús xcun xuta xi cuacun jan xi chjahácuenda rë jyé rë me. ⁶⁷Hane xi cafehe Jesús jan ne, sehe cavinenguise xu xuta jan cuitjin:

—Sá xi ngaye xi catsingatju Nina ngaye ne, tinoje cojo niji. —Cuatjin xu cavinenguise xuta jan.

Sehe ngajan xi Jesús ne, cuitjin xu cafayangui me:

—Sá xi cuichjá cojo nuju ne, hatuxa cumacjain nuju xi cuichjá.

⁶⁸Hacuaha sá xi cjuinenguësë nuju ngu cjua ne, hatuxa chjayunnguun tsahan. ⁶⁹Peru cuetsihin cojo quihndë ni ne, ngahan xi Quihndi rë Xuta Jain ngahan ne, cuitejña ladu quixi tsëhë Nina, me xi jemu hñu ngahñu rë. —Cuatjin xu cafayangui Jesús.

⁷⁰Ngajan xi yëjë ni xuta jan ne, cavinenguise xu me Jesús cuitjin:

—¿Há ngaye xi Quihndi rë Nina ngaye ni? —Cuatjin xu cavinenguise me.

Hane Jesús jan ne, cuitjin xu cafayangui me:

—Sacuatjin nújun vë ne, cuatjin jain. —Cuatjin xu cafayangui Jesús.

⁷¹Ngajan xi xuta xi cuacun jan ne, cuitjin xu cachja me cojo xicjin me:

—¿Mé sa nihña xuta xi tsinguixi me jyé rë cha? Ha canuhyaan suvaan xi hntsua cha cavetju xi cachja cha. —Cuatjin xu cachja xuta.

Cavisehen Jesucristu xcun Pilatu

23 Hya xi camá ne, cavisatjenhnga yëjë xu xuta xi matitjun jan ne, sehe quijicojo me Jesús xcun Pilatu.

²Hane cavetsihin xu cavinchajyë me cuitjin:

—Casacuntsin cha xi cuijyihí vi tiviseccjan cha cjuatacun rë xuta. Hacuaha mijí rë cha xi cuechjin tujúnsa niji cojo César, me xi matitjun. Hacuaha chja sa cha ta hacui cha xi catsingatju Nina cha, hacuaha matitjun xu cha. —Cuatjin xu cachja me xi cavinchajyë me Jesús.

³Sehe ngajan xi Pilatu ne, cavinenguise xu me Jesús cuitjin:

—¿Há ngaye xu matitjun ngaye tsëhë xuta tjë rë Israel? —Cuatjin xu cavinenguise Pilatu.

Hane Jesús ne, cuitjin xu cafayangui me:

—Cuatjin sacuatjin nújun vë.

—Cuatjin xu cafayangui me.

⁴Ngajan xi Pilatu ne, cuitjin xu cachja me cojo nahmi xi matitjun cojo yëjë xutacjín jan:

—Sacuiin ná hisca ngu jyé rë cha xi cuijyihí vi. —Cuatjin xu cachja Pilatu.

⁵Peru quijinduju sa xu cachja xuta xi matitjun jan cuitjin:

—Jemu tiviseccjan cha cjuatacun rë xuta ngatsë rë cjua xi tivicuya cha jingujyë ni distritu Judea vi. Cavetsihin cha hisca ngajan distritu Galilea, hisca nguehe cafehe cha.

—Cuatjin xu cachja me.

Cavisehen Jesucristu xcun Herodes

⁶Hane xi cahndë Pilatu cjua vëhë ne, sehe cavinenguise xu me xuta jan cuitjin:

—¿Há cha Galilea cha xi cuijyihí vi ni? —Cuatjin xu cavinenguise me.

⁷Hane xi casacu xu rë Pilatu cjuaquixi xi hiscan xi vitexa Herodes canduva Jesús ne, sehe catsingatju xu Pilatu me xcun Herodes, tsëhë xi Herodes ne, hacuaha quitahá xu me ngajan Jerusalén nixtin hya. ⁸Hane hya xi cavëë Herodes Jesús ne, jemu ndaja camá xu rë me, tsëhë xi ha titjun sa ne, jemu meje scuëë me Jesús, tsëhë xi ha machaya rë me cjua tsëhë Jesús, hacuaha meje scuëë xu me xi sahmi Jesús ngu cjuarcun. ⁹Hane jercu cjín cjuachjinenguise casahmi xu me Jesús, peru Jesús ne, tsajin camahani mé xi cafayangui xu me. ¹⁰Hane nahmi xi matitjun cojo cha xi vicuya cjuachacun ne, jemu tivincha xu me jyé rë Jesús.

¹¹Ngajan xi Herodes cojo sindadu rë me ne, jemu casahmixta xu me cojo Jesús, hacuaha catsixcuehyu me me. Hane xi catsicaja xu me Jesús ngu tsjian xi jemu ndajyihí camahani ne, sehe cavuya catsingatju nga xu me Jesús xcun Pilatu. ¹²Hane nixtin hya ne, Herodes cojo Pilatu ne, jemu cavinga xu rë me xicjin me, handasa titjun xu ne, maji vëë xicjin me.

**Camá entregadu Jesucristu
xi cjue cueya me**

¹³Hya xi camá ne, xi casahmitangun xu Pilatu nahmi xi matitjun cojo xutaxa rë cojo xuta nandya ne, ¹⁴sehe cachja xu me cojo cuitjin:

—Ngayujun ni matsejen ne, canduvuncujun cha xi cuijiyihi vi nguehe matsejen, tsëhë xi xi má nuju matsejen ne, tiviseccjan cha cjuatacun rë xuta. Peru quihndë matsejen ne, chutsujun ta, xcún ni matsejen ne, cafahátaha rë cha, peru casacuiin ná hisca xi ngu jyé rë cha sacuatjin jyé xi cavinchun. ¹⁵Hacuanitjin ni Herodes matsejen ta, casacuiin rë me jyé rë cha, vëhë xi catsicuya nga me cha. Chutsujun ta tsajin camahani mé casahmi cha xi vechú chuva rë xi niqen cha. ¹⁶Vëhë xi cuitéxa sehen ni rë cha matsejen ne, sehe tsisme cha. —Cuatjin xu cachja Pilatu.

¹⁷Hatuxa xcusun xu rë Pilatu xi tsismi me ngu presu xi xuta vaxijin me nu nu ni nixtin rë suhi. ¹⁸Peru yëjë ni xuta xi matitjun jan ne, ngu tangun ni camá xu me cajindaya me cachja me cuitjin:

—iNicuhun cha vi ne, Barrabás nismu cha! —Cuatjin xu cajindaya me.

¹⁹Cha Barrabás ne, quiji cha ndavaya ngatsë rë xi casahmi xu cha ngu si cojo xutaxa rë, hacuaha catsiquehen xu cha. ²⁰Peru ngu ndiya nga cachja xu Pilatu cojo xuta xi matitjun jan, tsëhë xi Pilatu ne, meje tsismi me Jesús. ²¹Peru xuta xi matitjun jan ne, cavuya cajindaya nga me cachja xu me cuitjin:

—iTetuhun cha, tetuhun cha xcun cru! —Cuatjin xu cajindaya me.

²²Hane xi ma jyan ndiya ne, cavinenguise xu Pilatu xuta xi matitjun jan cuitjin:

—Peru ímé xi jemu choho casahmi cha ni? Tsajin camahani mé jyé rë cha casacu ná xi vechú chuva rë xi niqen cha. Vëhë xi cuitéxa sehen ni rë cha matsejen ne, sehe tsisme cha. —Cuatjin xu cachja Pilatu.

²³Peru yëjë ni xuta xi matitjun jan ne, quijinduju sa xu cajindaya me cafehya me xi setaha Jesús xcun cru. Vëhë xi cajne cacun xu Pilatu, ²⁴hacuaha cavejña cacun xu me xi sahmi me hacutjin xi fehya xuta jan. ²⁵Hya xi camá ne, catsismi xu me cha xi cafehya xuta xi matitjun jan, ngu cha xi quiji ndavaya tsëhë xi casahmi xu si cojo xutaxa rë hacuaha catsiquehen xu cha. Peru Jesús ne, casua xu Pilatu me xi cjue cueya me, sacuatjin meje rë xuta xi matitjun jan.

Casetaha Jesucristu xcun cru

²⁶Hane xi cjuicojo sindadu Jesús ne, ngajan ndiya jan cavechútáha xu cha ngu me xi hmí rë Simón tsëhë nandya Cirene, xi nduva xu me quiji me nguijña. Hane cafaha xu sindadu jan me, catsicaniji xu cha me cru xi cjue me cojo hacutjin cjui Jesús.

²⁷Hane jercu cjín camaha xu ni xuta quiji me cojo Jesús hacuaha jercu cjín xu yachjin xi hisca chja hisca jihnda na xi jemu choho má rë na ngatsë rë Jesús quiji xu na cojo me. ²⁸Hane xi cavuya Jesús cavutsejen me na ne, sehe cachja xu me cuitjin:

—Ngayun na quihndi nandya Jerusalén, xicachjihnduun ngatsé naha. Chjihndun ngatsé nuju suvun cojo ngatsé rè quihndi nuju ta, ²⁹cuechú nixtin xi cuichja xuta cuitjin: “Jemu ndaja tséhë yachjin xi hatuxa maji sacu rè na quihndi; jemu ndaja tséhë yachjin xi hisca ngu quihndi casacuiin rè na; hacuaha jemu ndaja tséhë yachjin xi casacuiin quihndi catsicha na.” Cuatjin cuichja xuta. ³⁰Nixtin hya ne, hacuaha cuichja xuta cojo ndetjún cuitjin: “Tjinengunsun niji.” Hane naxi ne, cuitjin cuichja me cojo: “Tatsun niji.” Cuatjin cuichja me ta, ³¹sá xi cuitjin choho tisahmi xuta vi cojo ná quihndë, ngahan xi tangun ngahan sacuaha ngu ya xcuen ne, hatuxa hitsë sa choho sahmi me cojo nuju nchujun ni nguini, ngayun xi tangun ngayun sacuaha ngu ya quixí. —Cuatjin xu cachja Jesús.

³²Hacuaha cojo sa xu jo cha tsehen quijicojo sindadu jan cha, xi tsiquehen tangun cha cha cojo Jesús. ³³Hane xi cafehe cha cojo Jesús hiscan xi hmí rè Nínda Rcuun ne, ngajan cavetaha xu cha Jesús xcun cru hacuaha caviyujutaha sa cha catsijo cha tsehen jan xcun cru rè cha. Ngu cru xi quitahá ngu cha ne, casecun xu táha xcun tséhë Jesús, hane ngu nga ne, táha quixi. ³⁴Ngajan xi Jesús ne, cachja xu me cuitjin:

—Ngayun Nahmi naha. Ninchatuhun rè xuta vi ta, hvíin me mé xi tisahmi me. —Cuatjin xu cachja Jesús.

Hane xi cuatëcja sindadu tsjian rè Jesús jan ne, cavaxë xu cha

ngu suerte. ³⁵Hane xutacjín jan ne, caxinchacun xu me cavutsejen me xcusun xi tijima jan. Hacuaha xutaxa rè jan ne, cavejnuccë me Jesús, cuitjin xu cachja me:

—Cavaxëtje cha jingu sa xuta. Quihndë ne, cataxëtje súv cha yojo rè cha, sá xi hacui jain cha xi cavaxijin Nina hacuaha catsingatju me. —Cuatjin xu cachja xutaxa rè.

³⁶Hacuaha sindadu jan ne, catsixcuehyu xu cha Jesús. Quijitiña cha hiscan tyanguí me xcun cru, hane meje sua xu cha xan yufa cuihi me, ³⁷sehe cachja xu cha cuitjin cojo rè me:

—Sá xi gaye jain matitjun gaye tséhë xuta tjë rè Israel ne, naxetje sove yojo riji. —Cuatjin xu cachja cha.

³⁸Hacuaha camahindu xu ngujo cjua rcu cru rè Jesús xi chja cuitjin: “Matitjun cha vihi tséhë xuta tjë rè Israel.” Cuatjin xu camahindu. Jyan hne camahindu cjua xi cuacun vë: hne griego cojo latín cojo hebreo.

³⁹Hane ngu cha tsehen xi cojo casetaha xcun cru jan ne, cuitjin xu choho cachja cha tséhë Jesús:

—¿Hacuiin gaye xi catsingatju ri Nina ni? ¡Naxetje sove yojo riji ne, hacuaha naxetje niji! —Cuatjin xu cachja cha.

⁴⁰Hane xi cavatëcja xu cha xingu jan cjua rè cha xi choho chja tséhë Jesús ne, cuitjin xu cachja cha:

—¿Há rcuiin Nina, quihndë xi tivatjun castigu sacuatjin tivatju me vëhë tijima? ⁴¹Ngayaan ne, cojo cjuaquixi xi tivatjun tijima ta, ngatsé rè xcusun xi canihña ne, vëhë xi vechú chuva rè xi cuitjin tivatjun castigu. Peru me vihi ne,

tsajin mé xi jemu choho casahmi me. —Cuatjin xu cachja cha.

⁴²Sehe cachja xu cha cojo Jesús cuitjin:

—Jesús, ninguitsjun ná hya xi cuinduvun nihñu gobiernu.

—Cuatjin xu cachja cha.

⁴³Hane Jesús ne, cuitjin xu cafayangui me:

—Cuichjá cojo nuju cjuaquixi ta ha cojo quihndé ni ne, cuinechun cojo ná ngajan cahndé ndajyihí hiscan xi hmí rë Paraíso. —Cuatjin xu cafayangui Jesús.

Xcusun xi camá hya xi cahme Jesucristu

⁴⁴Hane hora vëhë ne, camajñu xu jingujyë ni. Cavetsihin xi camanchisen ne, quiji caní rë hisca fane jyan, ⁴⁵tsëhë xi tsuhi ne, ha quihndé casuaain xu ndavá rë. Hacuaha ngajan cahntsua yungun xi matitjun, tsjian xi vitechja rë tingotjo rë Ndava Nina ne, catiyavasen xu. ⁴⁶Hya xi camá ne, jercu hñu camaha xu ni cachja Jesús cuitjin:

—Ngayun Nahmi naha. Ntsun cuejñá hasen naha. —Cuatjin xu cachja me.

Hane xi cavatju cachja me cuatjin ne, cahme xu me.

⁴⁷Hane ngu capitán xi secun tiña xu jan ne, xi cavëë cha xcusun xi camá jan ne, casahmi jyë casahmi hnga cha Nina, cachja xu cha cuitjin:

—Quixi jain xi cha xi cuijyihí vi ne, tsajin jyë rë cha. —Cuatjin xu cachja cha.

⁴⁸Hane yëjë ni xutacjín xi camatangun me xi scutsejen xu me

xcusun jan ne, xi cavatju cavëë me yëjë xcusun xi camá jan ne, cavuya me cafe xu me, ña yaha xu me rcu me ngatsë rë cjuachoho rë me.

⁴⁹Peru yëjë ni xuta xi cavinga xu rë Jesús cojo yëjë yachjin xi cavetju me tsëhë distritu Galilea cojo Jesús ne, tsëhë cjin ni hinchacun cuaha xu me tivutsejen me xcusun xi tivatju Jesús.

Caseya nima Jesucristu cahntsua tsjun

⁵⁰Hane tacun ngu xu me xi hmí rë José, ngu xuta nandya Arimatea, ngu nandya rë xuta tjë rë Israel. Me vëhë ngu xihin ndaja me hacuaha tsajin xu mé jyë rë me tjin. ⁵¹Hacuaha cachuyiin xu rë me sacuatjin caviyuju xutaxa rë xi yahnga jan cjuatacun rë me cojo xcusun xi casahmi me. Hacuaha José jan ne, jemu meje xu rë me xi cuinduva Nina sahmi me gobiernu. ⁵²Ngajan xi me vëhë ne, quiji xu me xcun Pilatu, hane cafehya xu me nima Jesús. ⁵³Hane xi casacu cahndé ne, quiji catsitujne me, sehe cavaxtë xu me ngu tsjian. Hya xi camá ne, quiji caveya xu me cahntsua ngu tsjun xi catjuhngui rë taha naxi, hacuaha hisca ngu xu nima cjëë seyaniji. ⁵⁴Nixtin hya ne, vispra xu. Ha hisca meje cuechú xu hora xi cuisehen nixtin xi chjahájenda rë.

⁵⁵Hane yachjin xi cojo xu me cavetjutangun me cojo Jesús ngajan Galilea ne, tjengui xu me quiji me cojo nima. Hane cavëë me tsjun hacuaha cavëë xu me hacutjin caseya nima. ⁵⁶Hane xi cavuya me ne, cavëhëchjine xu me rqui cojo aceite xi ndaja jne tsëhë nima.

Hane xi camá nchujun jan, xi cavechú xu nixtin xi chjahájenda rë ne, caviyujuyuu xu me, sacuatjin vitexa ley rë Moisés.

Cavuya Jesucristu cjuahñu

24 Peru tu casahasen ni tsëhë nixtin ngu tsëhë totje ne, yachjin jan ne, cavuya quiji nga xu me xcun tsjun jan hacuaha cavaha xu me rqui xi ha cavëhëchjine me jan. ²Hane xi cafehe me jan ne, cavëë xu me xi ndyojo xi cavechja rë tingotjo rë tsjun jan ne, ha canivahaxin rë. ³Hane xi cavisehen me cahntsua tsjun jan ne, cavëë xu me xi tsajin nima Nai naja Jesús. ⁴Hane jinguyëjë rë xi sacuinyiin rë me mé sahmi me ne, ha tu ñahñu camatsejen xu jo ángel jan, xi jercu tu setí camaha xu ni tsjian rë. ⁵Hane xi jemu catsacjun me camá ne, catsiquindi xu me xcun me. Sehe ngajan xi ángel jan ne, cuitjin xu cachja cojo rë me:

—¿Mé má ngajñi rë nima vinchunsun me xi quicun?

⁶Me vëhë ne, tsajin me nguehe ta cavuya me cjuahñu. Ninguitsjun hacutjin cachja me cojo nuju hya xi tacun cuaha me ngajan Galilea, ⁷hya xi cachja me xi me xi Quihndi rë Xuta Jain ne, hatuxa tjin xi cuma me entregadu tsja xuta tsehen, sehe cueya me xcun cru, hane xi cuma jyan nixtin ne, cuya nga me cjuahñu. —Cuatjin xu cachja ángel jan.

⁸Sehe ngajan xi yachjin jan ne, catsinguitsjen xu me cjua rë Jesús.

⁹Hane xi cavuya me xi quiji me xcun tsjun jan ne, quiji casua xu me camachaya rë xuta ladu rë Jesús xi

tengu jan cojo yëjë sa me xi yahnga tsëhë yëjë ni hacutjin cavatju me camá. ¹⁰Quihndë ne, yachjin xi casua camachaya rë apóstol jan ne, hacui xu na María na Mágdala cojo na Juana cojo na María naa rë Jacobo cojo sa yachjin xi yahnga. ¹¹Peru apóstol jan ne, xi má xu rë me ne, suvá cjuangarca xi chja yachjin jan, vëhë xi camacjaain xu rë me.

¹²Peru Pedru ne, vangasanii xu me quiji me hiscan tacun tsjun jan. Hane xi cafehe me jan ne, catsiquindi xu me yojo rë me, sehe cavutsejenya xu me cahntsua tsjun jan ne, hane cavëë xu me suvá tsjian jan siu. Sehe cavuya cafe xu me. Jercu quijircun xu rë me tsëhë xcusun xi camá jan.

Ndiya Emaús

¹³Hya xi camá ne, ha nixtin hya xu ni ne, jo cha ladu rë Jesús jan ne, cavetju xu cha quiji cha ngu nandya xi hmí rë Emaús, xi tacun sacuaha chuva rë tengu kilómetro tsëhë Jerusalén. ¹⁴Hane ndiya cjuí cha jan ne, cavisiajmi xu cha ngajñi rë cha tsëhë yëjë xcusun xi camá. ¹⁵Hane jinguyëjë rë xi tivisiajmi cha jan ne, cavechútáha xu Jesús cha, hane quijitangun xu me cojo cha. ¹⁶Peru handasa vutsejen cha me ne, casuaain xu Nina cahndé xi scuëë cha xi hacui me. ¹⁷Sehe ngajan xi Jesús ne, cavinenguise xu me cha cuitjin:

—¿Mé cjua xi tivisiajmu xi táha tivangun? —Cuatjin xu cavinenguise me.

Hane cha xi cuacun jan ne, caxinchacunhñu xu cha, hacuaha

jemu va tjin cacun cha. ¹⁸Hane ngu cha xi cuacun jan xi hmí rë Cleofas ne, cachja xu cha cojo Jesús cuitjin:

—¿Há ngu tu tu ngayun xi nechuntuhun nguehe Jerusalén xi cuatjin hyúun mé xi sehe cavatju camá ni? —Cuatjin xu cachja cha cojo Jesús.

¹⁹Sehe ngajan xi Jesús ne, cuitjin xu cachja me cojo cha:

—¿Mé xcusun jan? —Cuatjin xu cachja me.

Hane cha xi cuacun jan ne, cuitjin xu cachja cha:

—Xcusun xi cavatju ngu me xi hmí rë Jesús camá, ngu me xi canduva tsëhë nandya Nasaret. Me vëhë ne, xi camá rë Nina cojo xi camá rë yëjë ni xuta ne, ngu profeta me, xi jemu tjin rë me ngahñu xi casahmi me yëjë ni xcusun xi casahmi me, hacuaha xi cavicuya me yëjë ni cjua xi cavicuya me. ²⁰Hacuaha nahmi xi matitjun cojo xutaxa rë yungun naja ne, casahmi me entregadu me vëhë cojo xutaxa rë Roma xi cueya me. Hane cuaha jain tjin cavetaha me xcun cru. ²¹Ngayin ne, ha cavetihin tacuín xi me vëhë xi cuaxëtje naja me ngayejen ni ngayaan xuta tjë rë Israel. Cojo yëjë sa ne, quihndë ne, ha camá jyan nixtin cavatju xcusun xi cuacun vë. ²²Hacuaha ngujo yachjin tsëhë ladu niji ne, catsisca na cjuatacun niji, tsëhë xi xati sa nguaitañu ne, quiji xu na xcun tsjun, ²³hane xi casacuiin rë na nima ne, cafehe cachja na cojo niji xi cavëë na sacuaha ángel ngajan, hane cachja cojo rë na xi me vëhë ne, tacun me cjuahñu. ²⁴Hya xi camá ne, ngujo cha xi siu cojo niji ne, quiji cha

xcun tsjun jan, cavëë cha xi quixi jain cjua xi cachja na, peru me vëhë ne, cahviin cha me. —Cuatjin xu cachja cha cojo Jesús.

²⁵Sehe ngajan xi Jesús ne, cuitjin xu cachja me cojo cha:

—Ngayun yuma hasen, ngayun xi jemu tafi sehe macjain nuju yëjë cjua xi cachja profeta. ²⁶¿Hacuiin hatuxa casahmi ngujoyë xi me xi catsingatju Nina ne, cuatjin cavatju me cjuañihi, sehe camajyë camahnga me cojo hasen ndajyih rë me? —Cuatjin xu cachja Jesús.

²⁷Hane sehe ngajan xi Jesús ne, casuacuenda xu me cha mé vijne yëjë ni cjua xi camahindu tsëhë me xcun yëjë ni xujun rë Nina, cavetsihin me cojo cjua xi catsihindu Moisés, hane cajnetaha me cojo hisca cjua xi catsihindu yëjë sa profeta.

²⁸Hya xi camá ne, xi camatiña xu cha cojo Jesús nandya hiscan cjuí cha jan ne, Jesús ne, casahmi xu me sacuaha xi cjuenduju sa me. ²⁹Peru cha xi cuacun jan ne, jercu cjín xu cachja cha cojo rë me cuitjin:

—Tinechun cojo niji ta quihndë ne, ha quiji hora hacuaha hisca meje cjuë nixtin. —Cuatjin xu cachja cha.

Ngajan xi Jesús ne, quiji xu me cojo cha, hane cavisehen me ndava cha xi cuejña me cojo cha. ³⁰Hane xi ha cafaha me cahndé rë me xcun maxë xi sinë me niñu cojo cha ne, sehe cafaha xu me ngu niñu, hane casua me nacuehji rë Nina, sehe cavatëlanga me, casua xu me cha.

³¹Hane hora vëhë xu casua Nina cahndé xi camá cavëë cha xi hacui Jesús. Hya xi camá ne, ha tu ñahñu

cafëya xu me. ³²Hane sehe cachja xu cha ngajñi rë cha cojo xicjin cha cuitjin:

—iJercu ndaja camahani camá rë xahasen naja, hora xi tichja me cojo naja ngajan ndiya jan mé vijne cjua xi hinchá xcun xujun rë Nina! —Cuatjin xu cachja cha cojo xicjin cha.

³³Hane hora vëhë ni ne, cavisatjenhnga xu cha tsëhë maxë jan, sehe cavuya quiji cha Jerusalén. Hane xi cafehe cha jan ne, casacutsja xu cha me xi tengu jan, tjintangun me cojo me xi yahnga sa. ³⁴Hane sehe cachja xu me cojo cha cuitjin:

—Quixi jain xi cavuya Nai naja cjuahñu, hacuaha cha Simón ne, cavëë cha me. —Cuatjin xu cachja me.

³⁵Ngajan xi cha xi cuacun jan ne, casuacuenda xu cha hacutjin cavatju cha camá ngajan ndiya, hacuaha hacutjin camá cavëë cha xi hacui Jesús hya xi cavatëlanga me niñu.

Cafehe Jesucristu hiscan tjin tangun xuta ladu rë me

³⁶Hane tu tichja cuaha xu cha xi cuacun jan cojo me vëhë cjua jan ne, ha tu ñahñu cavëë xu yëjë me Jesús, secun me ngajñi rë me. Hane Jesús ne, cachja xu me nina cojo rë me cuitjin:

—Nina sua nuju me cjuandaja cjuajeya. —Cuatjin xu cachja me.

³⁷Hane yëjë xuta ladu rë Jesús jan ne, jemu catsacjun camaha xu ni me camá tsëhë xi xi má rë me ne, tivutsejen me ngu hasen. ³⁸Ngajan xi Jesús ne, cachja xu me cuitjin:

—¿Mé má cuatjin jemu fircun nuju? Hacuaha ¿mé má cuatjin mangu majo tacún? ³⁹Chutsujun ntsa cojo ntsacú ta ngahan vi. Nduvun tetuhun ntsun ná, hacuaha chutsujun ná ta ngu hasen ne, tsajin yojo rë hacuaha tsajin nínnda rë sacuatjin chutsujun ná ngahan cojo yojo cojo nínnda naha. —Cuatjin xu cachja Jesús.

⁴⁰Hane xi cavatju cachja me cjua vëhë ne, sehe catsingacun xu me tsja me cojo ntsacu me. ⁴¹Hane xuta ladu rë Jesús jan ne, hisca maji xu macjain rë me ngatsë rë xi jercu tu ndaja má camahani rë me hacuaha hisca fircun rë me. Ngajan xi Jesús ne, cavinenguise xu me xuta jan cuitjin:

—¿Há tjin nuju hitsë xi xinëë nguehe? —Cuatjin xu cavinenguise me.

⁴²Hane ngu me jan ne, casua xu me ngu rquí ti camatsju. ⁴³Hane xi cafaha me ne, cajinë xu me xcun yëjë ni xuta. ⁴⁴Sehe cachja xu me cuitjin:

—Yëjë xcusun xi cavátju camá ne, tsëhë vëhë cjua xi cachjá cojo nuju hya xi tejña cuaha ngajñi nuju. Cachjá cojo nuju ta hatuxa meje rë xi cuetjucaa yëjë hacutjin camahindu tsahan xcun xujun xi catsihindu Moisés cojo xcun xujun xi catsihindu profeta, cojo xcun xujun tsëhë Salmo. —Cuatjin xu cachja Jesús.

⁴⁵Sehe ngajan xi Jesús ne, cavuxaha xu me cjuatacun rë xuta jan, cojo sa xi cuijnercu me cjua xi camahindu xcun xujun rë Nina.

⁴⁶Hacuaha cachja xu me cuitjin:

—Cuitjin camahindu xi me xi catsingatju Nina ne, hatuxa

cuatju me cjuañihi, hane xi cjuë jyan nixtin xi cueya me ne, cuya nga me cjuahñu, ⁴⁷hacuaha sacú cumachaya rë yëjë ni xuta tsëhë ngasunhdë xi sá xi mangucacun me cojo me vëhë hacuaha tsindeya me cjuatacun rë me ne, tsinchataha Nina me tsëhë jyë rë me. Jerusalén vi ne, nguehe cuetsihin cuitsojo cjua vëhë. ⁴⁸Ngayun cuinújun cojo xuta cjua vihi ta ngayun xi cahyun hacutjin camá. ⁴⁹Chutsujun ni, ngahan tsingátju nuju Hasen xi ha cachja Nahmi naha xi sua nuju me. Peru ha tinechun ni nguehe nandya vihi hisca xi chjuhunntsun Hasen vëhë, xi cuinduva hisca ngahnga. —Cuatjin xu cachja Jesús.

Quiji Jesucristu ngahnga

⁵⁰Hya xi camá ne, cavaxëxin xu Jesús xuta ladu rë me tsëhë nandya Jerusalén, quijicojo me me hisca nandya Betania. Hane xi cafehe me jan ne, catsiquijin xu Jesús tsja me hane catsinchacun me xuta jan. ⁵¹Hane ngajñi rë xi titsinchacun me xuta jan ne, cavetjuxin xu me quiji me ngahnga. ⁵²Hane xuta ladu rë Jesús jan ne, xi cavatju cafaharcun me Jesús ne, sehe cavuya nga xu me Jerusalén cojo jemu jyë cjuasua. ⁵³Hacuaha nchunchujun ni quiji xu me yungun xi matitjun, vaxëndaja me Nina.